

METIU **gv Gamlv Milambv** **Mintamchonam**

Metiu gv Gamlv milambv milinjinam si Jisunyi milvkunam Ringnvbaanv gubv mintoku, Pwknvyarnv gv Aku Pvbv lo ninyigv nyi vdwgvlo milvkunam ha rilinjikunv akobv mintoku, so alvnnv yunying si Jisunyi bvnglwkku, Jius nyi vdwgvngv mwngma, vbvritola nyiamooku nyi mvnwng gvngv vla minpadu. Metiu sum alvrungbv lvkpv jipv. Si Jisunyi kuubvnglin nama minrapla, ninyigv baptisma naanam okv pokayarka nama minpa jila, okv vbvrikunamv ninyigv ridungripa rirapla doin japgola tamsar kunam ha, okv Galili lo mvpuripunam lobv lvkpv jidu. Ho kochingbv Gamlv lo Jisu gv Galili lokv Jerusalem bv vngnam ha okv ninyigv ataranya bvku alu kanw go ninyigv rinam dvdv nga minla, ninyia daapo lo takkinam ha minla okv ninyigv turkurkunam lobv lvkgapla vvpvdu.

So Gamlv so Jisunyi kainv tamsar nvgobv, Pwknvyarnv gv Pvbv nga japlarila nvgobv, okv Pwknvyarnv gv Karv gv lvkwng ngaka tamsar lanv gubv kaatamdu. Ninyigv kairungbv tamsar nama vvkumla baangu gubv vvpamdu: (1) Moodw putunglo Doin minam, Nyidomooku Karv lo doojinv vdwgv rikordokor ha, ridung ripa rise, pwsepaase okv Pwknvyarnv gv Karv lo vngse lvga nga minjipv (Mvrwmvpa 5-7); (2) lwbwlaksu nyidum vring gola anyia bunugv rise minse lvga

nga minam (Mvrwmvpa 10); (3) Pwknvyarnv gv Karv gv lvga nga minchisinam (Mvrwmvpa 13); (4) lwbwlaksu gv lvkwng nga tamsarnam (Mvrwmvpa 18); (5) nyiamooku gv ngoose nga okv Nyidomooku Karv gv aase nga tamsarnam (Mvrwmvpa 24-25).

Arwng lokv darlinnam

Nwdw kinam okv Jisu Kristonyi dwrwboklinnam (1:1-2:23)

Yalu gv lvgabv Jon Baptist gv ridungripa rinam (3:1-12)

Jisu gv baptisma naanam okv pokayarkanam (3:13-4:11)

Jisu gv Galili lo yalu gv ridungripa rinam (4:12-18:35)

Galili lokv Jerusalem lo (19:1-20:34)

Ataranya hupta lo okv Jerusalem gv nvchilo (21:1-27:66)

Jisu turkurkunam okv nyi vdwa kaatamsikunam (28:1-20)

Jisu Kristo gv abuapa

(Lk 3:23-38)

¹ Si Abraham gvlo linv Dabid gv husi Jisu Kristo gv nwdwv.

^{2-6a} Abraham lokv naalaila Dvbw Dabid lobv soogv nwdw ha lvkpvv: Abraham Isaak gv abuv, Isaak Jakob gv abuv, Jakob Juda gvla ninyigv boru vdwgv abuv. Okv Tamar gvlokv bvngnam Perej gvla Jera gv abuv Juda. Okv Perej Hejron gv abuv, okv Hejron Ram gv abuv. Ram Amminadab gv abuv, Amminadab Naason gv abuv, Naason Salmon gv abuv. Salmon gv kuunyilo hv Boaj, hv Rahab gvlokv bvngnam v, okv Boaj gv kuunyilo

ngv Obed, hv Rut gvlokv, okv Obed gv kuunyilo
ngv Jesse okv Jesse gv kuunyilo ngv Dvbv Dabid.

6b-11 Dabid lokv naalaila Israel nyi vdwa Bebilon lo nyirabv naakunam lobv soogv nwdw vdwa lvkpvvpv: Okv Jesse Dvbv Dabid gv abuv, Dvbv Dabid gv kuunyilo ngv Solomon (Ninyigv anv ngv Uriah gv nywng ngv), Solomon Rehoboam gv abuv, Rehoboam Abija gv abuv, Abija Asa gv abuv. Asa Jehosapat gv abuv, Jehosapat Jehoram gv abuv, Jehoram Ujjiah gv abuv. Ujjiah Jotam gv abuv, Jotam Ahaj gv abuv, Ahaj Hejekiah gv abuv. Hejekiah Mannasse gv abuv, Mannasse Amon gv abuv, Amon Josia gv abuv. Okv Josia Jehoiachin gvla ninyigv boru vdwgv abuv, so si Bebilon lo nyirabv rila doodw ngvku.

12-16 Bebilon lo nyirabv rila dooro koching lokv naalaikula Jisunyi bvngdw lobv soogv nwdw ha lvkpvvpv: Jehoiachin Sealtiel gv abuv, Sealtiel Jerubbabel gv abuv. Jerubbabel Abiud gv abuv, Abiud Eliakim gv abuv, Eliakim Ajor gv abuv. Ajor, Jadok gv abuv, Jadok Akim gv abuv, Akim Eliud gv abuv. Eliud Eliajar gv abuv, Eliajar Matan gv abuv, Matan Jakob gv abuv. Okv Jakob, Kristo vla minam Jisunyi bvngnv Meri gv nyilu Josep gv abuv.

17 Vbvrikunamv Abraham lokv Dabid lobv singtam vring gola api go, okv Dabid lokv Bebilon lo nyirabv rila doonam lobv vring gola api singtam go okv hokv naalaikula Jisu Kristonyi bvngnam lobv singtam vring gola api gobv ritoku.

*Jisu Kristonyi dwrwboklin kunam
(Lk 2:1-7)*

¹⁸ Jisu Kristonyi svbvching mooku so dwrwboklin toku. Ninyigv anv Merinyi Josep gvlo minggag jitoku, vbvritola bunyiv nywng nyilubv rila dooba sutv madvbv hv Darwknv Dow lokv anga go dootvdu vla chinsu toku. ¹⁹ Josep tarwkbaknv nyi go, vkvlvgabv Merinyi nyi vdwgv kaagialo hinying momare mvngla, mingak minsu nama atubongv kayu dukubv rungtoku. ²⁰ Ho lvkwngbv ninyigv vbv mvngdung rilo, Ahtu gv nyidogindung ako yumalo aala ninyia mintoku, “Josep, Dabid gv husi, Merinyi no gv nywngbv naase nga busu mabvka. Ninyigv kuugvnam v Darwknv Dow lokv gvdunv. ²¹ Nw kuunyilo ako bvngri, okv no hum Jisu vla amin minre—ogulvgavbolo hv ninyigv nyi vdwa bunugv rimur loka ringlin reku.”

²² Vjak so mvnwng si ridu Pwknvyarnv gv kvvlo nyijwk vdwlw minam dvdv nga jvjv bv rilin modubv. ²³ “Darwknv nyijar gunv kuu gvla, okv kuunyilo gubv bvngre, okv ninyia Immanuel vla minre” (So minam si, “Pwknvyarnv ngonugv rikulo reming gvduku,” vnam v).

²⁴ Vkvlgabv vdwlw Josep gudung tokudw nw nyidogindung gv ninyia ritokv vla mingkubv nw Merinyi nywngbv naatoku. ²⁵ Vbvritola nw Meri gv kuunyilo nga bvngtv madv yika nw Merinyi doogvkargv matoku. Okv Josep ninyia Jisu vla amin mintoku.

2

Doonyi chagia lokv kaalwknv vdvw

¹ Judia mookugv Betlehem banggu lo Jisunyi bvngtoku, Herod gv Dvbv bv rila doori hoka. Vb-vridanam gula doonyi chaagu mooku lokv nyido takar a chinv nyi mego Jerusalem lo aatoku ² okv tvvkato, “Jius vdwgv Dvbv bv rijinv vmi anga nga ogolo bvngpv? Ngonu ninyigv takar a chaagu kiambv chaalin nama kaala ninyia kumdujodubv aapvvnv.”

³ Vdwlo Dvbv Herod sum tvvpa tokudw, hv achialvbv mvngru toku, okv Jerusalem gv nyi mvnwng ngvka. ⁴ Nw Nyibu Butvnnv mvnwngnga okv pbbv tamsarnv vdwa gokkum tola bunua tvvkato, “Ogolodw Kristonyi dwrwboklin jikuv?”

⁵ “Judia mookugv Betlehem lo,” bunu mirwkto. “Vkvlgavbolo nyijwk vdvw svbv lvkpvvpv:

⁶ ‘Judah mookugv kvdw Betlehem a,
no Judah mookugv pamtv mvnwng lokv mi-
ang nvgobv ribwng kumare;
noogv lokv rigv nvgo linre,
hv ngoogv Israel nyi vdwa rigvre.’ ”

⁷ Vkvlgabv Herod chaagu lokv kaalwknv nyi vdwa kvba doosi kolo goklwk toku okv bunugv lokv chintoku takar v dw tvrwk lo boklin pvnvnyi vla. ⁸ Vbvrikunamv nw bunua svbv gaam mingv rikula Betlehem lo vngmu toku: “Vngnyika okv anga nga alvbv makar laka, okv vdwllo nonu mapa ridw, ngaaka chimu labv, ngo ka vngla ninyia kumdujodubv.”

9-10 Okv vkvlvgabv bunu vngrap toku, okv bunugv lamtvlo bunu doonyi chaagu kiamgv takar kaanam anga lvkodv kaapa toku. Vdwlo bunu um kaapa tokudw, bunu achialvbv mvngpu laku, bunu achialv himpu punya toku! Hv bunua vngcho-vngcho gvla anga gv dooku lo vnglwk gv-toku. ¹¹ Bunu naam arwnglo aatoku, okv vdwlo bunu vmi anga nga anv Meri nga lvkobv doodubv kaato kudw, bunu lwbwng ngv kumpvla gublwk dvla ninyia kumtojutoku. Bunugv amin gvnamv ain go, nampunv tvli go, okv nampunv amokayok jungnv guka naalinla ninyia jitoku.

¹² Vbvrikunamv bunu akusunv lamtvbv vngla bunugv mooku lo vngkurla vngtoku, ogulvgavbolo Pwknvyarnv bunua yumalo gamrwto Herod gv dookubv vngpit kumabkv vla mintoku.

Ijpt lo kiring kunam

¹³ Bunugv vngyuro kochingbv, yuma goloka Ahtu gv nyidogindung gonv Josep gvlo aala mintoku, “Herod vmi anga nga mvkidubv vla ninyia makar kardu. Vkvlgabv gudung tvka, okv vmi anga hala anv nga vnggv laila Ijpt lo kisum gvtoka, okv vdwlo ngo vnglakukv vla mima redw hoka doobwng laka.”

¹⁴ Josep dokrap toku, vmi anga hala anv nga vnggv laila ayu Ijpt lo kisum toku, ¹⁵ Nw hoka Herod gv sima dvdvlobv dobwngto. So si Ahtu gv nyijwk vdwlo, minpvnam gaam “Ijpt lokv ngoogv Kuunyilo nga gokpv kunv,” vnam a jvjvbv rilin modukubv si ripvrv.

Umvuu vdwa pakipamar kunam

¹⁶ Vdwlo Herod chaagu kiamgv kaalwknv nyi vdww ninyia mvvppv kunvnyi vla chinto kudw, nw achialvbv dokcha toku. Nw Betlehem okv doosindoin gv vminyilo nyingnyinv okv miangnv mvnwnnga mvkidubv orto go jitoku—so si vbv ritoku vdww chaagu kiamgv nyi kaalwknv vdwa takar gv unglin jirilokv nw sum chintoku.

¹⁷ Svbrila nyijwk Jeremia gv minam v jvfv bv rilin toku:

¹⁸ “Rama lo dutv rungnv adu go tvvpadu, hidwkla kapnam adu go.

Rakel gv kuu vdww siro kunam lvkwngbv: nw maaku jimakv vla, siinyimar mvla kapdu.”

Ijpt lokv aakur kunam

¹⁹ Herod gv siro kochingbv, Ahtu gv nyidogindung ako Ijpt lo Josep gv yumalo aalwk toku ²⁰ okv minto, “Gudungto, vmi anga hala okv ninyigv anv nga naalaila, Israel mookubv vngkur tokuka, ogulvgavbolo vmia mvkidubv rungnv vdww siroku.” ²¹ Vkvlgabv Josep gudung toku, vmi hala okv anv ha naalaila, Israel mookubv vngkur gvtoku.

²² Vbvritola vdww Josep Arkelaus Judia lo ninyigv abu Herod gv Dvbv svngtung nga svngsit pvkv vla tvvpa pvkudw, nw hoka vngdubv busuto. Ninyia yumalo abuyabv mintamto, vkvlgabv hv Galili gv mooku lo vngtoku ²³ okv Najaret vnam banggu lo ninyigv naam a mvtoku.

Okv vkvlgabv nyijwk vdwgv “Ninyia Najarene vla minre” vnammv jvjvbw rilin toku.

3

*Jon Baptist gv japgo karnam
(Mk 1:1-8; Lk 3:1-18; Jn 1:19-28)*

¹ Vbvreire hoka Jon Baptist Judia gv chukrimooku lo aala japgo raptoku. ² Nw minto, “Nonu rimur lokv mvngdin tokuka, ogulvgavbolo Nyidomooku Karv ngv nvchi dooku!” ³ Jon vkvnv nyi ako nyijwk Aijaya gv minam angv, Aijaya minto, “Chukrimooku v nyi go gokdungdo,

‘Ahtu gv lvgabv lamtv nga mvkimvak jilakv; ninyia vngmu dubv lamtv nga sorchi dubv mvtokv!’ ”

⁴ Jon gv vjiv kemel amw lokv mvnam go; hv apin hukpia go hukto, okv ninyigv dvnam v takam-yarup okv tangungula go. ⁵ Jerusalem lokv Judia mooku mvnwng lokv okv Jordan svko nvchi gv mooku lokv nyi vdwv ninyi gvlo aanyato. ⁶ Bunu bunugv rimur lokv mvngdin nyatoku okv nw bunua Jordan svko lo baptisma jitoku.

⁷ Vdwlo Jon Parisis okv Sadusis vdwa ninyi gvlo baptisma jikudubv aadu bv kaato kudw, nw bunua minto, “Tabw vdw nonu—yvvla nonua Pwknvyarnv gv mvriririt jikulo nonu aamare vla minv? ⁸ Nonu rimur lokv lirung pvku vla kaachin dukubv rinam go rito kuka. ⁹ Okv nonuno Abraham nonugv abu v vla Pwknvyarnv gv mvriririt mvji kolo aamare vla mvngma bvka. Ngo nonua

mindunv Pwknvyarnv so vlvng vdw sum naala Abraham gv husi bv mvlare! ¹⁰ Yagwng ngv singnv nga miami laalubv palin dubv dooriado; singnv alvuv apwasi svvmanv dvdv nga palinla okv vuvlo orlvk dunv. ¹¹ Nonu mvngdin pvku vla kaatambv ngo nonua isi lokv baptisma jidunv, vbvritola ngoogv kochinglo aarinv angv nonua Darwknv Dow lokv okv vuv lokv nonua baptisma jireku. Nw nga achialvuv kaiyadunv; okv ngo ninyigv lvkiam haka dvbwng yadubvka riya yakuma. ¹² Nw ninyigv aamtami kapkak nvnv upua doogv sudu. Nw ninyigv amkarmikar a nesunglo gvvlwk reku, vbvritola amsokmisok a nyimanv vuvlo ramyok reku.”

Jisunyi baptisma jikunam
(Mk 1:9-11; Lk 3:21,22)

¹³ Vbvrire hoka Jisu Galili lokv aalwk la okv Jon gvlo Jordan Svko lo aatoku, nw gvlokv baptisma naadubv vla. ¹⁴ Vbvritola Jon ninyigv mvngnama mvngkurmvngrwk modubv gwngkwto, Jon minto, “Ngo ya no gvlo baptisma naaya svnga, no ngoogvlo ayapvi!”

¹⁵ Vbvritola Jisu ninyia mirwkto, “Vjakgv lvgabv vuv doomu lajuka. Svuv rila Pwknvyarnv gv mvngnam mvnwngnga rilajuka.” Vkvlvgabv Jon mvnglvk mingv toku.

¹⁶ Jisu baapubv baptisma naanam gula, nw isi lokv agum lo daklin toku. Vbvrikunamv Ninyi gvuv nyidomooku ngv kokok jito, okv Nw Pwknvyarnv gv Dow v taakv jvuv ritola ninyi gvlo

jarlwk loodubv kaatoku. ¹⁷ Vbvrikunamv nyido-mooku tolokv gaamgo minto, “Si ngo atubogv pak-nam Kuunyilo ngv, ngoogv mvngyum namv.”

4

Jisunyi pokayarka kunam (Mk 1:12-13; Lk 4:1-13)

¹ Vbvrikunamv Dowv Jisunyi chukrimooku lo okv ninyia Uyu am pokayarka modukubv vnggvto. ² Alu champi gula okv ayu champigo dvmabv dooro koching so, Jisu kano toku. ³ Vbvrikunamv Uyu ninyi gvlo aala minto, “No Pwknvyarnv gv Kuunyilo ngvbolo, so vlvng vdww sum vtwngbv ridubv mintoka.”

⁴ Vbvritola Jisu mirwksito, “Darwknv Kitaplo mindu, ‘Nyi si vtwng lokv mwng turma dunv, vbvritola Pwknvyarnv gv minam gaam mvnwngnga dinchi dunv.’ ”

⁵ Vbvrikunamv Uyu ngv Jisunyi Jerusalem bv vnggv toku, Darwknv Pamtv lo, ninyia Pwknvyarnvnaam aoyachoknv mwnglo aolo dakmuto, ⁶ okv ninyia minto, “No Pwknvyarnv gv Kuunyilo ngvbolo, atubongv sokv poklu kaatoka, vkvlv-gavbolo Darwknv Kitaplo mindu,

‘Pwknvyarnv no gvbv ninyigv nyidogindung nga orto jire;

bunu nam bunugv laak lo dvvbwngre,
vkvlv-gavbolo noogv lvchu nga achidubv vlvng aolo mvmu madubv.’ ”

3:17 Atk 22:2; Miri 2:7; Aij 42:1; Mt 12:18; 17:5; Mk 1:11; Lk 9:35
4:1 Heb 2:18; 4:15 **4:4** Det 8:3 **4:6** Miri 91:11,12

⁷ Jisu mirwksito, “Vbvritola Darwknv Kitaplo vbv mintadu, ‘Noogv Pwknvyarnvnyi no rik-wripak mabvka.’ ”

⁸ Vbvrikunamv Uyu hv Jisunyi vnggv laila moodw aoyachok kolo chaagv toku okv ninyia nyiamooku gv achialvbw kainv karv vdwa kaatam toku. ⁹ Uyu v minto, “No nga gublwk dvla kumbo-jobo lo, nam ngo so gv kaagv dvnam mvnwg sum jire.”

¹⁰ Vbvrikunamv Jisu mirwk toku, “Uyu! No vngroto, Darwknv Kitaplo mindu, “Noogv Pwknvyarnv nyimwng kumlajolaka okv Ninyigv lvgabv rimwng laka!” ”

¹¹ Vbvrikunamv Uyu ngv Jisunyi vngyu toku; okv nyidogindung ngv aala Jisunyi ridur toku.

*Jisu Galili lo ninyigv kudungkua nga rirap toku
(Mk 1:14-15; Lk 4:14-15)*

¹² Jonnyi patwk lwknama vdwlo Jisu tvvpa pvkudw, nw Galili bv vngyu toku. ¹³ Nw Naptali lo dooku mato, vbvritola Jibulun gvla Naptali mooku gv Svpar adar lo doonv banggu, Karpnaum lo doodubv vngtoku. ¹⁴ Svvrinam si nyijwk Aijaya gv minpv nama jvjvbw rilin modukubv ritoku,

¹⁵ “Jebulun gv Kvdw okv Naptali gv kvdw,
lamtv ngv svmasa lo inv, Jordan Svko gv takdv
gonvlo,
Galili, Jentail vdwgv kvdw!

¹⁶ Kanv arwnglo doonv nyi vdwv,
kairungnv Loung go kaapare.

Sinv vdwgv kanv mooku lo doonv vdwgvlo
loung ngv ungjire.”

¹⁷ Vbvriri lokv Jisu ninyigv doina japrap toku: “Nonuno rimur lokv mvngdin tokuka ogulvgavbolo Nyidomooku gv Karv ngv nvchi duku!”

*Jisu ngui naanv nyi api go goklin toku
(Mk 1:16-20; Lk 5:1-11)*

¹⁸ Jisu Galili gv Svpar gv adar lo vngkar rilo, achiboru sinyi go aminv Saimon (Pitar vnam) okv ninyigv boru Andriu vsap lokv svpar lo ngui naadung dubv kaapato. ¹⁹ Jisu bunua minto, “Nga vngming gvlaka, okv ngo nonua nyi naadubv tamsarre.” ²⁰ Vjakgovv bunu vsap a kayupila ninyia lvkobv vngming gvtoku.

²¹ Nw vngdavngra la kvvbi achiboru sigodv kaapato, Jibedi gv kuunyilo Jon nyila Jemsnyi. Bunu svpw lo vsap a mvgemvrap sila doonyato. Jisu bunua gokto, ²² okv bunu vjakgovv svpwa okv bunugv abua kayupila ninyia lvkobv vngming gvtoku.

Jisu tamsarla, japkarla, okv mvpuripu toku

²³ Jisu Galili gv mooku mvnwnng lo vnggo karto, Jius kumku-naam lo tamsarla, Nyidomooku gv Karv gv lvkwng nga japgola, nvgwngnv achiapikla lvvmanv nyi vdwa mvpujila ritoku. ²⁴ Jisu gv vbvrinam gv yunying ngv Sairia gv mooku mvnwnnglo dusik kartoku, vkvlgabv nyi vdww nyi nvgwngnv achiapik nvnga, okv suru nvnga, nyi uyuvram gnv nga, okv svmik tabnv nga, okv digwng nvnga, ninyi gvlo aagv nyatoku, okv nw

bunu mvnwnngnga mvpu jitoku. ²⁵ Nyi nyipam twngtv nvgo ninyia vngming gvto, hv bunu Galili lokv, okv Dekapolis lokv, Jerusalem, Judia, Jordan Svko gv takdv gonv lokv.

5

Moodw putunglo doin minam

¹ Jisu nyipam vdwa kaatokula okv moodw putungbv chaato, hoka nw dootungto, ² okv ninyigv lvbwlaksu vdww ninyia dooyumto, okv bunua tamsar raptoku:

Jvjvbw mvngpu ngv (Lk 6:20-23)

- ³ “Yvnbunudw yalu lo heema do vla chindunv;
bunu mvngpuy,
Nyidomooku gv Karv ngv bunu gvngv!
- ⁴ “Yvnbunudw tinggw dunv, bunu mvngpuy;
Pwknvyarnv bunua maare!
- ⁵ “Yvnbunudw nyanyak dunv, bunu mvngpuy;
bunu Pwknvyarnv ogugo milv pvdw um
naarwk sireku!
- ⁶ “Yvnbunudw Pwknvyarnv gv mvngnam a kaiy-
achokbv rinwng dunv bunu mvngpuy;
Pwknvyarnv bunua mvngnam mvnwnngnga
nyumchi more!
- ⁷ “Yvnbunudw kvvbi ajina aya mvngpa dunv
bunu mvngpuy;
Pwknvyarnv bunua aya mvngpare!
- ⁸ “Haapok darwknv vdww mvngpuy;
bunu Pwknvyarnvnyi kaapare!

⁹ “Yvvdunudw sarsopoyo gv lvgabv ridunv, bunu mvngpuv;

Pwknvyarnv bunua ninyigv umvuu bv minre!

¹⁰ “Yvvdunudw Pwknvyarnv gv mvngnama rigv rila mvdwkmvku nama paadunv hv bunu mvngpuv;

Nyidomooku gv Karv ngv bunu gvngvku!

¹¹ “Nonuno mvngpuv vdwlo nyi vdwv nonua nyarjikaula okv mvdwkmvku la okv nonuno gvlo mvvnamrunam a mvvlwk rulwk la mvrekudw, ogulvgavbolo nonuno ngoogv nyi bv rinam lvk-wngbv. ¹² Mvngpula okv sakpu yalaka, nonugv lvgabv kairungnv rijo lakmu kaanam go nyidomooku aotv vvpv jipvkv. Nonua richo dakcho yanv krim gv nyijwk vdwaka mvdwkmvku nya-toku.

Alu okv loung

(Mk 9:50; Lk 14:34-35)

¹³ “Nonuno nyia opi mvnwng gv lvgabv alu jvbv ridunv. Vbvritola aluv vdwlo tinama nyemu kubolo, um lvkodv tidukubv mvnyu kuma. Hv anyung kaamanvgobv ridu kunv, vkvlgabv um ora dukunv okv nyi vdwv um chaajap chariap mvdukunv.

¹⁴ “Nonuno nyiamooku mvnwng gv lvgabv loung jvbv ridunv. Moodw putunglo pamtv mvnama vvsi nyuma dunv. ¹⁵ Yvvdka mvdurupuma vmv baanu gvrila bati akonv takmam madunv; vbmabvya hv um ungka kolo vvdin gvrila naam

gv nyi mvnwnnga loung ungka modunv. ¹⁶ Hvkv aingbv nonuno nyi vdvgv kaagialo loung bv unglaka, vkvlvgabv nyi vdww nonugv alvbv ri-nama kaapa gvrila, nyidomooku lo doonv nonugv Abunyi hartv reku.

Pv bv lkwngbv tamsarnam

¹⁷ “Ngam Moses gv Pv bv ngala nyijwk vdvgv tamsar nama rila ria dubv aapvngv vla mvngma bvka. Ngo bunu gvnga ria dubv aama, vbvritola bunugv tamsar nama jvjvbv rilin modubv aapvngv. ¹⁸ Mvngpa laka nyido ngvla kvdww vd-wlo nyemabv doobwng redw, Pv bv gv gaam akor chargoka rilaria nyumare—ogumvwnng gv nyeri loka nyemare.* ¹⁹ Vkvlgabv so Pv bv gv gaam mi-nam akin guka yvvdw tvvma gvrila ajin haka vbv rigv bolo hv Pwknvyarnv gv Karv lo miangyachok nvgobv rire. Kvvbi gaam gunvlo, yvvdw Pv bv gaama tvvgvrila ridula ajin haka vbv rimu bolo, hv Pwknvyarnv gv Karv lo kainvgobv rireku. ²⁰ Ngo nonua mindunv, nonu Pv bv tamsarnv vdwa okv Parisis vdwa alvyala Pwknvyarnv gv mvnglwkbv ribolo Pwknvyarnv gv Karv lo aalare.

Haachihaak namgv lkwnglo tamsarnam

²¹ “Nonuno tvvdu krim nyi vdwa minto, ‘Gwn-grw gwma bvka; yvvdw gwngrw gwrinv um hinchng chingmure.’ ²² Vbvritola vjak ngo nonua mindunv: yvvdw ninyigv achiboru a haachi† dunv um hinchng chingmure, yvvdw ninyigv

5:16 1Pit 2:12 **5:18** Lk 16:17 * **5:18** ogumvwnng gv ngeri lo; Vmalo so gv tamsarnam dvdv ngv jvjvbv rilinre. **5:21** Mog 20:13; Det 5:17 † **5:22** no haahi bolo; Pota kvvbi lo doodu ogurinv kaamabv no haachila.

achiborua ‘Noogv alvnamv ogu anyung kaama!’ Vla mindunv um kvba lo boolwkre, okv yvvdw ninyigv achiborua anyung kaamanv pvchanvno vla minv ngv vmv maatarbv guku uyumooku lo vngyare. ²³ Vkvlgabv no vdwlo noogv Pwknvyarnvnyi amin jise nga yugwnglo jitv rinyi hoka no achiboru gv nam rinying nama mvngpa bolo, ²⁴ noogv amina hoka yugwng hoka kayupila baapubv noogv achiboru gvlo vngla alvbv sarsopoyo dukubv rimisipikula aakur lakula noogv amina Pwknvyarnvnyi jilaka.

²⁵ “Nam akonv rinyingla kort lo kvba japdubv vnggv rinyi, no kort lo vngtv madvbv baapubv yalung nga japdarjapa minsu laka. No hoka aaku bolo hv nam jwngkadakanv gvlo jilwk reku, hv nam pulis lo laklwkre okv nam patwk tumlwk reku. ²⁶ Ngo nonua mindunv, no hoka noogv aje nga dornyama dvdvlo doobwng reku.

Nyimv nyilo rimurnam lkwng nga tamsarnam

²⁷ “Nonuno tvvtoku, ‘Nyimv nyilo bv rimur minsu mabvkv’ vla minam a. ²⁸ Vbvritola vjak ngo nonua mindunv: yvv akonv mvvga anga doogvkargv daloka vla kaabiu dunv hv ninyigv haapok lo ninyia lvkobv rimur roku. ²⁹ Vkvlgabv noogv nyikbik nyikkv naam kaamur moduboloka, um koolinla ora tvka! Hv alvyare noogv ayak aba gonv kaama namv, ayak mvnwngnga uyumooku bolo orlwk komam svnga. ³⁰ Noogv laak lakbik angv nam rimur gvdbolo, um palin gvrila ora tvka! Hv achialvbv alvyare noogv laak

gunv kaama namv, ayak mvnwnngnga uyumooku bolo vngmam svnga.

Burmi sinam gv lkwng nga tamsarnam
(Mt 19:9; Mk 10:11-12; Lk 16:18)

³¹ “Sika vbvka minto, ‘Yvv akonv atubogv nywng nga burbolo burdukunv vla mvnwnngnga chimpa modubv siti go ninyia jirung laka.’ ³² Vbvritola vjak ngo nonua mindunv: nyi akonv ninyigv nywng nga nyilo rinying koma gvrila kvvbi rimur lokv burdunv, okv nywng ngv kvvbi nyilu go naakubolo nyilu naachonam angv ninyia rimur modukunv; okv yvv ho nyimv anga nywngbv naaya dunv hvvka rimurlo aata dunv.

Milv nama tamsarnam

³³ “Nonuno krim gv svbv minam haka tvvnyato, ‘Noogv milv nama topu mabvka, vbvritola noogv ridubv vla Ahtu gvlo milv nama rito laka.’ ³⁴ Vbvritola ngo vjak nonua mindunv: vdwlo nonu milvnam go minredw, ogugo mintak nvyoka. Nyidomooku a mintak nvyoka, tv Pwknvyarnv gv dogingngv; ³⁵ sichingmooku haka mintak nvyoka si ninyigv lvpa gv lvnu kongv, Jerusalem haka mintak mabvka so si kainv Dvbv gv pamtv ngv. ³⁶ Noogv dumpo haka mintakla milv yoka, ogulv-gavbolo no dwmw sogo nyika yapung yakia dubv mvnyu mare. ³⁷ ‘Vkv vmalo maakv’ vse nga minda tvka-um lvvbo yadubv noogv minammv Alvmanv Angv gvlokv aadunv.

5:31 Det 24:1-4; Mt 19:7; Mk 10:4 **5:32** Mt 19:9; Mk 1:11,12; Lk 16:18; 1Kor 7:10,11 **5:33** Leb 19:12; Num 30:2; Det 23:21 **5:34** Jem 5:12; Aij 66:1; Mt 23:22 **5:35** Aij 66:1; Miri 4:2

*Mvrwkrirwk sinam gv lvkwnɡ nga tamsarnam
(Lk 6:29-30)*

³⁸ “Okv nonuno tvvpado svbv minam a, ‘Nyi kvlwk v nyik ngurv go, okv hijung kvlwk v hijung ngurv go.’ ³⁹ Vbvitola ngo vjak nonua mindunv: nonua rimur nvnga mvrwkrirwk siyoka. Nyi gonv nam moobik tanga svbiak bolo, ninyia noogv moochi tangaka svbiak dvmu laka. ⁴⁰ Okv nyi gonv noogv jvkoklaklwk ka dvrit laila kort lo nam kvba mintv bolo, ninyia noogv jvkoklaklwk haka jitam yalaka. ⁴¹ Okv sipai akonv nam yikungyira nga lvtw akin go gvji labvkv vla minbolo, no lvtw anyigo gvji laka. ⁴² Vdwlo nam nyi gunv ogugo kooridw, ninyia jirung laka; vdwlo nyi gonv nam ogugo narlabvkv vrinyi, um no ninyia narrwk silaka.

*Nyirunv vdwa pakto laka
(Lk 6:27-28,32-36)*

⁴³ “Nonuno tvvpa nyado svbv minam a, ‘Ajin a paklaka, nyiru nvnga kaanwng mabv rilaka.’ ⁴⁴ Vbvitola vjak ngo nonua mindunv: nam nyirunv vdwa paklaka okv nam mvdwkmvkunv vdwgv lvgabv kumlaka ⁴⁵ vbv rigvrikula nonuno nyidomooku lo doonv nonugv Pwknvyarnv Abu gv umvuu bv ridu kubv. Nw tarwkbaknv nyi majeka okv tarwkbaknv nyi jeka ninyigv doonyi a bunu gvlo nyika jimudu. Okv alvbv rin v haka okv alvmabv rin v jeka doochar a sarlu jimudu. ⁴⁶ Nonuno nonua paknv nga pakmwng bolo, ogulvgabv Pwknvyarnv nam aya nga jidubv? Lampu naaria nvngvka um risu gvrila! ⁴⁷ Okv nonu

noogv ajin vdwa gaam raamwng bolo, um no alvnvgo ripv mvngsu duai? Mvngjwng manv vdwwka um rinyadu! ⁴⁸ No rilakriku runglaka—noogv Abu nyido tolo doonv gv rilak rikunam aingbv!

6

Jinamrumnam gv lkwng nga tamsarnam

¹ “Nonuno hima sulaka, nonugv dormo kumla ridungripa rinama nyi vdwa kaadubv vla nyi kaapam lo rima bvka, hvbv nyi kaapam lo riku bolo, no noogv Pwknvyarnv Abu gvlokv rijo paamare.

² “Vkvlgabv vdwo no heemanv nyi ha ogugo jitiv rinyi, um no nyi vdwa kaibv kaatam mabvka, kaakudubvrinv nyi vdwgv kumkunaam vdwo okv lamtv sugulo ripia aingbv riyoka. Bunu vkvlgabv rinyadu nyi vdww kaagvrila bunuam hartv dubv vla. Ngo nonua jvjvbw mindunv, bunuam jise mvnwngnga jiropvkunv. ³ Vbvritola vdwo nonu dvmahemanv nyi vdwa ogugo ridur tvinyi vbv rilaka noogv dooku lo doonv ajin haka um chimpa madubv. ⁴ Vbvrikubolo hv no atugv risunam bv rire. Okv noogv Abu no ogugo ridudw um kaayanv nam rijo nga jire.

Kumnam lkwng nga Tamsarnam

(Lk 11:2-4)

⁵ “Vdwo nonu kumredw, kaadubv rinam aingbv rima bvka! Bunu kumkujoku naam lo okv lamtv sugulo daktola kumnwng nyadunv, nyi mvnwngnga kaakudubv vla. Ngo nonua jvjvbw

mindunv bunu ogumvwnwg nga paaro pvkunv.
⁶ Vbvrítola vdwlo no kumdubv mvngridw, noogv karchung arwng lo aalaka, agi a koktum laka, okv noogv kaapa manam Abunyi, kumlaka. Okv noogv Abu no ogugo risududw um kaayanv, nam rijo nga jire.

⁷ “Vdwlo no kumredw, arin-kamanv gaam mimabvka, Pwknvyarnvnyi chimanv vdwgv ripiavv rima bvka, bunu mvngdu bunugv Pwknvyarnv ngv tvvdunv ogulvgavbolo bunugv kumnam v asunam lvgabv. ⁸ Bunugv aingbv rima bvka. Noogv Abu chinchodu, noogv dinchi nama ninyia no kootv madvbv. ⁹ Vbvríkunanmv so sibv nonuno kumlaka:

‘Nyidomooku lo doonv ngonugv Abu:

Noogv darwknv aminv kairungnv;

¹⁰ noogv Karv bv rimu laka;

nyidomooku hv oguaingbv ridudw
 vkv aingbv sichingmooku so noogv
 mvngnambv rimu laka.

¹¹ Ngonugv dvsetvngse dinchi nama* silu ngonua jilaka.

¹² Ngonua rimur nvnga ngonu oguaingbv mvngnga pvdw,
 vkv aingbv ngonugv rimur a mvngnga jilabv.

¹³ Ngonua hila manv pokayarka go rikw moma bvka,
 vbvrítola ngonua Alvmanv Angv† loka ringya labvka.’ [Ogulvgavbolo noogv mooku hv

* **6:11** dinchi nama Vmalosilu, Vmaloaru gv lvgabv † **6:13** Megonv kitap lo lktamdo Ogulvgavbolo noogv mooku hv okv jwkrw hv, okv yungliit hv krim lokv doobwng rungnv. Amen.

okv jwkrw hv, okv yunglit hv krim lokv doobwng rungmv.] Amen.

¹⁴ Kvvbi gv nam rimur rinam a no mvngnga bolo, aotolo doonv noogv Abu ka nam mvngnga jire. ¹⁵ Vbvritola no kvvbi ham mvngnga mabolo, aotolo doonv noogv Abu ka, noogv rimur rinam a mvngnga jimare.

Yiknam lkwng nga tamsarnam

¹⁶ “Okv vdwlo nonu yikrinyi, kaadubv rinam aingbv nyukmua mvngrubv kaatamla rimabvka. Bunu ayakka mvngru nvgobv mvsudo ogulvgavbolo nyi mvnwngngv bunu yikla doodu nvnyi vla kaare. Ngo nonua jvjvbw mindunv, bunua achialvbw jijinamha jiro pvkunv. ¹⁷ Vdwlo nonu dvmabv vngrinyi, nonugv nyukmua monyupla okv nonugv dwmw a tai toksu laka, ¹⁸ vbvribolo kvvbiv nonua yikdunv vla chimare—nonugv kaapa manam Abu mwngchik chinre. Okv nonugv Abu nonu ogugo risududw um kaayanv nonua rijo nga jire.

Nyidomooku tolo nyitvyachoknam

(Lk 12:33-34)

¹⁹ “Bununo atubongv nyiamooku so nyitv nga tvvpv mabvka, soka tapin pungla okv chwnglwng dokla ramla okv dvchonv mvkola chojiku so vvpvyoka. ²⁰ Vmabvya, noogv nyitv nga nyidomooku lo tvvpv yalaka, tolo tapin pungla ramla mare, okv dvcho nvngv mvkola chola mare. ²¹ Okv ogolo noogv nyitv nga tvvpv pvdw haapok hvka hoka doore.

Ayak gv loung
(Lk 11:34-36)

²² “Nyik si ayak gv lvgabv mvdurrapum gubv ridunv. Noogv nyik hv alvbolo noogv ayak mvn-wngngv loung bv ridunv; ²³ vbvritola noogv nyik hv alv mabolo noogv ayak hv kanv arwng lo doo-dunv. Vkvlgabv noogv loung ngv kanv arwng lo dooku bolo hv achialv bv mvngru gubv ridu kunv!

Pwknvyarnv okv Ayi
(Lk 16:13; 12:22-31)

²⁴ “Yvka atu anyi gv nyirabv rinyu mare; nw akonyi pakri okv akonyi kaanwng mare; nw akonvgv minam a tvvre okv akonyi miakayare. No Pwknvyarnv nyila morko nga lvkobv anyia lvinbv riji-vngji nyulamare.

²⁵ “Vkvlgabv nonua ngo mindu, nonu hv turla singnam lvgabv dvkor tvngkor ham mvngdwk mabvka, okv ayak lokv vji vbee lvga ngaaka, ogulvgabv bolo turnam hv dvnam mamsenga kaiyama nvri? Okv ayak si vji gvnam mamsenga arv doya madunvre? ²⁶ Pvta vdwa kaatoka: Bunu aliamu pakma, aamtami nvla, nesunglo gvlwkma; vbvritola noogv Abu nyidomooku lo doonv ngv bunua kaaya tayadu! No pvta vdwa achialv bv arv doya nvngv mai? ²⁷ Nonu gv lokv akonv vbv mvngrula achuk kaiyago‡ svngnyu re?

²⁸ “Okv ogubv vji lvgabv mvngdwk dunv? Mootum gv apung agar vdwgv singnam a kaatoka: bunu atu v vji vbee lvgabv mvsu risuma. ²⁹ Vbvritola ngo nonua minjidunv Dvbv Solomon

‡ 6:27 achukkaiyago singnyure; Vmalo achuk kaigo aore. 6:29 1Dv 10:4-7; 2Kri 9:3-6

ka ninyigv nyitv mvnwng lokvka so gv apung agar so gv kaapu aingbv vji gvnam go kaamato. ³⁰ So si Pwknvyarnv yvvdw mootum gv nvmwng nga vji koomunv-nvmwng ngv silu doodu okv aarunyi dooku majinv, vmvlo ramyok jinamv. Nw jvjv rungbv nonua vji vbee koomu mabv kayure? Nonugv mvngjwng ngv miang dulaka!

³¹ “Vkvlgabv mvngru rungrap kuyoka: ngoogv dvse ngv tvngse ngv okv vji hv ogolo aatv rinvdw vla?” ³² (So mvngru runam dvdv si Pwknvyarnvnyi chimanv nyi vdwgv lokia mvngnam v.) So mvnwng sum nonu dinchi dvnv vla nonugv Abu nyidomooku doonv ngv chindu. ³³ Vmabvya ogumvnwngnga sv-nga kaiyabv Pwknvyarnv gv Karv nga okv Pwknvyarnv nam ogugo mvngpvdw um dinchi yalaka, vbvribolo Nw nam so ogu kvvbi mvnwng haka jitare. ³⁴ Vkvlgabv aaru gv lvgabv mvngdwk mabvka: aaru gv mvngdwk hv dwkgu namgo doosure. Alu gv lokulo adwkaku logv nama, hoka lwktam svgo kaama.

7

Kvvbia Jwngkadakanam (Lk 6:37,38,41,42)

¹ “Kvvbia jwngkadaka mabvka, Pwknvyarnv ka nonua jwngkadaka madubv. ² Nonu nyi kvvbia oguaingbv jwngkadaka dudw, vbvdvdbv Pwknvyarnv ka nonua jwngkadakare, okv nonu nyi kvvbia oguaingbv kiika dudw vbvching Pwknvyarnv ka nonua kiikare. ³ Ogulvgavbolo nonu atugv nyik nywkrw chartvyanv nga kaama yabv,

nonuno achiboru gv nyik nywkrw charching yanv yanga kaadunv? ⁴ Nonu oguaingbv nonugv nyik lo nyikrw chartvyanv go doomu gvrila, achiboru gv nyikgv nyikrw charching nvnga naalin laju vla minyu dubv? ⁵ Kaakudubvrinv no! Nonu atubogv nyikgv nyikrwa naalin chotoka, vbvri-bolo nonugv achiboru vdwgv nyikgv nyikrwa naalin dubv nonu kaapa nyulare.

⁶ “Darwknv ogu ogua iki vdwa jimabvka-hv bunu tapkur danv nam chvyare. Tasing laktv nga vrikbv orji mabvka—hv bunu lvpa lvkwnglo chaajap chariapre.

Kolaka, malaka okv takdin laka
(Lk 11:9-13)

⁷ “Kolaka, okv nonu koopare; malaka, okv nonu mapare; takdin laka, okv nonu gvbv agi a kokda pvjire. ⁸ Ogulvgavbolo mvnwnngnv yvv koodunv koopare, okv yvvdw madunv mapare, okv yvvdw takdin dunv ninyigv lvgabv agi a kokda pvji dunv. ⁹ Yvvgv abu ngvla kuunyilo nga vtwng go koomu gvrila vlnwng pwgo jinv ngv? ¹⁰ Vmalo ninyia ngui nvgo koomu gvrila nonu tabw sogo jiya dubvre? ¹¹ No vdwgo alvmanv gubv rida jvka, no gv umvuu vdwa alvvv jisv nga chindu, vkv aingbv, nonugv nyido Abu ka, ninyia konv nga, alvvv jisv nga, achialvvv chindunv.

¹² “No kvvbi nyi a no gv lvgabv kainvgo riji svgo vla mvngnam aingbv, no kvvbi nyi gv lvgabvka riji laka: so si Moses gv Pvbv gvla okv nyijwk vdwgv tamsar namgv arin jvngv.

Agi Gichingnv
(Lk 13:24)

¹³ “Lamtv takching kolo vnglaka, ogulvgavbolo uyumooku bv vngnv lamtv ngv geetv koyodo okv ho vngku lamtv ngv vngyin dunv, okv ho nyi vdww achialvvv vngyadu. ¹⁴ Vbvritola turku lo vngnv lamtv ngv takching dunv okv ho gv vngku lamtv ngv vngru vngya dunv, okv hoka nyi vdww miang go vngmwngdu.

Singnv okv ho gv apwasi
(Lk 6:43-44)

¹⁵ “Nonu mvvnvrnunv nyijwk vdwa hima sulaka; bunu nonugv kaagialo agum mv svlar jvbv ridu, vbvritola bunugv arwng ngv mootum svcha jvbv ridunv. ¹⁶ Bunugv gwngnam rinam lokv nonu chinreku. Hvngnv vrintv lokv anggor svma dunv, tanyum singnv lokv koksitkokrik svvlin madunv. ¹⁷ Bakboknv singnv ngv alvnnv apw asi svvdunv, vbvritola yaagampolonv singnv ngv alvmanv apw asi svvdu. ¹⁸ Bakboknv singnv ngv alvmanv apw asi svvnyu madunv, okv yaagam-polonv singnv ngv alvnnv apw asi svvnyu madunv. ¹⁹ Okv singnv apw asi alvnnv svvma nvnga patap gvrila vmvlo orlwk dunv. ²⁰ Vkvlvgabv, mvvlarula nyijwk vdwa nonu bunugv gwngnam rinam lokv chinreku.

Ngo nonua vdwloka chima
(Lk 13:25-27)

²¹ “Nga Ahtu, Ahtu vla goknv mvnwngngv Pwknvyarnv gv Karv lo aala mare, vbvritola yvvdw ngoogv nyido Abu gv mvngkubv ridu

vngdunv, hv mvngchik aanyure. ²² Vdwlo jwngkadaka aluv lori kudw, nyi achialvgo nga minreku, ‘Ahtu, Ahtu! No gv amin lokv ngonu Pwknvyarnv gv doin a japgo pvnv, no gv amin lokv ngonu uyuvram vdwa chara pvnv, okv achialvgo lamrwpanam vkv rila kaatam pvnv! ²³ Vbvrikunamv ngo bunua minreku, ‘Ngo vdwloka nonua chimapvntv. Alvmanv nyi vdwv nonu, ngo gvlokv adu roto!’

Naam mvntv nyi anyigo
(Lk 6:47-49)

²⁴ “Vkvlvgabv, yvvdw ngoogv gamchar vdwa, tvgrvila um ridu vngdunv, hv mvnglak rilaknv nyi go, ninyigv naam a vlvng aolo mvlwkntv aingbv ridunv. ²⁵ Nyido doochar hv sarluto, svko isi hv tvvluto, okv ritv doori hv rila ho naam ha tvging rigingto. Vbvritola ho naam anga mvyakmvchak nyumato, ogulvgavbolo hv vlvng aolo mvlwknam lvgabv.

²⁶ “Vbvritola yvvdw ngoogv gamchar vdwa tvgrvila okv um rima vngma dunv, hv pvchanv nyi go ninyigv naam a chukrilo mvlwkntv aingbv ridunv. ²⁷ Nyido doochar hv sarluto, svko isi hv tvvluto, ritv doori rila ho naam a tvging rigingto, okv naam angv taba toku. Okv ho hv achialvbv mvngru runam gubv ritoku.

Jisu gv tujupkunam

²⁸ Vdwlo Jisu gv vbv minya robv, nyipam hv ninyigv tamsar sarku nama tvvla lamrwpanya toku. ²⁹ Nw Pvbv tamsarnv vdwgv aingbv rima;

vmabvya nw kaiyachokbv jwkrw doonv gubvrila tamsar yatoku.

8

Jisu nyi ako mvpu toku

(Mk 1:40-45; Lk 5:12-16)

¹ Vdwlo Jisu moodw lokv lvkwngbv ito kudw, nyipam tvngtv nvgo ninyia vngming gvto.

² Vbvrikunamv taik rila silvmanv nyi ako ninyi gvlo aatoku, ninyigv kaagia lo lwbwng ngv kumpvla, okv ninyia minto, “Tamsarnv, no mvngelo nga no darwk* dubv mvnyure.

³ Jisu nw gv lak v laklin daanv okv ninyia mvsit toku. Nw mirwktu, “Ngo mvngdunv,” “Darwk tokuka!” Vto, vbv minam gula vjakgobv nyi angv gv lvmma ngv poya toku. ⁴ Vbvrikunamv, Jisu ninyia mintoku, “Tvvriato! Yvvnyika minpa mabvka, vbvritola nyibu gvlo vngdavngra yika okv ninyia no jwngkadaka kolaka; vbvrila no poorung pvku vla nyi mvnwngnga chimu laka, Moses gv ortojinam lokv erinpeelwk svnga rinlaka.”

Jisu Roman nyigam gv pakbua mvpu toku

(Lk 7:1-10)

⁵ Vdwlo Jisu Kaparnaum lo aalwk tokudw, Roman nyigam gunv ninyia kaarwksuto okv ridur labv vla kooto: ⁶ “Tamsarnv, ngoogv pakbu hv achialvbv lvmala, naam gadw lo binyu tapnyu mabv, karpvkv.”

⁷ Jisu minto, “Ngo vngla ninyia alvdubv mvreku.”

* **8:2** nga darwk dubv mvnyure: Si vvma si nyi nga ayumasi moonv. **8:4** Leb 14:1-32

⁸ “Oo, Tamsarnv, ma,” vla nyigam angv mirwk toku. “Ngo nam ngoogv naam lo aaji labv vla mvngma. Vjak so orto jimwng tvka, okv ngoogv pakbu ngv poyariku. ⁹ Ngo ka kainv nyigam vd-wgv arwng lo doonv nyi akonv, okv ngoogv arwng loka sipai hv doodunv. Ngo so doonv anga ‘vngto’ vla orto jibolo hv vngdunv; okv ngo olo doonv anga ‘so aato’ vla orto jibolo, hv aadunv; okv ngo ngoogv pakbu nga, ‘Sum rito’ vla orto jibolo okv hv um ridunv.”

¹⁰ Vdwlo Jisu hum tvvtokudw, nw lamrwpatoku okv ninyia vngming gvnv nyi vdwa minto, “Ngo nonua minpa dunv, Israel mooku lo ngo svbv mvngjwng nvgo vdwloka kaapama. ¹¹ Ngo nonua jvjvbw mindunv nyi achialvgo doonyi chagia okv doonyi aagia lokv aakumla Abrahamnyi, Isaaknyi okv Jakobnyi lvkobv Nyidomooku gv Karv dvpam dvmin lo dooming gvvre. ¹² Vbvritola yvvdw Karv lo doorung jinv nga kanv jiriak kolo orlwkreku, hoka bunu achiapik v hila kumabv hijung nga hitwk kwrwk sila dooreku.” ¹³ Vbvrikunamv Jisu nyigam anga mintoku, “Naam bv vngyi kuka, no ogugo mvngjwng pvdw hv nam riji reku.”

Okv nyigam gv pakbu angv ho pooya datoku.

Jisu nyi achialvgo mvpu toku

(Mk 1:29-34; Lk 4:38-41)

¹⁴ Jisu Pitar gv naam lo vngtoku, okv hoka Pitar gv ayuv ramla gadw lo doodubv nw kaapa toku. ¹⁵ Jisu hvkvgv laak ha mvsetto; ramnamv ninyia vngyu toku, okv hv gudung laku, Jisunyi dvnamtvngnam jirap toku.

¹⁶ Vdwlo arium tokudw, nyi vdww uyuvram naanam nyi vkv achialvgo Jisu gvlo aagv jito. Jisu Gamchar lokv uyuvram vdwa chara toku, okv lvvmanv mvnwnngnga mvpu jitoku. ¹⁷ Ninyigv svbvrinam si nyijwk Aijaya gv “Nw atubongv ngonugv achiapit mvnwnngnga naasuto okv ngonugv lvvma mvnwnngnga gvaa jipvku,” vla minam a jvjv modukubv ritoku.

Jisunyi reming gvnam gv arv
(Lk 9:57-62)

¹⁸ Vdwlo Jisu nyipam v ninyia dakyum pvbo vla chinto kudw. Nw ninyigv lvbwlaksu vdwa svparslvv gv takdv gonvlo vngyi laka vla minto. ¹⁹ Pvbv tamsarnv nyi ako ninyi gvlo aato. Hv minto, “Tamsarnv, no ogolo vngjeka ngo vngming gvduubv vla doodu kunv.”

²⁰ Jisu ninyia mirwkto, “Svlwng ngv arung doo-dunv, okv pvta vdww taasup doodunv, vbvritola Nyia Kuunyilo ngv ogoloka doonudaknu kogoka kaama.”

²¹ Lvbwlaksu kvvbinyi gunv minto, “Tamsarnv, ngam vngla ngoogv abunyi svma riicho molabvka.”

²² Jisu mirwkto, “Ngam vngming gvlaka, okv bunugv svma nga bunua riisu motoka.”

Jisu dooridoogum a mvtor toku
(Mk 4:35-41; Lk 8:22-25)

²³ Jisu svpw gulo chaala dooto, okv ninyigv lvbwlaksu vdww ninyia vngming gvto.

²⁴ Dvminmabv kairungnv dooridoogum ako rilwkla svparslvv nga rigingto, okv svpw ngv

maatarbv isi holwk tvvto. Vbvritola Jisu yup-toku. ²⁵ Lvbwlaksu vdwv ninyi gvlo aala ninyia mvuto. Bunu minto, “Ahtu, ngonu sida jiku nvlaka, ngonua ringla bvkv.”

²⁶ Jisu mirwkto, “Nonuno ogulvgabv busu nyadunv, nonugv mvngjwng ngv achok gomwng hai!” Vbvrikunamv nw gudungdanv dooridogum okv svkiok ka choibvkv vla mintorto, okv ho jematai bv ritoku.

²⁷ Nyichar mvnwngngv tvnga-rvnga nyatoku. “Ogu aingnv nyi gubvri si, doori vla svkiok kv ninyigv minam a tvvdu!” vla bunu mintoku.

Jisu uyuvram vdwgv naanam nyi anyigo mvpu toku

(Mk 5:1-20; Lk 8:26-39)

²⁸ Vdwlo Jisu svparsvlv gv takdv gonvgv Gadara mooku lo chaalin tokudw, ninyia hoka nyibung lo doonv nyi anyigo vngrwk sito. So nyi anyi lo uyuvrammv dooto okv ho lamtv hoka achialvkv busu nyala yvka vngnv kaamato. ²⁹ Vjakgobv bunu sv-gokto, “Pwknvyarnv gv Kuunyilo, no ngonu gvlo ogugo mvngpv? No ngonua dw v aatv madvbv mvrit dubvre?”

³⁰ Aduyoma lo vrik riktwnng go hoka dvla rikar nyato. ³¹ Vkvlgabv uyuvram vdwv Jisunyi koodwkkwvla kooto, “No ngonua charlin dubv mvngdu nvlo, ngonua vlo gv vrik riktwnng alo vngmulabv.”

³² Jisu bunua minto, “Vnglaak” vkvlgabv bunu kiyu laku okv riktwnnglo kilwk nyatoku. Riktwnng mvnwngngv svparsvlv gv raktam lo chapchar minsula okv isi chaplwvla sinya toku.

³³ Riktwng nga kaayanv nyi vdvw kilaku, okv banggulo vngtoku, hoka bunu ogugo ripvdw hum mvnwngnga okv uyuvram doonv nyi anyi aka ogugo ripv kudw hum minji nyatoku. ³⁴ Vkvlgabv banggu gv nyi mvnwngngv Jisunyi kaarwk sudubv vnglin nyatoku; okv vdwlö bunu ninyia kaapa tokudw, bunu ninyia bunugv mooku lokv vngro jilabv vla kodwkkwvla koola minto.

9

Jisu digwngnv nyi ako mvpu toku (Mk 2:1-12; Lk 5:17-26)

¹ Jisu svpw lo aalwk toku okv svparsvlv a rapkur la ninyigv banggubv vngtoku, * ² hoka nyi megonv digwngnv nyi ako gadw lo karmu tvla nw gvlo joolwk jito. Jisu bunugv kaibv mvngjwng nama kaagv rikula digwngnv nyi anga minto, “Ngo gv kuunyilo nga, ator bvkv! Noogv rimur vdwa mvngnga jipvkunv.”

³ Vbvrikunamv Pvbv tamsarnv megonv bunu minsunyato, “So nyi si Pwknvyarnvnyi nyarjitaridu!”

⁴ Jisu chinto bunugv mvngnam a, vkvlgabv nw minto, “Nonuno ogulvgabv svkvnv alvmanv go mvngdunv?” ⁵ “Noogv rimur ham mvngnga jipvkunv vla minam mvre, vmalo gudungto okv vnglaku vla minam mvre, ogolo angv minpu yapv? ⁶ Nyia Kuunyilo ngv nyiamooku so rimur a mvngnga nvnv doodunv vla ngo nonua kaachin modukubv ritam reku.” Vkvlgabv nw digwngnv

* **9:1** ninyi atugv banggu: Kaparnaum (kaato 4.13).

nyi anga minto, “Gudungto, noogv gadw nga naarap tvka okv naambv vngnyikuka!”

⁷ Nyi angv gudung toku okv naambv vngtoku.

⁸ Vdwlo nyi vdww um kaapa tokudw, bunu busu nyatoku, okv Pwknvyarnvnyi hartv nyato hvkvnv jwkrw aya nga nyi vdww jilwk jinam lvkwnglo.

*Jisu Metiunyi goklin toku
(Mk 2:13-17; Lk 5:27-32)*

⁹ Jisu ho mooku a vngyu toku, okv ninyigv vngdungrilo, nw lampu naaya nvgo kaapato, aminv Metiu, nw ninyigv opislo dooto. Jisu ninyia minto, “Nga vngming gvlaka.”

Metiu gudungdanv ninyia vngming gvtoku.

¹⁰ Vdwlo Jisu Metiu gv naam[†] lo dvnam dvla doorilo, lampu naayanv okv toa kunam nyi achialvgo Jisu gvla ninyigv lvbwlaksu vdwgv dvku tvbul lo aapwng mingvla dvmin gvto.

¹¹ Parisis megonv hum kaapato okv ninyigv lvbwlaksu vdwa tvvkato, “Ogulvgabv nonugv Tamsarbo vkvnv nyi vdwa lvkobv dvbam tvngbam dunvdw?”

¹² Jisu tvvpala bunua mirwksito, “Nyi chvrv nvngv daktor dinchi madunv, vbvritola yvvdw lvvma dvnv hv bunu dinchi dunv. ¹³ Darwknv Kitaplo ogu vla minpvdw vngla kaabwk tvka: ‘ngoogv mvngnam v aya kaapa minsunam si, svnwngsvmin erin-peelwknam hum yama.’ Ngo mvngdvnv nyi vdwa gokbv aama, vbvritola toa kunam nyi vdwwam yabv.”

9:10 Lk 15:12 † **9:10** Metiu gv naa lo; Vmalo ninyigv (hv Jisu gv naam). **9:13** Mt 12:7; Hos 6:6

*Yiknam lkwng nga tvunam
(Mk 2:18-22; Lk 5:33-39)*

¹⁴ Vbvrikunamv Jon baptist gv lwbwlaksu vdwv Jisu gvlo aala tvvkato, “Ogulvgabv ngonu la Parisis vdwv yiknama ridarira gvre, vbvritola noogv lwbwlaksu vdwv lvkoka yiknam go rikw madunv?”

¹⁵ Jisu mirwksito, “Nonuno vbv dmin dunvri nyidalo nyi vdwv mvngrula paapumgvjinvgv lvkobv doodubv? Vbvrirung mare! Vbvritola alu go looreku paapum gvji bonga bunugv loka naaro dukubv, okv vbvrikubolo bunu yiknam a rirap rekunv.

¹⁶ “Yvvka jvtvlaklwk ainapin lo anwnvgo hamtak lwknv kaama dunv, ogulvgabvblo anw hamtak lwknam angv takgv la okv jvtvlaklwk ka abuyayabv unگو nga kotv moyare. ¹⁷ Okv yvvka anggor ala anw nga anggor ala aku gvnvnv pumchup lo pwlwknv kaama, pwlwk kubolo pumchup v boktakre, okv anggor ala ngv sarlinre, okv pumchup v alvkumare. Vmabvya anggor ala ngvla pumchup v anyiv alvdubv, anggor ala anw nga pumchup anw lo pwlwk yadunv.”

*Nyigam gv kuunyijar okv Jisu gv vji a mvsitnv
mvvga*

(Mk 5:21-43; Lk 8:40-56)

¹⁸ Vdwlo Jisu vbv mindung rilo, rigvdogvnnv Jius nyi ako ninyi gvlo aala, ninyigv kaagialo lwbwng kumpvla, okv minto, “Ngoogv kuunyijar v vjak dadi siyibv; vbvritola no aala noogv laak v lakpv jibolo nw turri kunvpv.”

19 Vkvlgabv Jisu gudungla okv ninyia vngming gvtoku, okv ninyigv lwbwlaksu vdwv ninyia lvkobv vngming gvtato.

20 Mvvgga ako nyingring gola nyingnyi go oyi sarla silvkumanv, Jisu gv adar lo aatoku okv ninyigv vji a mvsit to. 21 Hv atubongv minutos, “Ngo ninyigv vji a mvsit mwngbolo, ngo poyariku.”

22 Jisu kaitkarla ninyia kaapato, okv minto, “Ngoogv kuunyijar a mvngrw laka! Noogv mvngjwng ngv nam poya mopvku.

23 Vbvrikunamv Jisu ho rigvdogvny nyi agv naam lo vngtoku. Vdwlo nw siku gv siinyimar gv adua okv nyi vdwgv adupvbin a kaiyayabv tvvpa tokudw, 24 Nw minto, “Nyichar mvnwngngv, agumbv linroto! Vmi nyijar angv simakv—nw yupdung mwngdunv!” Vbvrikunamv bunu mvnwngngv ninyia nyarji nyato. 25 Vbvritola baapubv nyi vdwv agum linro sopikda, Jisu nyijar angv gv karchung lo aatoku okv ninyigv laakka gakbwngto, okv nyijar angv gudung toku. 26 Svbrinam gv yunying ngv ho mooku mvnwng hoka dupwng toku.

Jisu nyikchingnv nyi anyigo mvpu toku

27 Jisu ho mooku a vngyu toku, okv nw gv vngdungrilo, nyikchingnv nyi anyigo ninyia vngming gvrapto. Bunu gokto, “Dabid gv Kuunyilo, ngonua aya mvngpa labv!”

28 Vdwlo Jisu naam agi arwngbv aatokudw, nyikchingnv nyi anyi vka aaming gvto okv bunua tvvkato, “Ngo nonyia mvpu nyure vla, nonyiv mvngjwng dunvri?”

“Tamsarbo, vkv!” vla bunyiv mirwtko.

²⁹ Vbvrikunamv Jisu bunugv nyik a mvsit toku okv minto, “Nonyi gv mvngjwngnam lokv vbrirung jilaka!”— ³⁰ okv bunyi gv nyik v nyiktarla kaapa toku. Jisu bunyia kaagapla minto, “Sum yvvnyika minji mabvka!”

³¹ Vbvritola bunyiv vnglaku okv Jisu gv lvk-wnglo yuning nga, ho mooku mvnwnglo dusik motoku.

Jisu gangkakov nyi ako mvpu toku

³² Nyi vdwgv vngyu rikulo, nyi mego uyuvram naanam nyi ako gaam milin nyuma nvgo Jisu gvlo aagv jito. ³³ Vbvritola uyuvram a chara ronam gula, nyi angv gaam rarap toku, okv nyichar mvnwngngv tvngarvnga nyatoku. Bunu hartvla minto, “Ngonu Israel mooku so vdwloka svkvnvgo kaakw mapvkv!”

³⁴ Vbvritola Parisis vdwv minto, “So si uyuvram vdwa rigvdogvkv hvkvkv jwkrw a ninyia jipv nvgo, uyuvram vdwa chara dubv.”

Jisu nyi vdwa aya mvngpa toku

³⁵ Jisu bangu vdwlo okv nampum vdwlo vnggo karto. Nw Jius kumkunaamlo tamsarto, Tvvpunv Yuning nga Karv gv lvkwng nga japgo jito, okv nyi vdwa nvngwngv achiayakla, lvvma nvnga mvpujito. ³⁶ Nw nyipam vdwa kaadung dula ninyigv haapok v bunua aya mvngpato. Ogulv-gavbolo bunua ridur nvgo kaamabv mvngru nyato, svlar lartwng go kaayanv kaamanv jvbv. ³⁷

9:34 Mt 10:25; 12:4; Mk 3:22; Lk 11:15 **9:35** Mt 4:23; Mk 13:9; Lk 4:44 **9:36** Num 27:17; 1Dv 22:17; 2Kri 18:16; Eje 34:5; Mk 6:34

9:37 Lk 10:2

Vkvlvgabv nw ninyigv lwbwlaksu vdwa minto, “Aam nvvse ngv awgo doodu, vbvritola nvvkum yaji nvngv miang go. ³⁸ Rongo atua kumto ho nw aam nvvjinv vngmu gvrila ninyigv aam a nvvkum modukubv.”

10

Apostol vring gola anyiv
(Mk 3:13-19; Lk 6:12-16)

¹ Jisu ninyigv lwbwlaksu vring gola anyia gokkumto okv bunua alvmanv dow a charanvuv okv lvvma nvgwngnv okv achiayak nvgwng nvnga mvpuripu dubv jwkrw a jitoku. ² So si Apostol vring gola anyi gv aminv: mintubv Saimon (Pitar vnam) okv ninyigv boru Andriu; Jems okv ninyigv boru Jon, bunyi gv abu v Jibedi; ³ Pilip okv Bartolomiu; Tomas okv Metiu lampu naakumyanv; Jems Alpius gv kuunyilo, okv Tadius; ⁴ Saimon ringrianv, okv Judas Iskariot, Jisunyi kupnv.

Vring gola anyi gv ridungripa
(Mk 6:7-13; Lk 9:1-6)

⁵ So nyi vring gola anyia Jisu svbv mingvrila vnglin moto: Nonuno Jentail mooku lo vmallo Samaritan banggu vdwllo vngma bvka. ⁶ Vmabvya nonuno Israel gv svlar nyekunv nyi vdwgvllo vnglaka. ⁷ Vngnyika okv japgo laka, ‘Nyido-mooku gv Karv ngv nvchi duku!’ ⁸ Lvvma nvnga mvpu laka, sinv nga turkur molaka, yvvdw taik ridunv mvpu jilaka, okv uyuvram vdwa chara laka. Nonuno arv jimabv naapvuv, vkvlvgabv

jinyubv jilaka. ⁹ Nonugv jekap lo ain, raaji, okv morko go gvma bvka; ¹⁰ moing vngkulo giagonv kochak vmalo jvkoklaklwk bornyi vmalo lvsup anyi vmalo bangngi guka gvyoka. Rinv anga ogugo dinchi pvdw jirung dunv.

¹¹ Vdwlo nonu Banggu lo vmalo napumlo aalwk redw, aagv rila nonua alvbv aamu jinv go kaaying laka, okv ninyia lvkobv dooming gvlaka nonugv ho mooku lokv vnglinma dvdvlo. ¹² Vdwlo nonuno naam gulo aaridw, ‘mvngpuv nonua lvkobv doi laka’ vla minlaka.” ¹³ Ho gv naam nyi v nonua alvbv naarwk siredw, nonugv kumrwkltak nga ho doolwk molaka; vbvritola bunu nonua alvbv naarwk sima bolo, vbvribolo nonugv kumrwkltak nga naakur lakuka. ¹⁴ Okv vdwlo banggu gunv vmalo nampum gunv nonua alvbv naarwk sima boloka vmalo tvria maboloka vbvrikunamv ho mooku a kayulaka okv lvchu gv pvmar haka moolu laka. ¹⁵ Ngo nonua jvjv nga minjidunv jwngkadaka alu lo Pwknvyarnv ho banggu gv nyi vdwa svnga Sodom okv Gomora banggu gv nyi vdwa aya yari nvpv!

Mvdwkmvku vdwv aare
(Mk 13:9-13; Lk 21:12-17)

¹⁶ “Tvvrriato! Ngo nonua vnglin mogv rinvla svlar a svcha chatwng lo vngmunam aingbv. Nonuno tabw gv apiabv hima sunvbv rilaka okv taakw jvbv angam nvgobv rilaka. ¹⁷ Himasulaka nonua naatungla tumjinv okv kvbanaam lo

boolwk jinv doodu nvla, okv bunu nonua Jius kumkunaamlo dvngrri nvla. ¹⁸ Ngoogv lvgabv nonua dvbv vdwgv okv rigvdogvnnv vdwgv kaagialo mvrit rinvla okv Jentail vdwa okv bunua Alvnv Yunying nga minjinam lvgabv. ¹⁹ Vdwlo bunu nonua mvrit kolo aagv rikudw, nonu ogu gonyi minse ngvdw vmalo oguaingbv mindu bvdw vla mvngru mabvka. Vdwlo mindubv riri kudw nonua minse nga jiri kunv. ²⁰ Nonugv gamchar dvdv ngv nonu gvngvma, hv nonugv Abu gv Dow v nonu gvlokv japdunv.

²¹ “Nyi vdwv atugv achiboru vdwa mvki modubv laklwk reku, okv abu vdwv vbvdvdv-bv bunugv umvuu vdwa rire; umvuu vdwv anvabua rinying reku okv bunua mvki moreku.

²² Ngoogv lvgabv nyichar mvnwngngv nonua kaanwng mareku. Vbvritola yvvdw ataranya lobv gakbwngla rilin doolin rinv hv turnama paariku.

²³ Vdwlo bunu nonua bangga ako lo mvdwkmvku rikudw, bangga ako gunvlo joklwk laka. Ngo nonua jvjv bv mindunv nonu Nyia Kuunyilo gv aatv madvbv Israel gv bangga mvnwnglo rise gwngse nga rinya nyumare.

²⁴ “Purinv vmiv Tamsar nvnga kaiyama dunv; nyira ngv ninyigv atua kaiyama dunv. ²⁵

Vkvlvgabv purinv vmiv ninyigv tamsarbo aingbv rirung dubv mvngdum laka, okv nyira ngvka vbvdvdv bv ninyigv atu aingbv. Vpin ara gv nyiloyachok ka Biljebul vla minbolo, vpin gv nyi vdwa hum tvrukaya yadubv bunua minre!

10:21 Mk 13:12; Lk 21:16 **10:22** Mt 24:9; Mk 13:13; Lk 21:17; Mt 24:13; Mk 13:13 **10:24** Lk 6:40; Jn 13:16; 15:20 **10:25** Mt 9:34; 12:24; Mk 3:22; Lk 11:15

*Yvnyila busu svngv**(Lk 12:2-7)*

²⁶ “Vkvlgabv nyi vdwa busu mabvka, ogugonyi vjak takmamla vvpv pvdw mvkok reku, okv arwnglo vvsinam ma chimpa morikunv. ²⁷ Ngo kanv lo nonua ogugo minpa pvdw nonuno um pua tota lo ridv laka, okv nonuno ogugo tvsi pvdw nonu hum naam mwnglo ao lokv gokpa jilaka. ²⁸ Ayakka mvki jinv nga busu mabvka, vbvritola yaji yalu ha mvki nyumare; vmabvya ayak hala yaji yalu ha uyumooku lo mvyak jinv Pwknvyarnvnyi busu yalaka. ²⁹ Morko abar mvngchik lokv nonu pvdwng nvnnyi go rvvla madunvre vbvritola nonugv Abu mvngma rinyi pvdwng nvgoka kolv lo hoolu madunv. ³⁰ Nonu gvbv dumpto dwmw haka kiro pvkunv. ³¹ Vkvlgabv busu mabvka; Nonu pvdwng mvnwng haka arv doya nvnngv!

*Kristonyi turwknam okv toanam**(Lk 12:8-9)*

³² “Yvvdw nyi vdwgv tvvpam kaapam lo rvbwngvrwngbv Jisu ngo gv-ngv vla minre kudw, ngooka ninyia nyido mooku tolo doonv ngo Abu gv kaagia lo vbvrire. ³³ Vbvritola yvvdw nga nyi vdwgv tvvpam kaapam lo mia siredw, ngooka ninyia nyido tolo doonv ngo Abu gv kaagialo mia siitv ngurure.

*Sarsopoyo lokvma vbvritola riokse lokv**(Lk 12:51-53; 14:26-27)*

³⁴ “Nyia mooku so nga himpukain a aagvla aapvvnv vla mvngma bvka. Ma, ngo sarsopoyo

nga aagvdubv aama, vbvritola riokse nga aagv yapvnv. ³⁵ Ngo aapvnv kuunyilo vdwv bunugv abu vdwa rinying modubv, kuunyijar vdwv bunugv anv vdwa rinying modubv, nyang vdwv bunugv ayu vdwa rinying modubv; ³⁶ Nyi gunv gv kairungbv nyiru minsu namv ninyigv ogu naam gv nyi gubv rire.

³⁷ “Yvvdw nga lvyabv ninyigv anv okv abua pakdunv, hv ngoogv lvbwlaksu vla mindubv riyoma; yvvdw nga lvyabv ninyigv kuunyilo okv kuunyimv ha pakdunv, hv ngoogv lvbwlaksu vla mindubv riyoma. ³⁸ Yvvdw ninyigv daapo nga joorapla ngoogv kochinglo vngming gvma dunv hv ngoogv lvbwlaksu vla mindubv riyoma. ³⁹ Yvvdw ninyigv singdung nga kai modubv mvngdunv, hv ngooyare, okv yvvdw ninyigv singdung nga ngoogv lvgabv ngoomu dunv hv singya re.

*Amin vdwv
(Mk 9:41)*

⁴⁰ “Yvvdw nonua alvbv naarwk sidunv, hv nga alvbv naarwksinam mv; okv yvvdw nga alvbv naarwk sidudw, hv nga vngmunv nw nyika alvbv naarwk sita dunv. ⁴¹ Yvvdw Pwknvyarnv gv gindungpingko nga naarwk sidunv, ogulvgavbolo hv Pwknvyarnv gv gindungpingko ngv, hv nw gvlo rijo nga paare. Okv yvvdw alvnnv nyi ha alvbv naarwk sidunv, ogulvgavbolo hv alvnnv nyi hv, hv nw gvlo rijo nga paare. ⁴² Nonu jvjvbw mvn-grung laka yvvdw nga reming gvnv miangyachok

nvgonyi isi koobu go jidunv ogulvgavbolo hv nga reming gvnv ngv, hv jvjv rungbv rijo nga paarungre.”

11

Jon baptist gvlokv gindungpingko vdvw (Lk 7:18-35)

¹ Vdwlo Jisu ninyigv lvbwlaksu vring gola anyi vdwa soogv minam vdwa minro koching so, nw ho mooku ha vngyula nvchilo doonv banggu vd-wlo tamsar okv japgo dubv vla vngtoku.

² Vdwlo Jon baptist patwklo doopv tvvla Kristo gv rinamvngnama tvvpa pvkudw, nw ninyigv lvb-wlaksu mego Jisu gvlo vngmuto. ³ Bunu minto, “Ngonu ham minpalabv, no Jon gv ako aarinvkv vla minam angvri, vmalo ngonu kvbi ako gunyi kariadu yadu bri?”

⁴ Jisu mirwkto, “Vngkur lakula Jonnyi minji tvka nonu ogugo tvvdu okv kaadu: ⁵ nyikching nvngv nyikpo duku, lvpik nvngv vngkar nyuduku, yvvbunudw apin hv yala doonv vdvw hv darwk* nyapvku, rungji nvngv tvvpa duku, sinv vdwa turkur mopvku, okv Alvnv Yunying nga heema opin vdwa japji pvku. ⁶ Vdwgo mvngpu ngv yvvdw nga tintinroru bv mvngma dunv!”

⁷ Vdwlo Jon gv lvbwlaksu vdwgvy vngyurilo, Jisu nyipam ha ninyigv lvga nga japji toku: “Vd-wlo nonu Jon gvlo chukrimooku lo vnglin rinyi, nonu ogugo kaapare vla dvmin dunv? Nvmwng anv ngv doorilo yapchar dunvri? ⁸ Nonu ogugo kaadubv vnglin pvnv? Nyi ako vji kaapubv gvnv

11:5 11:5; Aij 35:5,6; Aij 61:1

*

11:5 darwk pvku: Kaato 8.2.

gore? Vkvnv vji gvnv nyi vdww Dvbw gv karvlo doodunv! ⁹ Nga minpalabv, nonuno ogu kaadubv vla agum vnglin pvnv? Nyijwk ako-nyiri? Hv rung, vbvritola nonuno nyijwk ka kaiyanv go kaagv nyibv. ¹⁰ Jon Darwknv Kitaplo minam angv: ‘Pwknvyarnv minto, ngo ngoogv gindung-pingko nga no gv lvgabv lamtv nga mvko modubv nam vngcho yamure.’ ¹¹ Ngo nonua jvjvbw mindunv Jon Baptist kvvlo gv richo dakchonv nyi dvdv nga kaiyanv. Vbvritola yvvdw Nyidomooku gv Karv lo miangyachok nvngv hv Jon-nyi kaiyanv. ¹² Jon gv doin japri lokv rila vjak lobv Nyidomooku gv Karv ngv achialv alvmanv hirukaya† hindu, okv alvmanv nyi vdww hum mv-tum dubv rikwto. ¹³ Moses gv Pvbv ngvla nyijwk mvnwngngv Jon gvlobv Pwknvyarnv gv Karv lvga nga minyato; ¹⁴ okv nonuno bunu vdwgv doin ha tvjing dunvlo, Jon Elija kv, ninyigv aanama mincho jipvnv. ¹⁵ Vbvrikunamv tvvtoka, nonuno nyarung gvdu nvlo!

¹⁶ “Vjak ngo ogu gonyi mintakla mindubv silugv nyi vdww sum? Bunu piokpamdorpamlo vmi metwng go doonv aingdo. Vmi apum gunv ngv apum gunv nga gokdu, ¹⁷ ‘Ngonu nonugv lvgabv nyida gungrigungga mvdunv, vbvritola nonuno naas rima! Ngonu nonu gvbw siinyimar rijito vbvritola nonuno kapma!’ ¹⁸ Vdwlo Jon aatokudw, nw yigto okv opo tvngmato, okv nyichar mvnwngngv, ‘Nw gvlo uyuvram hv doolwkdu!’ vla minto. ¹⁹ Vdwlo Nyia Kuunyilo ngv aato kudw,

11:10 Mal 3:1 **11:12** Lk 16:16 † **11:12** achialvalmnmv hirukaya indu; Vmalo aadungdu achialv alvmanv. **11:14** Mal 4:5; Mt 17:10-13; Mk 9:11-13

nw dvtoku okv tvngtoku, nyichar mvnwnngv,
 ‘So nyi sum kaatoka! Nw dvki tvngki rianv go,
 lampu nayanv vdwgv okv kvvbi nyi toa kunam
 vdwgv ajin go!’ Pwknvyarnv gv mvngkimvnglak
 v ninyigv rinamvngnam lokv jvjv gubv kaadar
 modu.”

Mvngjwng manv banggu vdvw
(Lk 10:13-15)

²⁰ Jisu ogolo ninyigv lamrwpadubv mvnam ri-
 nam ma kaiyabv kaatam pvkudw ho banggu gv
 nyi vdvw bunugv rimur lokv mvngdin manya
 toku, vkvlgabv nw ho banggu vdwa haachito.

²¹ “Vdwnvgo mvngru runam gubv rire ‘Chora-
 jin’ no! Okv vdwgo mvngru runam gubv ritare,
 ‘Betsaida’ no! Nonu gvlo lamrwpnam kaatam
 nama Taire okv Sidon lo rinv guilo krim ho gv
 nyi vdvw bunu krim rimur lokv mvngdin dukunv
 vla kaatam nvbv tagiam vji ha kopv kunvvpv, okv
 bunu atu hv mvchu tayu nga taabum sipv kunvvpv!

²² Ngo nonua jvjvbv minjidunv jwngka daka alu
 lo Pwknvyarnv nonua sv-nga Taire okv Sidon gv
 nyi vdwa kaiyago aya kaatam yariku! ²³ Okv
 Kaparnaum no gvbv, no atubongv nyidomooku
 tolo naacha sidubv mvngpv ai? Nam uyumooku
 bolo orlu tainv! Nonu gvlo lamrwpnam kaatam-
 nam vdwa Sodom lo kaatam nvgo yilo, hv vjak-
 lodvbv doobwng pvvvpv! ²⁴ No hum mvngjv
 lvlaka, jwngkadaka alu lo Pwknvyarnv nonua
 svnga Sodom ha kaiyago aya kaatam riku!”

11:21 Aij 23:1-18; Ej 2:1-28; Jol 3:4-8; Amo 1:9,10; Jek 9:2-4 **11:23**
 Aij 14:13-15; Atk 19:24-28 **11:24** Mt 10:15; Lk 10:12

Ngoogvlo aala doonu laka
(Lk 10:21-22)

²⁵ Ho dw hoka Jisu minto, “Abu, nyidomooku gvla kvdw mookugv Ahtu! Nam ngo umbonyikv vla mindunv ogulvgavbolo no gv chinvpanv nyi vdwa vvsu nama silu no chimapamunv vdwa kaatam kunam lvgabv. ²⁶ Vkv Abu so si no gv rimu dvbv vla mvngnam mv.

²⁷ “Ngo gv Abu nga ogumvwnwngnga jipv. Yvvka Kuunyilo nga chima Abu mvngchik, okv yvvka Abunyi chima Kuunyilo ngv mvngchik okv Kuunyilo gv nw atu v kaatam dubv vla darnam nyi vdwv.

²⁸ “Mvwnwngngv ngoogvlo aalaka, yvvdw ainv yikungyira baktola anyu kumabv ridunv, okv ngo nonua doonu modubv jire. ²⁹ Ngo gv rvngko nga no naala mvlwk sila gvtola ngoogv kochingbv vngming gvtoka, ogulvgavbolo ngo dow lo alvuv okv nyaknyaknv; okv nonuno doonu nama paare. ³⁰ Ngoogv nonua rvngko jinam angv gvpu dunv okv ngoogv nonua vge bakmu namv haajup dunv.”

12

Jius doonualu lkvwngbv tvunam
(Mk 2:23-28; Lk 6:1-5)

¹ Achukgo ayungjvma nga Jius Doonualu golo Jisu radv rongolo vngkarto. Nwgv lwbwlaksu vdwv kano nyato, vkvlgabv bunu radv dape pikla dvrav nyato. ² Vdwlo Parisiis vdwv hum kaapa tokudw bunu Jisunyi minto, “Kaatoka, no

gv lwbwlaksu vdww Jius Doonualu so vbvrimamv ngonugv Pvbv nga rinyingdu!”

³ Jisu mirwksito, “Dabid la ninyigv nyi vdww vdwwlo bunu kano tokudw ogugo ripv hum no vd-wloka puri rika mapv nvri? ⁴ Nw Pwknvyarnv gv naam arwngbv aato, okv nw la ninyigv nyi vdww Pwknvyarnv gvlo kumlwk joolwk nam vtwng nga dvto, hum bunu dvbolo Pvbv nga rinying nam gubv riku jvka-ho gv hum nyibu vdww mvngchik dvmwng dunv. ⁵ Okv nonu Moses gv Pvbv ngaaka puri rika mapv nvri Jius Doonualu gv dwkia nyibu dvdv ngv Jius Doonu alu gv pvbv nga mvvkmvrwk ropv, vbvritola bunuv rigakpama duai? ⁶ Ngo nonua minjidunv Pwknvyarnvnaam a kaiyanv go sika si doodu. ⁷ Darwknv Kitaplo mindu ‘aya kaapa minsunam si ngoogv mvngnam mv, svnwngsvmin rinji nama makv.’ Soogv minam sum no jvrv bv chirung bolo, nonu mia kumare nyi rimur manv vdwa; ⁸ Nyia Kuunyilo ngv Jius Doonualu gv Ahtu hv.”

*Nyi ako laak gonv lakpik nvgo
(Mk 3:1-6; Lk 6:6-11)*

⁹ Jisu ho mooku ham vngyula Jius kumkunaam bv vngtoku, ¹⁰ hoka nyi ako laak hv lakpik nvgo dooto. Nyi mego hoka Jisunyi rimur rimu gvrila gungnying lwkdubv vla dooria nyato, vkvlgabv bunu ninyia tvvkato, “Jius Doonualu lo mvpu jianam si ngonugv Pvbv nga rinying nambv ridu nvri?”

¹¹ Jisu mirwksito, “Nonugv lokv akonv svlar go doore okv hv Jius Doonualu lo ungrung arwng gulo holwk rinyi? Hum nw gakbwng gvrila agum joolin maredw? ¹² Okv nyi si svlar ham achialv bv kaiyanv gukv! Vkvlgabv ngonugv Pvbv ngv ngonua Jius Doonualu lo kaadurridur minsu dubv jilin dunv.” ¹³ Vbvrikunamv nw nyi lakpiknv hum minto, “Noogv laak hv lakda tvka.”

Nw hum lakdakra jito, okv hv lvkodv alv toku, laak lakgonv aing toku. ¹⁴ Vbvrikunamv Parisis vdwv vngyu toku okv Jisunyi mvkidubv rungrap toku.

Pwknvyarnv gv darnam pakbu

¹⁵ Vdwlo Jisu nyi vdwgv ninyia mvki dubv gwngnam a tvvpa tvkudw, nw ho mooku ha vngyu toku; okv nyipam twngtv nvgo ninyia vngming gvto. Nw nyi lvmmanv mvnwngnga mvpu jitoku ¹⁶ okv bunua nw gv lvga nga yvvnyika minji mabvka vla mingap to. ¹⁷ Nw gv svbvrinam si Pwknvyarnv gv nyijwk Aijaya gvlo minam ma jvjv bv rilin modubv rito:

¹⁸ “Ngooqv darnam, pakbu hv si doopv,
ngooqv paknam, yvvnyi ngo albv mvngpvdw.

Ngo ninyigv aolo ngooqv Dow nga jilwkre,
okv nw ngooqv jwngkadaka nama diringmooku mvnwnglo gokgo jire.

¹⁹ Nw vdwloka larmare vmalo achialv bv gokmare vmalo banggu lamtv loka sudu pvbin rimare.

²⁰ Nw vdwloka nvmwng yapchar nvgoka mvrik mare,

vmalo mvru gudor manv ngaaka mvngit mare.
 Nw jvjv nga riya yamuma dvdvlo nw ribwngdvdvre,
²¹ okv nw gvlo nyi vdw mvnwngngv mvnging reku.”

Jisu okv Biljebul

(Mk 3:20-30; Lk 11:14-23)

²² Vbvrikunamv nyi vdwv nyikching okv uyuvram gvtola gaam milin nyumanv nyi ako Jisu gvlo aagv jito. Jisu nyi anga mvpu jitoku, vkvlgabv nyi angv nyiktat laku okv gaam milin nyutoku. ²³ Nyipam nyi mvnwngngv lamngak nyatoku, Jisu gv rinam a kaagv rikula. Bunu tvvkatu, “Si nyi si Dabid gv Kuunyilo ngvdw?”.

²⁴ Vdwlo Parisis vdwv hum tvvpa pvkudw, bunu mvrwkto, “Hv uyuvram vdwa chara nyudo ogulvgavbolo bunua rigvdogvny Biljebul ninyia vbv rinyu dubv jwkrw a jipv nvgo.”

²⁵ Jisu chintoku, bunugv ogugo mvngnam a, vkvlgabv nw bunua mintoku, “Diringmooku gunv ngv atuv apinain sula akonv ako nvnga mvdar minsu nvngv ayungbv dooma dunv. Okv bangga okv vpin gunv apinain sula akonv ako nvnga mvdar minsu nvngv hv ngoodunv.

²⁶ Vkvlgabv Uyu gv karv lo akonv ako nvnga mvdar minsu bolo, hvbv rinam hv manv bunu apinain suro pvku okv baapubv ngoonam bv rireku! ²⁷ Nonuno nga mindu Biljebul nga jwkrw jinam lvgabv ngo vbv uyuvram vdwa chara nyudunv vla, Alvdo, vbvrinamv nonua reming gvnv vdwa yvva bunua chara nyudubv jwkrw

jinv ngv? Nonua reming gvnvgv ogugo rinam lokv nonu mimor rungdo vla kaalin modu! ²⁸ Ma, si Biljebul makv, vbvritola Pwknvyarnv gv Dow v, nw nga uyuuvram vdwa chara nyudubv jwkrw jinv ngv, so si Pwknvyarnv gv Karv ngv nonu gvlo aapvku vla ho kaalin modu.

²⁹ “Yvrika gwlvknv nyi gv naam lo mvko mvro la aala yikungyira nga naanyu mare, vdwlo nw gwlvknv nyi anga leepv choma bolo; leepv chobolo hv yikungyira nga dvrit nyulare.

³⁰ “Akonv yvvdw ngogvbw rima dunv hv nga rinying rungduv; akonv yvvdw nga ridur madunv naakum namvka ayak apak rungduv.

³¹ Okv vkvlgabv ngo nonua minji dunv nyi vdwgv rimur a okv bunugv alvmanv mimur minam* a mvngnga nyure; vbvritola yvvdw Darwknv Dow a alvmabv mimur redw hum vdwloka mvngnga nyulamare. ³² Yvvdw Nyia Kuunyilo nga alvmabv minyingmiru go minjeka hum mvngnga nyulare; vbvritola yvvdw Darwknv Dow a alvmanv minyingmiru go minredw hum vdwloka mvngnga nyulamare-vjakka okv kokwng nyika.

Singnv okv ho gv apwasi

(Lk 6:43-45)

³³ “Alvnnv apwasi paanam lvgabv, no bakboknv singnv sorung laka; no singnv yaagampolonv sobolo apwasi alvmanv paare. Singnv nga apwasi svvlin kolokv kaachin dunv. ³⁴ Kaakudubvrinv nonu-oguaingbv nonu atubongv alv mapv tvvla,

12:30 Mk 9:40 * **12:31** bunugv alvmanv mimur minam; Vmalo Pwknvyarnvnyi bunugv minying minsu minam. **12:32** Lk 12:10

12:33 Mt 7:20; Lk 4:4

alv nvnga minyu dubv? Haapok gv karukaya nga gaam lokv milin dunv. ³⁵ Alvny nyi v ninyigv alvkolokv alvnynga naalwk dunv; alvmanv nyi v ninyigv alvmaku lokv alvmanv nga naalwk dunv.

³⁶ “Nonuno mvngjelvlaka jwngkadaka alu lo mvnwngngv alvmanv gaam raanam dvdv nga kikala jidubv rireku. ³⁷ Nonuno rimur pvdw ma rimur mapvdw, nonugv gamchar dvdv lokv nonua kaadar nvnv reku.”

Lamrwpanam go koonam

(Mk 8:11-12; Lk 11:29-32)

³⁸ Vbvrikunamv Pvbv tamsarnv nyi mego okv Parisis nyi mego milin nyato. Bunu minto, “Tamsarnv, ngonu nam lamrwpanam go ridubv kaanwngdo.”

³⁹ “Silu meru gv nyi vdwsu achialvbv alvmanyado okv pwknvyarnv kaama nyado!” vla Jisu minto. “Nonu ngam lamrwpanam rinam go koodu ai? Ma! Nonua lamrwpanam go kaatam svngv hv nyijwk Jona gv lamrwpanam nga kaatamre. ⁴⁰ Jona gv kainv ngui arwnglo alu loum gola ayu yubom go doonam apiabv Nyia Kuunyilo ngvka kvdw arwng bolo alu loum gula okv ayu yubom go doore. ⁴¹ Jwngkadaka alu lo Ninebe gv nyi vdww dakrap la nonua yamre, ogulvgavbolo bunu vdwwlo Jona gv japji nama tvvtokudw mvngdin nyatoku; okv ngo nonua minjidunv Jonanyi kaiyanv go si doopv! ⁴² Jwngkadaka alu lo Seba gv Dvny ngv dakrapla nonua yamre, ogulvgavbolo nw adubv moing

12:38 Mt 16:1; Mk 8:11; Lk 11:16 **12:39** Mt 16:4; Mk 8:12

12:40 Jon 1:17 **12:41** Jon 3:5 **12:42** 1Dv 10:1-10; 2Kri 9:1-12

vngla ninyigv mooku lokv ngv Solomon gv chianampaanam bv tamsar nama tvbv vngto; okv ngo nonua jvjv bv mindu Solomonnyi kaiyanv go si doopv!

*Alvmanv dow gv aakur kunam
(Lk 11:24-26)*

⁴³ “Vdwlo alvmanv dow v nyi gvlokv linri kudw, hv mooku mvnwnglo dooku makarla vnggo kardunv. Hv vdwlo dooku ako mapa kuma bolo, ⁴⁴ hv atubongv minsu dunv, ‘Ngo ngoogv naam lo vngkur reku.’ Vkvlgabv hv naam aakur laku naam a arochoko dubv, kakakbvrak dubv, okv mvnwngngv alvla doin dubv paadu kunv. ⁴⁵ Vbvrikunamv hv vngkur dvla kuring ninyia kaiyabv alvmanv dow kanw go naalwk dukunv, okv bunu aala ho doolwk dukunv. Vkvlgabv so si vbv rinya vngnya kubolo, ho nyi angv kvvlo gvnga kaiyago alvmayabv ridu kunv. So si vbvku silu meru gv alvmanv nyi vdwa rirekunv.”

*Jisu gv Anv okv boru vdwv
(Mk 3:31-35; Lk 8:19-21)*

⁴⁶ Jisu nyi vdwa gaam raadungla doorilo, ninyigv Anv okv boru vdwv aalwkla ninyia gaam mindubv vla agumlo tvkala daknyato. ⁴⁷ Vkvlgabv hoka nyi akonv minto, “Kaatoka, noogv anv okv boru vdwv, nam gaam mindubv vla agum v daknya pv.” †

⁴⁸ Jisu mirwkto, “Yvvla ngoogv anv ngv? Yvvla ngoogv boru vdwv?” ⁴⁹ Vbvrikunamv nw ninyigv lwbwlaksu vdwa chigap dvla minto, “Kaatoka! So

† **12:47** Bars 47 si kvvbi lvkchonam pota lo dooma

vdw si ngoogv anv okv boru vdvw! ⁵⁰ Yvnbunudw ngo Abu nyidomooku tolo doonv gv mvnglwk kaalwk bv ridunv hv bunu ngoogv boruv, ngoogv bormv ngv, okv ngoogv anv ngv.”

13

Amw chinv lo minchisinam (Mk 4:1-9; Lk 8:4-8)

¹ Ho alu akin hoka Jisu naam ha vngyula svparsvlv kiambv itoku, hoka nw dootung tvla tamsarto. ² Ninyia doyumdochinvi nyi vdww achialvbw twngtv kunam lvgabv nw svpw gulo aala dooto, nyipam gv agum lo dakrilo. ³ Nw minchisinam minv nvla bunua ogumvwnwngga minjito.

“Alu gulo nyi ako rongolo radv chibv vnglinto. ⁴ Nw rongolo radv ha chirilo, megonv lamtvlo hopvto, okv pvta vdww aala hum dvtoku. ⁵ Kvgonv lvngtak aolo hopvto, hoka kvdw miang go dooto. Amw v Vjakgobv boksu dato, ogulvgavbolo kvdw v rungrwng mato. ⁶ Vbvrilita vdww doonyi v chaalin tokudw, agar anga kaayok toku; ogulvgavbolo miamiv rungrwngbv harlwk madvto, agar angv baapubv sinyok toku. ⁷ Amw kvgonv mootum tv pvdwng lo hopvto, hv singlin toku, singnv vdww hum yuvtwngpatoku. ⁸ Vbvrilita amw kvgonv alvnn kvdw lo holwk toku, okv radv vdww svngla dape pelin lakula; kvgonv chaam bv, kvgonv chamkvbw okv kvgonv lwnngobv lintoku.”

⁹ Okv Jisu minyabv minto, “Tvvtoke, nonuno nyarung doodu bolo!”

Minchisinam gv lvkwnng ngv
(Mk 4:10-12; Lk 8:9-10)

¹⁰ Vbvrikunamv lvbwlaksu vdwv Jisu gvlo aala tvvkato, “No nyi vdwa gaam minrinyi ogubv minchisinam minvla mindunv?”

¹¹ Jisu mirwkto, “Nyidomooku gv Karv gv lvga nga nonua minji ropvkunv, vbvritola bunua minji madv. ¹² Yvvnyi hv ogugo doodunv hum jitamre, ninyia kaiyayabv doomu kunam lvgabv; vbvritola yvvdw oguka kaama dunv ninyigv achukgo doonam haka dvrit reku. ¹³ Ngoogv bunua minchisinam minvla minam gv lvga ngv bunu kaagapdo, vbvritola kaapama, okv bunu tvvdu, vbvritola tvvpama okv chima. ¹⁴ Vkvlgabv Aijaya gv nyikrw kaanam hv bunua mindu:

‘So nyi vdwa si tvvdu okv tvvdu vbvritola tvchinma;

bunu kaadi kaadidu, vbvritola kaapa ma,

¹⁵ ogulvgavbolo bunugv haapok vdwv pvcha nyapv,

okv bunugv nyarung nga mvtum sinyapv

okv bunugv nyik a nyikching sinyapv.

Vbv mvmabolo bunugv nyikkv kaapare,

bunugv nyarung ngv tvvpare,

bunugv haapok v chiri kunvpv,

okv bunu nga dakrwk reku, Pwknvyarnv mindu,

okv bunua ngo mvpu pvku nvpv.’

¹⁶ “Nonu gvbvdv vdwo go gamdakpv! Nonugv nyik v kaapadu, nonugv nyarung ngv tvvpadu.

¹⁷ Ngo nonua jvjv bv mindunv, nyijwk achialvgo okv Pwknvyarnv gv pakbu achialvgo, nonugv

kaagv dvnam a kaadubv mvngyato, vbvritola bunu kaapama, okv nonugv tvvgv dvnam a tvvdubv mvngnyato, vbvritola bunu tvvpa riakuma.

Jisu amw chinv minchisinama minbwk jito
(Mk 4:13-20; Lk 8:11-15)

¹⁸ “Vbvrikunamv, tvvria nyato, okv chinlaka amw chinam minchisinam si ugu vdw. ¹⁹ Yvvdw Pwknvyarnv gv Karv gv doin a tvvgv rila hum tvvchin madunv hv lamtvlo amw hoolunv jvbv ridunv. Bunu gvlo amw chilwk nama uyu vrammv aala dvrit dunv. ²⁰ Amw v lvngtak aolo hopvnnv nvngv hobunua mindunv doin a tvdanam gula himpula torwk sinv vdwa. ²¹ Vbvritola bunu ho rungrwngbv miami hv harlwk madu, okv bunu doobwng jinv gubv rikuma. Vkvlv-gabv vdwlo doin gv lvkwngbv adwkaku vmalo mvdwkmvkuv aari kudw, bunu vjakpi gubv topu riku. ²² Amw v tvv pvdwng gulo holwknvngv hobunua mindunv doin a tvgvvila; vbvritola ninyigv singdung lvgabv mvngrula, okv nyitvnyigam lvgabv mvngbiu namv doin ha yuptoku, okv bunu apw asi svvlin kuma. ²³ Okv amw hv alvnnv kvdw lo chilwk kunam hv ho bunua mindunv yvvdw doin ha tvvgvila hum tvchin dunv; apw asi svvlin dunv, megonv chaam bv, kvgonv chamkvbv, okv kvgonv lvngbv bv.”

Vvng vdwa minchisinam

²⁴ Jisu bunua kvvbi minchisinam go minjito: “Nyidomooku gv Karv ngv svbv ridunv. Nyi ako ninyigv rongolo alvnnv amw a chilwkto. ²⁵ Ayu yupgolo, mvnwngnga yupmu tvla, nyimak ako

aala vvng amw mego ampu apumlo paklwk pila vngyu toku. ²⁶ Vdwlo agar hv garlin tokudw anw hv paalin raptoku vbvrikunamv vvng nga kaapa raptoku. ²⁷ Nyi hvkvgv pakbuw aala ninyia tvvkato, 'Atu, no gv rongolo no amw alvnn vkv paklwk pvvv; vvng ngv ogolo lokv aapvvvdw?' ²⁸ Nw mirwksito, 'Nyiru nvgonv hum ripv.' Bunu ninyia tvvkato, 'No ngonua vngla vvng nga bulin svgo vla mvngdure?' ²⁹ Nw mirwksito, "Ma, nonuno vvng nga bulin rinyi ampu ngaaka butak linjila. ³⁰ Vvng hala ampu nga bunyia lvkobv svngba rimutvka Nvvkumdw lobv. Vbvrikunamv ngo nvvkum jinv vdwa vvng nga naakum chotokv, puching tvkv, ramyok tvkv vla minre, okv ampu nga nvvkumla ngoogv nesunglo baglwk laka vla minreku.' "

Yingmw lo minchisinam
(Mk 4:30-32; Lk 13:18-19)

³¹ Jisu bunua kvvbi minchisinam akodv mindvto; "Nyidomooku gv Karv ngv svbv ridunv. Nyi ako yingmw chargo naalaila ninyigv rongolo hum paklwk to. ³² So si amw mvnwngnga charching yachoknv, vbvritola vdwlo hv svngrap tokudw, hv tamitasa mvnwngnga kaiyachok nvgobv ritoku, hv singnv gubv ritoku, vbvrikunamv pvta mvnwngngv aala ho gv hakbv dvdvlo asup mvlwkla doonya toku."

Vpap a minchisinam
(Lk 13:20-21)

³³ Jisu bunua vjaklodvbbv minchisinam go minji jidvto: "Nyidomooku gv Karv ngv vbbv ridunv. Mvvga ako vpap naala okv hum moida ata

keji champigo naala pvchwng lo mvyomvchidu goochama dvdvlovb.”

Jisu minchisinam lokv minvnto

(Mk 4:33-34)

³⁴ Jisu minchisinama minv nvla ogumvnwngnga nyipam a minjito; Nw minchisinama mintak mabv bunua ogugoka mimato. ³⁵ Nw gv svbvrinam si nyijwk gv minpv nama jvjvrv rilin modukubv rito,

Vdwlo ngo bunua gaam minridw ngo minchisinam minv nvla minre;

Ngo bunua krim Sichingmooku sam pwklinyarlin rilokv naala vjak lov chima nama minjire.”

Jisu vvng vdwa minchisila minam a minbwk jitoku

³⁶ Vdwlo Jisu nyipam a vngyula naam lo aato kudw, ninyigv lvbwlaksu vdww nw gvlo aala tvvkato, “Tamsarnv, noogv rongo vng nga minchisila minammv ogu hvdw ngonua minjilabv.”

³⁷ Jisu mirwksito, “Alvnn amw chilwkkunv nyi angv si Nyia Kuunyilo ngv; ³⁸ rongo ngv nyiamooku si, alvnn amw v Karv gv nyi vdww; vvng ngv Alvmanv Angv gv nyi vdww; ³⁹ okv vvng amw a chilwknv angv Uyudvrv. Nvvkumdw aluv nyiamooku gv ataranya ngv, okv nvvkumrianv vdww nyidogindung ngv. ⁴⁰ Vvng nga oguaingbv nvvkumla vmvlo ramyok dvdw, vkv aingbv rire nyiamooku gv ataranya alulo;

⁴¹ Nyia Kuunyilo ngv ninyigv nyidogindung vdwa vnglin more ninyigv Karv lokv, yvvbunudw

nyi vdwa rimur modunv, okv kvvbi alvmanv ridunv, ho vdwa naakum more,⁴² okv bunu vdwa achialv bv vmv gukulo bunu orlwk reku, hoka bunu kapriku okv bunugv hijung nga kotwkkwrwk sila dooreku. ⁴³ Vbvrikunamv Pwknvyarnv gv nyi vdvw bunugv Abu gv Karv lo doonyi ungnam aingbv rireku. Vbvrikunamv nonuno nyarung gvdu nvlo tvvria laka!

Yikungyira vvs i nama minchisinam

⁴⁴ “Nyidomooku gv Karv ngv svbv ridunv. Nyi akonv rongo gulo yikungyira vvs i namgo kaapa toku, hum nw lvkodv mvtum toku okv himpu puyingla vnglaku ninyigv ogumvnwngnga piokla kula okv vngkur laku ho gv rongo nga rvvtoku.

Svngtor singku nga minchisinam

⁴⁵ “Nyidomooku gv Karv ngv svbv rita dunv. Nyi akonv svngtor singku kaapunv makar dubv rito, ⁴⁶ okv vdwo nw kaapuyaung nvgo kaapa tukudw, nw vnglaku ogugo svnggvrigrv pvkudw mvnwngnga piokla kula ho gv svngtor singku nga rvvtoku.

Vsap a minchisinam

⁴⁷ “Nyidomooku gv Karv ngv svbvka rita dunv. Ngui naanv nyi megonv bunugv vsap a svparsv lv lo orlwk nyala nvgwngnv ngui vkv naanyato. ⁴⁸ Vdwlo vsaplo yarbing tokudw, bunu hum agum lo svvlin toku okv dootung nyatola ngui a darpin sidula: alv nvnga bunugv pvtak lo lwkto okv alvmanv vdwa ora nyatoku. ⁴⁹ Ataranya alu lo vbvching rireku: nyidogindung ngv vnglin nyala alvnnv nyi vdwg v apum lo alvmanv nyi vdwa

naakum riku ⁵⁰ okv bunua achialvbw vmv guku lo orlwk reku, hoka bunu hijung nga kotwkkwrwk sila dooreku.

Jvjvnnv anw okv akuaram

⁵¹ Jisu bunua tvvkato, “Nonuno so vdw sum tvvchinpvri?”

Bunu “vkv” vla mirwksito.

⁵² Vkvlgabv nw bunua mirwkto, “Vbvriku-namv so gv minam si Pvbv tamsarnv mvnwngngv Nyidomooku gv Karv lo lwbwlaksu bv rikubolo, hv bunu naam atuv ninyigv karchung gv yikungyira nga aku jeka anw jeka lvkobv naalinnv atu jvbv ridu.”

Jisunyi Najaret lo toa toku

(Mk 6:1-6; Lk 4:16-30)

⁵³ Vdwlo Jisu so gv minchisinam sum bunua minjila minya tokudw, nw ho mooku a vngyu toku

⁵⁴ okv ninyigv banggu lo vngkur toku. Nw jius kunkunaamlo tamsar toku, okv nw gvlo tvvnnv vdwv tvngarvnga nyatoku. Bunu tvvkato, “Nw svkvnv mvngkimvnglak kv ogolo paapv nvyu? Okv ninyigv lamrwpanam rinam v oguvkudw?”

⁵⁵ Nw yikungyira mvnv gv kuunyilo mangvri? Meri ninyigv anv mangvri? Okv Jems, Josep, Saimon, okv Judas bunu ninyigv boru mangvri?

⁵⁶ Ninyigv bormv vdwv so dooma dvnvdw? Nw so mvnwng sum ogolokv paapv nvyu?” ⁵⁷ Okv vbv bunu ninyia toa nyatoku.

Jisu bunua minto, “Nyijwk ka ninyigv banggu naam lo okv nw atugv vpin nyi ngv mvngdv madunv, vbvritola mooku mvnwnglo mvngdv

nama paayadunv.” ⁵⁸ Ogulvgavbolo bunu mvngjwng namgo kaama, okv nw hoka achialvgo lamrwpanam goka riji mato.

14

*Jon baptist gv sikunam
(Mk 6:14-29; Lk 9:7-9)*

¹ Hvbv riri hoka Galili nga rigvdogvnu Herod, Jisu gv lvkwng nga tvvpa toku. ² “Nw jvjvbu Jon Baptist turkur pvku nvgo vla ninyigv nyigam vdwa minto. “Vkvlgabv nw lamrwpanam ridubv jwkrw doopvnu.”

³ Kvlokvcho Herod Jonnyi naatungla leetola patwk tumdubv orto jitoku. Nw gv svbvrinam si ogulvgavbolo ninyigv boru Pilip gv nywng Herodias gv lvgalo. ⁴ Lvkogulo Jon Baptist Herodnyi minto, “Noogv Herodiasnyi nywng mvnam si mvyin madunv!” ⁵ Herod ninyia mvkidubv mvngto, vbvritola Herod Jius nyi vdwa busuto, ogulvgavbolo bunu Jonnyi nyijwk akobv mvngnyato.

⁶ Herod gv nvlum dvdw alulo Herodias gv kuunyijar angv nyi mvnwng gv kaagialo kaapu alvbv naasi rijito. Herod achialvbv himpula ⁷ nw ninyia milv jito, “Ngo jvjvbu milv jidunv no ogugo koopvdw hum jirungre!”

⁸ Hv ninyigv anv gv minkulo, vbv minto, “Ngam so vjak Jon Baptist gv dumpo nga kumpok gulo jilabv!”

⁹ Dvbv ngv mvngruto, vbvritola ninyigv nyi mvnwng gv tvvgia kaagialo milvkunam lvgabv

nw nyijar gv mvngnam ma jidukubv orto jilin toku. ¹⁰ Vkvlgabv nw Jon gv dumpo nga patwklo paalin toku. ¹¹ Dumpo nga kumpok gulo bvnglwkw toku okv nyijar anga jitoku, hv ninyigv anv gvlo bvnglwkw jitoku. ¹² Jon gv lwbwlaksu vdwv aatoku, ninyigv svma nga bakro toku okv hum nyibung ritoku; vbvrikunamv bunu vnglaku Jisunyi minpa jitoku.

*Jisu hejar angu nyi vdwa dvnam dvmu toku
(Mk 6:30-44; Lk 9:10-17; Jn 6:1-14)*

¹³ Vdwlo Jisu Jon gv lvga yunying nga tvvpa tokudw, nw atuv hoka kongv vngyula jvmataiku mooku lo vngtoku. Nyi vdww hum tvvpa tvku, vkvlgabv bunu banggu a kayu pikula lvpabv kvdw lo ninyigv kochingbv vngming gvtoku. ¹⁴ Jisu svpw lokv lintoku, okv vdww nw nyipam pamtv nga kaato kudw, ninyigv haapok v bunua aya mvngpa toku, okv nw lvvmanv vdwa mvpu jitoku.

¹⁵ Ho arium hoka ninyigv lwbwlaksu vdwv nw gvlo aala minto, “So si achialvgo ayung pvku, okv so si jvmataiku mooku go. Nyi vdwa vngmu tvkuka okv bunua atuv nampum lo vngla dvnamtvngnam rvvsu motoka.”

¹⁶ Jisu mirwkto, “Bunu vngsv kaama, nonuno atu v bunua dvnamtvngnam jirung svgo!”

¹⁷ Bunu mirwksito, “Ngonu mvnwng gv aralo vtwng tangu gula ngui nvvnyi gomwng kv.”

¹⁸ Jisu minto, “Vbvrikunamv hum soka ngoogvlo bvnglwkwto.” ¹⁹ Nw nyi vdwa vvng aolo dootung dubv minto; vbvrikunamv nw vtwng tangu hala ngui nvvnyi ha naatoku, nyidomooku

aobv kaadungto okv Pwknvyarnvnyi umbonyikv hvto. Nw vtwng nga pintungpiungto okv hum lwbwlaksu vdwa jitoku, okv lwbwlaksu vdvw hum nyi vdwa jitoku. ²⁰ Mvnnwngngv dvgudvbw dvtoku. Vbvrikunamv lwbwlaksu vdvw dvlv nga paapi vring gola anyigo yarpok dubv naakum toku. ²¹ Hum dvnv ngv mvvga vmi ha kiya mabv nyiga dwdv ngv hejar angu to.

Jisu isi aolo vngkar toku
(Mk 6:45-52; Jn 6:15-21)

²² Vbvrikunamv vdwo ninyigv nyi vdwa vngmu rikulo Jisu lwbwlaksu vdwa svpw lo aamu toku okv svparsvlv gv taggo nvbv lincho modubv ritoku. ²³ Nyi vdwa vngmuro kochingbv nw atu hv kumdubv vla moodw gulo chaatoku. Vdwo arium pvkudw, hoka Jisu akin mwngto; ²⁴ okv hvbv riri hoka svpw v svparsvlv lo mego adubv vngtoku, doori v rikorla hum achialvbw riging kunam lvgabv, svpw v svkiok kioknam lokv kublwk tvvtoku.

²⁵ Aru gv gunta aom gvla akv gv pingkolo Jisu isi aobv vngla lwbwlaksu vdwgvlo aatoku. ²⁶ Vdwo bunu ninyia isi aobv vngdubv kaapa tokudw, bunu achialvbw busu nyatoku. Bunu busu nyala svgokla minto, “Si vram gumabv.”

²⁷ Jisu vjagobv bunua minto, “Mvngrw lakv!” si ngookv. Nonuno busu mabvka!” vla nw minto.

²⁸ Vbvrikunamv Pitar minto. “Ahtu, hv jvjv bv no vrungbolo, ngam isi aobv no gvlo vngdubv orto jikato.”

²⁹ Jisu mirwtko, “So aato!”. Vkvlgabv Pitar svpw agumbv linto okv Jisu gv kiambv isi aobv

vngrap toku. ³⁰ Vbvritola vdwlo kainv doori v ritokudw nw hum himpala busuto okv isi arwngbv holwk tvvto. “Ahtu ringla bvkv!” vla nw kapto.

³¹ Vbvrikunamv Jisu vjakgobv aachilaku ninyia gagbwng toku okv minto, “Noogv mvngjwng ngv miang mvngpv no ogubv tintinrorubv mvngdunv?”

³² Bunyi anyiv svpw lo aaba sutoku, okv vbvrikunamv doori v ringin toku. ³³ Vbvrikunamv svpw lo doonv lwbwlaksu vdwv Jisunyi kumtojotoku. Bunu hartvla minto, “No Pwknvyarnv gv Kuunyilo jvfv gurung.”

*Gennesaret lo Jisu lvvmanv vdwa mvpu jitoku
(Mk 6:53-56)*

³⁴ Bunu svparsvly nga vngbola Gennesaret vnam mooku lo aalwk toku, ³⁵ hoka nyi vdwv Jisunyi kaachin toku. Vkvlygabv bunu lvvmanv nyi vdwa mingo jinv vngmuto dokardovr mooku lo lvvmanv vdwa Jisu gvlo aagv modubv. ³⁶ Bunu ninyia koodwkkwvla koola minto, lvvmanv vdwa ninyigv vji jvlap a mvsit modubv; okv yvvbunudw mvsit pvkudw mvnwnngngv pooya nyatoku.

15

Abuapa vdwgv tamsarnam

¹ Vbvrikunamv Parisis mego okv Pvbv tamsarnv mego Jerusalem lokv Jisu gvlo aala okv ninyia tvvkato, ² “Noogv lwbwlaksu vdwv ogulvgabv ngonugv abuapa vdwgv Pvbv jilu nama tvvmarima dunv? Bunu dynam dvtv madvbv laakka alvbv lasoklakak madu!”

³ Jisu mirwk suto, “Okv nonuno ogulvgabv Pwknvyarnv gv gamrw nama tvvmarima gvrila nonunogv mvnggwngbv tamsarrisar kolo vngya dunv? ⁴ Ogu lvgv Pwknvyarnv mindu, ‘Noogv anv okv abunyi mvngdv laka,’ okv ‘Yvvdw ninyigv anv okv ninyigv abua beedunv hum mvkidubv riduku.’ ⁵ Vbvrítola nonuno tamsardo nyi gunv ninyigv anv okv abua ridurdubv ogugo doopv tvlaka, vbvrítola minre, ‘Si Pwknvyarnv gvbv ripvkunv,’ ⁶ hv ninyigv abua* mvngdv dubv dinchi kumadu. Svvrila nonu Pwknvyarnv gv gamrw nama pakma dunv, nonugv mvngkubv tamsar kolokv riming gvnam lvgabv. ⁷ Kaakudubvrinv nonu, Aijaya gv nonunogv lvgabv nyikrw kaapv namv jvjv rungvp!

⁸ “Pwknvyarnv mindu, “So nyi vdw si nga gamchar lokv mwng hartv mvngdo, vbvrítola bunugv haapok v jvjvbv nga adu nyado.

⁹ Bunugv nga vbv kumnamjonam v ogu arin go kaama, ogulvgavbolo bunu nyi gv mvnam pvbv nga ngoogv Pvbv aingbv tamsar nyadu!”

Nyi a darwk momanv oguogu

(Mk 7:14-23)

¹⁰ Vbvrikunamv Jisu nyipam ma nw gvlo gokl-wkto okv minto, “Tvvgv rila okv chintoka! ¹¹ Nyi gv gaam lo aanv ngv ninyia darwk madubv

15:4 Mog 20:12; Det 5:16; Mog 21:17; Leb 20:9 * **15:6** bunugv abu; Lvkchonam lo si doma bunugv abu vmaló anv **15:8** Aij 29:13

mvvma dunv; vbmabvya, ninyigv gaam arwng lokv linnv ngv ninyia darwk madubv mvya dunv.”

¹² Vbvrikunamv lwbwlaksu vdww nw gvlo aala minto, “Noogv minamv Parisis vdwa tvvnying modu vla no chindure?”

¹³ “Ngoogv Abu nyidomoku tolo doonv gv lvvlwk manam singv mvnwnngnga bua rikunv,” vla Jisu minto. ¹⁴ Bunugv lvgabv mvngru yama bvka! Bunu nyikching tola nyikchingnv nyi vdwa rigv nvngv; okv vdwo nyikchingnv akonv kvvbi nyikching nvnga vnggv rinyi, anyiv ungrung golo holwk dunv.”

¹⁵ Pitar milinto, “So minam sum ngonua minbwk jilabv.”

¹⁶ Jisu bunua minto, “Nonuno vjaklodvbw kvvbi vdwa chilv yanv gubv rima pvnvre. ¹⁷ Nonuno tvchinma hai? Nyi gv gaam lo aanv ngv leit arwnglo aadunv okv vbvritokula ayak lokv agum lo lindu kunv. ¹⁸ Vbvritola gaam lokv linnv ngv haapok lokv lindunv, okv si nyi nga darwk madubv mvdunv. ¹⁹ Nyi gv haapok lokv alvmanv ngv linla ninyia mvki mvmar modunv, yoogio modunv, okv kvvbi rimur haka rimu dvnv; dvrit mola, mvvmula, okv kvvbia minsingmia mola. So vdww si nyi a darwk madubv mvdunv. ²⁰ Vbvritola nonugv laak lasok mabv dvnam, bunugv nonua rirung svgo vla minam-si nyi nga darwk madubv mvvma dvnv. “Vbvritola bunugv rirung sego vla mvngnam—Lasok mabv dvku lokv nyi si darwk-manv gubv rima dunv.”

*Mvvga akogv mvngjwng
(Mk 7:24-30)*

²¹ Jisu ho gv mooku a vngyu toku okv Taire okv Sidon gv nvchi mooku lo vngtoku. ²² Kananait mvvga ako ho mooku hoka doonvgo nw gvlo aato. Mvvga nvngv kapla minto, “Dabid gv Kuunyilo! Ngam aya mvngpa labv, tamsarnv! Ngo gv kuunyijar v uyuvram gvpv okv nw achialvbv hiru kaayala doopv.”

²³ Vbvrítola Jisu nyimv nvnga gamgo ka mímato. Ninyigv lwbwlaksu vdwv nw gvlo aala kodwkkwklá koola minto, “Ninyi vngmu tvkuka! Nw ngonua vngming gvla tvvsupkayap dubv minkidu!”

²⁴ Vbvríkunamv Jisu mirwk suto, “Ngam Israel gv svlar nyekunv vdwgv lvgabv vngmupvnv.”

²⁵ Hvbv rinam gula mvvga nvngv Jisu gv lvpa lo gublwk dvla minto, Tamsarnv, nga ridur labv!”

²⁶ Jisu mirwkto, “Vmi gv dtung nga naaritla iki bv orji nam si alv rungma.”

²⁷ “Tamsarnv, hv jvjv ngv” vla nyimv nvngv mirwksito; vbvrítola iki vdwv atu gv dvkulo dva nama tvbul lkwng loka dvria dunv.”

²⁸ Vklvgabv Jisu mvvga nvnga mirwkto, “No kaibv mvngjwngnv nyimv go! No ogugo rijilabv vla mvngdudw hum noogv lvgabv riji reku.” Okv hvbv mímisiri hoka ninyigv kuunyijar hv poya toku.

Jisu nyi lvmánv achialvgo mvpu jitoku

²⁹ Jisu ho gvngv vnglaku Galili gv svparsvlv kiambv vngtoku. Nw moodw gulo chaala dootung toku. ³⁰ Kairungnv nyipam go nw gvlo aato,

bunugv lvkobv lvpiknv vdwa, nyikchingnv vdwa, digwngnv vdwa, pvchanv vdwa, okv kvvbi lvvmanv nyi vdwa aagv nyato, ho bunua Jisu gv lvpa lvkwnglo vvpv nyato; okv nw bunua mvpu jinya toku. ³¹ Nyi vdww lamrwpanya toku pvcha nvngv milin nama, digwngnvgv alvkunam a, lvpik nvngv vnglak kunama, okv nyikching nvngv kaapa kunama, kaagv rikula bunu Israel gv Pwknvyarnv nga hartv nyatoku.

*Jisu hejar api nyi vdwa dvnam jila dvmu toku
(Mk 8:1-10)*

³² Jisu ninyigv lvbwlaksu vdwa goklwk toku okv minto, “Ngo so gv nyi vdww sum aya mvngpa do, ogulvgavbolo bunu nga reming gvkunamv alu loom pvku okv vjak bunu ogu dvsv guka kaakuma. Ngo bunua dvnam dvmu mabv vngmu nwngmado, bunu nampum lo vngtvrikunyi lamtvlo anyukumare.”

³³ Lvbwlaksu vdww ninyia tvvkato, “Ngonu ogulo dvnam naala so gv nyipamma dvgudvbbv jinyure?”

³⁴ Jisu tvvkato, “Nonuno hvkamgo vtwng gvpv?”

Bunu mirwksito, “Vtwng takkanw go okv ngui charchingnv mego.”

³⁵ Vklvgabv Jisu nyipamma kvdw lo dootung dubv mintoku. ³⁶ Vbvrkunamv nw vtwng kanw hala ngui a naatoku, Pwknvyarnvnyi umbonyikv vto, pintung piyung toku, okv hum lvbwlaksu vdwa jitoku; okv lvbwlaksu vdww hum nyi vdwa hortoku. ³⁷ Bunu mvnwnngv dvgudvbbv dvnnya toku. Vbvrkunamv lvbwlaksu vdww dvlv dvkv lvlin kunamma paapi kanw go yarpok dukubv

naakum toku. ³⁸ Hum dvnv dvdv ngv mvvga vmia kiya mabv nyiga dvdv ngv hejar api gubv ritoku.

³⁹ Vbvrikunamv Jisu nyi vdwa vngmu toku, svpw gulo nw aatoku, okv Magadan mooku lo vngtoku.

16

Lamrwpanam go koonam

(Mk 8:11-13; Lk 12:54-56)

¹ Parisis megola Sadusis mego bunu Jisu gvlo gwngkup dubv vla aanyato, vkvlgabv bunu Jisunyi Pwknvyarnv gv kiinam gurung vla kaadubv lamrwpanam go ritokv vla tvvkato.

² Vbvritola Jisu mirwkto, “Vdwlo doonyi v poklwk tvi kunyi, nonu mindu, ‘Ngonu alvnnv doonyi a paato kuji, ogulvgavbolo nyidokolo ngv yalwng dooku.’

³ Okv arukamchinyi nonu mindu, ‘Silu nyido hoi jinvgo, ogulvgavbolo nyidokolo ngv yalwng yakia bv ridu.’ Nonu nyidokolo nga kaagvrila minbwk jichodu, vbvritola nonu vdwloka vjakgv lamrwpanam gv lvkwng nga minbwk jinyu ma!*

⁴ Vdwgo alvmabv okv Pwknvyarnv chimanv nyi bv ridu silugv nyi vdwa si! Nonu nga lamrwpanam go koodu nvre? Ma! Nonua lamrwpanam go jijinam si Jona gv lamrwpanam rijinam vmwng.”

Vkvlgabv nw bunua kayu pikula vngyu toku.

Parisis vdwa gvla okv Sadusis vdwgv vpap

(Mk 8:14-21)

16:1 Mt 12:38; Lk 11:16 * **16:3** Meegonv kvvbi kitap lo Jisu gv gamchar vdwa so bars 2-3 lo domado **16:4** Mt 12:39; Lk 11:29

⁵ Vdwlo lwbwlaksu vdww svparsvlv gv takdv gonvlo raptu kudw, bunu vtwng gvse nga mvngpa mato. ⁶ Jisu bunua minto, “Hinsu laka; Parisis gvla Sadusis gv vpap am hima kaaya sulaka.”

⁷ Bunu bunugv aralo raami surap nyato, “Ngonu vtwng gvmanam lvkwngbv nw vbv mindu.”

⁸ Jisu chinto bunu ogugo minpvdw, vkvlgabv nw bunua tvvkato, “Nonu vtwng gvmanam lvkwngbv ogubv raami sikwng dunv? Nonunogv mvngjwng ngv achok gomwng! ⁹ Nonuno vjvlodv bv chima dunvre? Nonu ngoogv vtwng tangu ham nyi hejar angu lvgabv pintung piyung nama mvngpama ai? Paapi hvkamgo nonu darbingpvnv? ¹⁰ Okv nyi hejar api gv lvgabv vtwng takkanw gv lvkwng ngv oguv? Paapi hvkamgo nonuno darbingpvnv? ¹¹ Ngoogv vtwng gv lvkwng nga nonua gaam raami suma nama nonugv chima namv hv ogubv ripnv? Hima kaaya sulaka Parisis gvla Sadusis gv vpap ham!”

¹² Vbvrikunamv lwbwlaksu vdww Jisu bunua, Parisis gvla Sadusis gv vtwng lo lwknam vpap ham hima sulakv vla gamrw kumanyi, vbvritola bunugv tamsar nama mindukunvnyi vla chintoku.

*Jisu yvvdw um Pitar gv milin kunam
(Mk 8:27-30; Lk 9:18-21)*

¹³ Jisu Pilippi gv Sijari bangga gv nvchi mooku lo vngtoku, hoka nw ninyigv lwbwlaksu vdwa tvvkato, “Nyia Kuunyilo nga, nyi vdww yvv vla minya do?”

14 “Nyi megonv Jon Baptist kv vla minya do,” vla bunu mirwkto. “Kvvhiv Elija kv, okv kvgonv Jeremia kv vmalo kvvbi nyijwk go vla minya do.”

15 Nw bunua tvvkato, “Nonu gvbv oguv? Okv nonu ngam yvv vla mindunv?”

16 Saimon Pitar mirwksito, “No Kristo, turla doobwngnv Pwknvyarnv gv Kuunyilo ngv.”

17 Jisu mirwkto, “Jon gv kuunyilo Saimon, no alvrungnv go! no gvlo so gv jvjv si nyi gvlokv aama, vbvritola naam sum ngoogv Abu nyido tolo doonv ngv jipv. 18 Okv Pitar, vkvlgabv ngo naam mindunv: No vlvng go, okv so gv vlvng aolo ngo, ngoogv Gvrja nga mvlwkre, okv sinam ngenam v sum vdwloka rigumriya yala mare. 19 Ngo naam Nyidomooku Karv gv chabi nga jidunv; noogv nyiamooku so maakv vnam a nyido mooku tolo maakv vreku, okv no ogugo nyiamooku so umkv vnam a nyido mooku toloka umkv vreku.”

20 Vbvrikunamv Jisu ninyigv lvbwlaksu vdwa mintoku nw Kristo kv vla yvvnyika minji mabvka.

*Jisu ninyigv hinchingchingla sise nga mintoku
(Mk 8:31-9:1; Lk 9:22-27)*

21 Ho gv alu lokv Jisu ninyigv lvbwlaksu vdwa mindamirala minpa jirap toku, “Ngo Jerusalem bv vngrungre okv nyigagaatv, nyibu butvny, okv Pvbv tamsarnv vdw gvlokv hinching chingnam ma paarungre. Nga mvki nyareku, vbvritola alu loom kochinglo ngo turkur reku.”

²² Pitar ninyia sesum laila yamla minto, “Ahtu, Pwknvyarnv sum noogv lokv adu motoka, no gvlo si vdwloka rimare!”

²³ Jisu dakkur dakrwk dukula Pitarnyi minto, “Uyu no, ngo gvlokv vngroto! No ngoogv lamtvlo atop asi yanv gubv rido, ogulvgavbolo no gv svbv mvngnam si Pwknvyarnv gvlokv aama vbvritola nyi gvlokv aanv go.”

²⁴ Vbvrikunamv Jisu ninyigv lvbwlaksu vdwa mintoku, “Yvvdw nga lvkobv vngming gvso mvngnv ngv, hv atubongv mvngnga sirung laka, ninyigv rvngko nga bagtola, nga vngming gvlaka. ²⁵ Yvvdw atubogv singdung lvgabv mvngdunv, hv ngooriku; vbvritola yvvdw ngoogv lvgabv ninyigv singdung nga ngoomu dunv hv singnam ma paaya reku. ²⁶ Nyi gunv nyiamooku mvnwngnga paalv yagvre vbvritola nw atubogv yajiyalua ngoomu bolo, hv ogugo paabin yapv? Hvbv ma! Nw vdwloka ninyigv turnamam paakor kunam lvgabv oguguka nw jinyu kumare. ²⁷ Nyia Kuunyilo ngv ninyigv Abu gv jwkrw lokv nyidogindung nga lvkobv aagvla aareku, okv vbvrikunamv nw akin-akin a kaigo ripvdw ma miang go ripvdw hum kaala amina jireku. ²⁸ Ngo nonua jvjvbv mindunv ho-hoka mego si doopv bunu Nyia Kuunyilo gv Dvbv bv rila aanama kaama dvdvlo simare.”

17

Jisu ayak akuavnam
(Mk 9:2-13; Lk 9:28-36)

16:24 Mt 10:38; Lk 14:27 **16:25** Mt 10:39; Lk 17:33; Jn 12:25

16:27 Mt 25:31; Miri 62:12; Rom 2:6

¹ Alu lokv gv kochinglo Jisu Pitar nyila achiboru Jems okv Jon bunua moodw aolo chaagvla hoka bunu mwngchik doobam nyato. ² Bunugv vbv kaadung rilo, Jisu gvlo akusubv rilwkto: Ninyigv nyukmuv doonyi loung jvbv ungtoku okv ninyigv vjiv yapung toji toku. ³ Vbvrikunamv lwbwlaksu aom v Moses nyila Elija bunyia Jisunyi lvkobv gaam raami sidubv kaatoku. ⁴ Vkvlgabv Pitar Jisunyi mintoku, “Ahtu, ngonugv soka doonam si alv rungnvgo! No mvnggelo, ngo soka taabio aom go mvre, akonyi no gvbv, akonyi Moses gvbv okv akonyi Elija gvbv.”

⁵ Ninyigv vbv mindung rilo, haapum ungnv go bunu gvlo aalwkto, okv haapum lokv gaamgo milinto, “Si ngoogv pakyachoknam Kuunyilo ngv, nw gvlokv ngo mvngpu dunv-Ninyi tvvria laka!”

⁶ Vdwlo Lwbwlaksu vdwv vlv nga tvvtokudw, bunu achialvbv busula kvdw lo gipv nyatoku. ⁷ Jisu bunu gvlo aala bunua mvsit toku. Nw minto, “Gudungto, busu mabkv!” ⁸ Vkvlgabv bunu kaarap toku nyi kaapa kuma vbvritola Jisu akin mvngku.

⁹ Vbv bunugv moodw lokv idung rilo, Jisu bunua orto jitoku, “Nyia Kuunyilo ngv sipi kula turkur kuma dvdvlo, nonunogv nyikrw kaanam sum yvnyika minji mabvka.”

¹⁰ Vbvrikunamv lwbwlaksu vdwv Jisunyi tvvkato, “Ogulvgabv Pvbv tamsarnv vdwv hoka Elija aacho yinv pvkv vla mindunv?”

¹¹ “Elija aanam gvbv aachore, okv nw ogumvngwng nga mvpvripv jireku,” vla Jisu mirwk toku.
¹² Vbvritola ngo nonua jvjvbw mindu, Elija aaro pvkunv, okv nyi vdww ninyia kaachin mato, vbvritola bunugv mvnggwng bv mvmin nyatoku. Ho mvpia bv bunu Nyia Kuunyilo ngaaka vbv alvmabv mvreku.”

¹³ Vbvrikunamv lwbwlaksu vdww tvchin toku nw Jon Baptistnyi mindu kunvgv vla.

*Jisu vmiyapa uyuvram gvnvgo mvpv toku
 (Mk 9:14-29; Lk 9:37-43a)*

¹⁴ Vdwlo bunu nyipam vdwgvlv aalwk tokudw, nyi ako Jisu gvlo aala, lwbwng kumpvla, ¹⁵ okv minto, “Tamsarbo, ngoogv kuunyilo nga aya mvngpa jilabv! Nw svmik tapdu, okv vbv alvmabv kamdaramda bv rila vmvlo okv isi lo poklwk kidu. ¹⁶ Ngo ninyia noogv lwbwlaksu vdwgvlv aagv jito, vbvritola bunu ninyia mvpv nyuma.”

¹⁷ Jisu mirwk toku, “Nonu achialvbv mvngjwngmanv nyi gonya laka! Vdwgo ngo nonua lvkobv doodubv? Vdwgo ngo nonua mindinmimbia dvdvdubv? Vminyilo nga ngoogvlv aagvto!” ¹⁸ Jisu uyuvram a orto jitoku, okv hv vminyilo gv lokv kelin toku, okv vjakpi gubv vmi angv ho poya datoku.

¹⁹ Vbvrikunamv lwbwlaksu vdww vngsila Jisu gvlo aala tvvka toku, “Ogubv rila ngonu uyuvram a charlin nyuma pvnv gubvri?”

²⁰ Jisu mirwkto, “Hv nonuno mvngjwng doomanam lkwngbv, ngo nonua milv jidunv,

nonuno yingmw aing goka mvngjwng dubolo, nonu so moodw sum minlado sokv kongv alo vlo vngroto vbolo, hv tvvla vngjire. Nonu ogumvwnwng nga rinyure!” * ²¹ Okv kvvbi lokv rinyu mare kumnam lokvla okv yiknam lokv svkv nvnga charlin nyure.”

Jisu ninyigv sise lvkwng nga lvkodv mintoku
(Mk 9:30-32; Lk 9:43-45)

²² Vdwlo lwbwlaksu mvnwngngv Galili lo aakum tokudw, Jisu bunua mintoku, “Nyia Kuunyilo nga nyiga vdwgvlo laklwk tvduku ²³ bunu ninyia mvki reku; vbvritola alu loom kochinglo nw turkur reku.”

Lwbwlaksu vdwv achialvbw mvngru nyatoku.

Pwknvyarnvnaam lvgabv lampu jinam

²⁴ Vdwlo Jisu la okv ninyigv lwbwlaksu vdwv Kaparnaum lo aato kudw, Pwknvyarnvnaam lvgabv lampu narianv Pitar gvlo aato okv tvvkato, “No gv Tamsarbo, Pwknvyarnvnaam lvgabv lampu a jidu nvri?”

²⁵ “Jidu nvpv,” vla Pitar mirwkto.

Vdwlo Pitar naam lo aatokudw, Jisu mincho yato, “Saimon, no gv mvngnam v ogubv? Nyia mooku so gv dvbv vdwa yvvla rijo naanv vmalo lampu jinv ngv? Diringmooku so gv nyi vdwv re vmalo nyebunyi vdwv re?”

²⁶ Pitar mirwk suto, “Kvvbi mooku lokv aanv nyi vdwv. Jisu minto, “Alvpv, vbvrikunamv,

* **17:20** Mego kvvbi kitap lo bars 21 sum lvktam do: Vbvritola kumnam mvngchik lokv vkv nvnga charlin nyure; ogu gunvka rinyu mare(Mk 9:29) **17:24** Mog 30:13; 38:26

vnam hv mannv nyidung nyi vdwv jikur kaama. ²⁷ Vbvritola ngonu so naarianv vdwa adwkaku molama. Vkvlgabv svparsvlv lo vngnyika, okv noogv karpak a soolwk ngurv tvka. Naachonam ngui a svvlin tvka, okv ho gv gaam lo noogvla ngoogv lvgabv Pwknvyarnvnaam lampu jisv lokdwng chargo kaapare. Hum naala ngonu gvbbv lampu jiji laka.”

18

Yvvla kaiyachoknv?

(Mk 9:33-37; Lk 9:46-48)

¹ Ho alu lo lwbwlaksu vdwv Jisu gvlo aala, tvvkato, “Nyidomooku gv Karv tolo yvvla kaiyachok jinv ngv?”

² Vkvlgabv Jisu vmi go gokla bunugv kaagialo dakmuto, ³ okv minto, “Ngo nonua milv jidunv vdwlo nonu mvngdinla so vmi so aingbv rima redw, nonu vdwloka Nyidomooku Karv tolo aala mare. ⁴ Yvvdw so vmi aingbv rila nyanyak dunv hv Nyidomooku gv Karv tolo kaiyachok nvgobv rireku. ⁵ Okv yvvdw svkvnv vmia ngoogv amin bv alvbv naarwk sidunv, hv ngamka naarwk sidunv.”

Pokayarka la rimur monv

(Mk 9:43-48; Lk 17:1-2)

⁶ “Yvv akonv so miangnv vdw sokv akonyi nga mvngjing nvnga mva riadunv, ho nyi angv vbvri-bolo alvyare ninyigv lvngpo lo vlwng pwktv nvgo paklwk sutola svmasa bolo poklwk sunam mv. ⁷ Achialvbv mvngru runam gubv rire nyiamooku

gv nyi vdwa ogulvgavbolo bunugv mvngjwng nga ngoomu jinv ngv achialvdu! Vkv nvngv lokia ribwngre-vbvritola yvvdw um bunua rimudunv hv achialvbv mvngru runam gubv rire!

⁸ “Noogv laak gunv vmalo lvpa gunv noogv mvngjwng nga mvlamva riadu bolo, hum palin gvrila ora tvka! noogv lvgabv hv alvyare tur-namlo laak vmalo lvpa gunv kaamabv vngnam mv, vbvmayabv laak laknyia okv lvpa lvnyia gv-tola vmv doobwngnv gula dookulo orlwk komam svnga. ⁹ Okv noogv nyik gunv noogv mvngjwng nga nyemu bolo, hum koolin gvrila ora tvka! Noogv lvgabv si alvyare no nyik nyikin tvvla singkulo vngnam mv, vmabvya nyik nyiknyia gv-tola uyumooku bolo orlwk komam svnga.

Svlar ngenam a minchisinam
(Lk 15:3-7)

¹⁰ “Kaatoka nonuno miangnv vdwa so gv akonyika mvngnyekalo mabvka. Ngo nonua mindu, bunugv nyidogindung ngv lokia nyidomooku lo doonv ngo Abu gvlo dooming gvnya dunv.* ¹¹ Nyia Kuunyilo ngv nyekunv vdwa ringlin tvkubv aapv kunv.

¹² “Nonuno ogugo mvngdu nyi ako svlar lvnggo dooto okv akonv nyetoku? Nw kvvbi chamkia gula kia nga moodw lo nvmwng dvla rimu pila, nw vngla nyenv anga makardu. ¹³ Vdwlo nw hum kaapa rekudw, ngo nonua mindu, nw nyenv akin ho lvgabv nyemanv chamkia gula akkia ngam

18:8 Mt 5:30 **18:9** Mt 5:29 * **18:10** Megonv kitap lo bars 11 sum lvktamdo: Nyia Kuunyilo ngv nyekunv vdwa makarla ringdukubv aapvvnv(Lk 19:10) **18:11** Lk 19:10

svnga achialv kaiyago mvngpu yareku. ¹⁴ So gv apiabv noogv† Abu nyidomooku tolo doonv so gv miangnv vdw so akonyika ngoomu dubv mvngma dunv.

Achiboru rimurnv

¹⁵ “Noogv achiboru ngv nam rinyingla rimur dubolo, vngla ninyigv rimur a kaatam laka. Vb-vritola um nonyi anyi gv pingkolo risila rila ka. Nw noogv minam a tvvdu boloka, no noogv achiboru a ria yaala paakor pvku. ‡ ¹⁶ Vb-vritola nw noogv minam a tvvma dubolo, no nyi lo ako vmalo anyigo noogv lvkobv vnggv laka, ogulvgavbolo Darwknv Kitaplo minam aingbv ‘Rimur mvnwngnga tvyakaayanv anyi aom lokv tvb-wkkalo dukubv.’ ¹⁷ Okv nw bunua tvvmabolo, ogumvnwngnga Gvrja lo minpa laka. Ataranyabv nw Gvrja gv minam haka tvvma kubolo, ninyia mvngjwng manv gubv vmalo rimurnv nyi gubv toa lakuka.

Tulwk kunam okv toa kunam

¹⁸ “Okv vkvlvgabv ngo nonua mindunv: nonu sichingmooku so ogugo maakv vrikudw hum nyido mooku toloka maakv vrikunv, okv nonu sichingmooku so ogu gonyi vkv vrikudw hum nyido mooku toloka vkv vriku.

¹⁹ “Okv ngo nonua minta jidunv: Vdwlo nonu sichingmooku so anyi gunv tolwk minsula ogugonyi kumridw, hum nonugv lvgabv ngoogv nyidomooku gv Abu ngv rijireku. ²⁰ Ogo lo anyi

† **18:14** Megonv kitap lo nonugvVmam sum ngoogv vdu **18:15**
 Lk 17:3 ‡ **18:15** Megonv kitaplo nonua rinyingrirudu **18:16**
 Det 19:15 **18:18** Mt 16:19; Jn 20:23

gunv vmalo aom gunv ngoogv amin bv dookum redw, ngo hoka bunua lvkobv dooming gvdunv.

Pakbu gv rimur a mvngnga nyumanam

²¹ Vbvrikunamv Pitar Jisu gvlo aatoku okv tvvkato, “Ahtu nga ngoogv boruv rinyingla rimur morbwng bolo, ngo ninyia vdwgo mvngnga jidubv? Kanw guri?”

²² Jisu mirwkto, “Ma, kanw mwngma, kanw hv chaamkanw lo gubv, § ²³ ogulvgavbolo Nyido-mooku gv Karv ngv svbv ridunv. Kvlokvcho dvbv ako dooto, nw ninyigv pakbu vdwgv narnamha kaaka dukubv mintoku. ²⁴ Nw vbv rirap kunam gula bunugv lokv pakbu ako, nw gvlo morko kororgo narnv anga aagv toku. ²⁵ Pakbu angv morko dvdu nga dorla kuma toku, vkvlgabv dvbv ngv morko dvdua dordu kubv nw nyila ninyigv nywng umvuu vdwa nyirabv okv ninyigv yikungyira dvdv nga piokdu kubv orto jitoku. ²⁶ Pakbu angv lwbwng kumpvla dvbv gv habolo gipvto. Nw kod-wkkrwkla koola minto, ‘Nga achukgo dooria jilabvkv, okv ngo nam ogumvnwng nga dorku nvpv!’ ²⁷ Dvbv ngv ninyia aya mvngpa toku, vkvlgabv dvbv ninyia morko dvdu nga mvngnga jitoku okv ninyia vngmu toku.

²⁸ Vbvrikunamv nyi angv vnglintoku okv ninyigv pakbu ajin gonyi vngrwk suto hv kvvlo nw gvlo morko achukgo narnv go. Nw hum gakbwng gvrila dvngrapto okv minto, “Ngoogvlo narnam a baapubv jikur lakubv.” ²⁹ Ninyigv pakbu ajin angv ninyigv lvpa lvkwnglo gipv la

18:21 Lk 17:3,4 **18:22** Atk 4:24 § **18:22** chamkanw go;
Vmalo chamkanw gula kanw go

ninyia koodwkkwkla koola minto, ‘Nga ayala achukgo dooya jilabv, ngo nam dvdua dorku nvpv!’ ³⁰ Vbvrítola nw um tvvmato; vmabvya nw nyi anga dvdua dorma dvdvlo doomure vla patwk tumlwk yatoku. ³¹ Vdwlo dvbv pakbu gunv vbvrinam a kaapa tokudw, dvbvnyi ogumvwnng nga minpa toku. ³² Vkvlgabv nw pakbu anga goklwk toku. Nw minto, ‘Arin kaamanv nyira noo! Noogv ngoogvlo morko narnam mvnwnngnga ngo nam mvngnga jitoku, noogv nga vbv koonam lvkwngbv. ³³ Ngoogv nam aya mvngpanam aingbv, no pakbu ajin a aya mvngpa rungse gui.’ ³⁴ Dvbv ngv achialvbv haachi toku, vkvlgabv nw pakbu anga dvdu nga gvma dvdvlo mvrit modubv vla patwklo vngmu toku.”

³⁵ Okv Jisu minyabv mintoku, “Vkv aingbv ngoogv Abu nyidomooku tolo doonv, mvnwnngnga mvre, vdwlo nonuno haapok raying lokv achi-boru gv rimur a mvngnga maridw.”

19

Jisu burmisiinam lvkwng nga tamsar toku

¹ Jisu vdwlo so ogumvwnngnga minya tokudw, nw Galili nga vngyu toku okv Jordan Svko gv tagonv Judia mookubv vngtoku. ² Nyitwng go ninyia vngming gvto okv nw bunua hoka mvpu jitoku.

³ Parisis nyi mego nw gvlo aala, ninyia mimur modubv vla svbv tvvkato, “Ngonugv Pvbv ngv nyi hv atugv nywng nga ninyigv mvngnambv gungnying lwknam lwksbv lwktola burmisidubv jipv ai?”

⁴ Jisu mirwkto, “Darwknv Kitaplo mindu krim atuakelo Pwknvyarnv nyi vdwa pwklin rilo, nyimv bvla nyilo bv pwkto, vla minam a nonuno puri rikw mai? ⁵ Okv Pwknvyarnv minto, ‘Svkv lvkwngbv nyi hv ninyigv anv okv abua kayupila vngyula atugv nywng nga lvkobv ribam yalaku, okv anyiv akin gubv ridu kunv.’ ⁶ Vkvlgabv bunu anyibv ribwng kumare vbvritola akin vku. Vbvrikunamv Pwknvyarnv gv ogugo naadum sunamma nyi v mvpin sirung mabvka.”

⁷ Parisis vdww ninyia tvvkato, “Vbvrikunamv, ogubv Moses Pvbv lo nyiga ngv nywng nga mvnwngnga chimpa modubv vnggvnvnv siti go mvlina ninyigv laak lo jilwk gvrikula vngmu dukubv minpvnv?”

⁸ Jisu mirwkto, “Moses nonua nywng vdwa burmi sudubv jito ogulvgavbolo nonua tamsar sarnyu manam lvkwngbv. Vbvritola krim pwklinyarlin rilokv vbvma. ⁹ Ngo nonua minjidunv, vbvrikunamv nyi gunv atugv nywng nga nyi kvvbi gulo karbamla rimur moma gvrila kvvbi rimur lokv burmisulaku nw kvvbi nywng go naaku bolo hv rimur dukunv.”

¹⁰ Ninyigv lwbwlaksu vdww ninyia minto, “So si nywng gvla nyilu gv pingkolo vbvridu bolo, nywng nyilubv naami summa nammv alvyari.”

¹¹ Jisu mirwkto, “So tamsar sarnam si nyichar mvnwng loma, vbvritola Pwknvyarnv gv um jinaam vdwa mwng. ¹² Nyi ngv ogulvgabv nyimv naala madunv ho gv lvkwnng ngv akuaku sidunv: kvvgo nvnga nywngnyilu rinyu madubv

19:4 Atk 1:27; 5:2 **19:5** Atk 2:24 **19:7** Det 24:1-4; Mt 5:31

19:9 Mt 5:32; 1Kor 7:10,11

bvnglinto; kvvbi gonv, nyi vdww bunua vbv rimu rungduv vla mvnammv; okv mvgonv nyidomooku Karv gv lvgabv nyimv naama nyadunv. Yvvdw so gv tamsar nama torwk sidunv ninyia vbv rimutvka.

Jisu vmi vdwa boktalwkji toku
(Mk 10:13-16; Lk 18:15-17)

¹³ Nyi mvgo vmi vdwa Jisu gvlo ninyigv laak v bunua mampo gvrila bunugv lvgabv kumji modubv vla aagv jito, vbvritola lwbwlaksu vdww nyi vdwa yamtoku. ¹⁴ Jisu minto, “Vmi vdwa ngoogvlo aamuto okv bunua mintor mabv, ogulvgavbolo nyidomooku gv Karv ngv svbv rin vdw gvngv.”

¹⁵ Vbvrikunamv nw ninyigv laak v bunu gvlo mampv jitoku okv vbvripikula vngyu toku.

Nyitvny nyi go
(Mk 10:17-31; Lk 18:18-30)

¹⁶ Lvko nvnga nyi go Jisu gvlo aala tvvkato, “Tamsarnv, turbwngnv singnam a paanam lvgabv, ngo ogualvny ridung go rirung svgovvri?”

¹⁷ Jisu mirwkto, “Alvnam gv lvkwngbv no nga ogubv tvvka dunv? Akin gomwng alv nvngv. No turnamlo aanvpv mvngdu nvlo Pwknvyarnv gv gamkinam gaam vdwa alvbv pvlaka.”

¹⁸ Nyi angv tvvkato, “Ogu gamkinam?”

Jisu mirwkto, “Gwngrw gwma bvka; nyimv rimur mabvka; dvcho mabvka; mvvlarula yvnyika gungnying milwk mabvka; ¹⁹ noogv anvabua mvngdv laka; okv no atubongv

oguaingbv paksu dudw vbv namrwk ajin a paklaka.”

²⁰ Nyi angv mirwksito, “Ngo so gv gamkinam mvnwng sum ripvkunv, ngo ogugo rita svgo doopv?”

²¹ Jisu ninyia minto, “No abwkalo nvgobv riso mvngbolo, vngla noogv ogumvnwng nga piokla morko nga heemanv vdwa ortoka vbvribolo no nyidomooku tolo nyityvachok nvgobv rireku, vbvripikula aala nga vngming gvlakuka.”

²² Nyitvntv nyi angv vdwlo hum tvvtokudw nw mvngrula vngyu toku ogulvgavbolo nw achialvbv nyitvto.

²³ Vbvrikunamv Jisu ninyigv lvbwlaksu vdwa mintoku, “Ngo nonua milv jidunv: nyitvntv nyi v nyidomooku gv Karv tolo aanam lvgabv achialvbv aanyu manam gubv ridunv. ²⁴ Ngo mintin jidunv: nyitvntv nyi v Pwknvyarnv gv nyidomooku gv Karv lo aapvnam lvgabv aanyu manam gv hiru kaaya ngv kemel gv pwsu ungo lo ngwngpik tvvnam gv hirukaya nga kaiyadunv.”

²⁵ Lvbwlaksu vdww vdwlo um tvvtokudw, bunu achialvbv tvngarvnga nyatoku, “Vbvrikunamv, yvvkula ringnam a paajikunv,” vla bunu tvvka nyato.

²⁶ Jisu bunua kaagap jinjinla kaala mirwkto, “So si nyi gvbv choopu manam gubv ridunv, vbvri-tola Pwknvyarnv gvbv ogumvnwng ngv choopu dunv.”

²⁷ Vbvrikunamv Pitar mintoku, “Kaatoka” nw minto, “Ngonu ogumvnwng nga topu pikula nam vngming gvdu. Ngonu ogugo paari kudw?”

28 Jisu bunua minto, “Nonuno paarung jinv ngv, vdwlo Nyia Kuunyilo ngv anw bv singtam gunv tolo ninyigv kairungnv Dvbv dooging lo doolwk rikudw, vbvrikunamv nonu ngoogv vring gola anyigo rigvnam vdwwkam dootare Israel gv haalung vring gola anyia rigvdogv dukubv. 29 Okv yvvdw naam a achiboru vdwa, anyibormv vdwa, anvabua, umvuu vdwa, rongo vdwa ngoogv lv-gabv kayu pikula vngyu dukunv, hv lwnggo lvvyago paatv dukunv okv turbwngnv singnam a jirung rikunv. 30 Vbvritola megonv vjak yvv atukchobv ridunv, hv kochingreku okv megonv vjak yvv kochinglo ridunv, hv atokchoreku.

20

Anggor rongo mvnv vdwv

1 “Nyidomooku Karv ngv svbv ridunv. Kvvlo nyi ako ninyigv anggor rongo nga ridubv vla rwklap lapnv nyi makarla arukamchi bv vnglinto. 2 Nw bunua alu nyilap bv joobwngnam, raaji lokdwng chargo jidubv tolwk gvrila bunua rongolo vngmu toku. 3 Nw lvkodv aru gv kia baji lo vngkur toku piokpamdorpam kolo, ho nw nyi mego ogurimabv doonv vkv kaapa toku, 4 vkvlgabv nw bunua mintoku, ‘Nonu ka anggor rongo vlo vngla riteka, okv ngo nonua alu rwklap lapjoa jire.’ 5 Vkvlgabv bunu vngtoku. Vbvrikunamv nw alu gv gunta vring gola anyi lola okv arium gv gunta aom lola vbvdvdbv minla nyi vdwa vngmuto. 6 Arium gv gunta angu baji tvvtoku vdwlo nw piokpam dorpamlo vngla kvvbi nyi vkv

vjaklodvbu hoka dakbwng nvgo kaapa toku. Nw bunua tvvkatu, ‘Nonuno ogubu alu longa soka ogu rimabu anyubu doomin dunv?’ ⁷ Bunu mirwksito, ‘Ngonua yvuka minnv kaama,’ Vbvrikunamv, alvpu, nonuka anggor rongo vlo vngla riteka,’ vla nw bunua mintoku.

⁸ “Vdwlo arium tokudw, rongo atuv rongo rigv nvnga mintoku, ‘Rwklap lapnv vdwa goklwka bunugv alu nyilap lapjo nga jooto kuka, goknyung yanam lokv jirap laila gokcho yanam lobv jila jime tokuka.’ ⁹ Gunta angu baji lo aalwk mwngla rinu vdwa raaji lokdwng charsak go jitoku. ¹⁰ Vkvlgabv gokcho yachoknam nyi vdwa aamu gvrila jootv tvri ho, bunu mvngtoku bunu kaiyago paari nvpv vla; vbvritola bunuaka raaji lokdwng charkin sakgo jimwng toku. ¹¹ Bunu bunugv morko nga naatokula rongo atua bvdur-bvdurbv japria nyatoku. ¹² ‘So nyi vdw si goknyung yanammv gunta akin gomwng rongo rinam v,’ vla bunu minto, ‘ngonu doonyi v hila madubu rila rekwng gvvre—vbvritola no bunua ngonua jinam apiabu jigvre!’ ¹³ ‘Tvvriato, ajin,’ rongo atuv mirwksito, bunugv lokv akonyi, ‘Ngo nonua rikup mapvnu. Minjvjbolo, nonu alu nyilap a raaji lokdwng chargobv tolwk minsupvnu. ¹⁴ Nonu vjak nonugv alu nyilap a naalaikula naambu vngnyikuka. Ngo koching yachokbv ngoogv goklwka kunam nyi so, nonua jinam apiabu jirung tvdunv. ¹⁵ Ngo atubogv morko nga mvnggwngbv mvnyu madu nvlare? Vmalo ngo jipu nv gobv rinam lvgabv nonuno tanyum gvvrria doi?’ ”

16 Okv Jisu minyabv mintoku, “Vkvlvgabv yvvdw atokchochuk yabv ridunv hv koching yabv rireku, okv yvvdw koching yabv ridunv, hv atokchochuk yabv rireku.”

*Jisu ninyigv sise lvkwng nga lvom nvbv mintoku
(Mk 10:32-34; Lk 18:31-34)*

17 Vbv Jisu Jerusalem bv chaadungla charilo, nw lvbwlaksu vring gola anyia akusubv naarwsito okv bunu lamtvlo vngdung dula nw bunua min-sila minto. 18 “Tvvrriato,” vla nw bunua minto, “Ngonu Jerusalem bv chaadungdo hoka Nyia Kuyunilo nga Nyibu butvnnv vdwgv okv Pvbv tam-sarnv vdwgv laak lo ninyia laklwk riku. Bunu ninyia miyakaayala mvkidubv minreku. 19 Okv vbvrikunamv ninyia Jentail vdwgvlo laklwk reku, bunu ninyia nyarjikau riku, svnyak pareku, okv daapo lo ninyia takki reku; vbvritola alu loom kochinglo nw turkur reku.”

*Anv ako gv dinchibv koonam
(Mk 10:35-45)*

20 Vbvrikunamv Jibedi gv nywng ngv kuunyilo anyia aagvla Jisu gvlo aato, ninyigv kaagialo gub-wngla ninyia akusubv mvngkiamnam go kooto.

21 Jisu ninyia tvvkato, “No ogugo mvngpvla?”

Nw mirwtko, “No vdwlo Dvbv bv riku bolo ngoogv kuunyilo anyi sum noogv lakbik tangvlo akonyi okv lakchi tangvlo akonyi doomure vla, no ngam milv jilabvka.”

22 Jisu kuunyilo anyia mirwtko, “Nonu ogugonyi koodunvbvre ho lvga nga nonu chima.”

“Nonuno ngoogv hinchng koobu tvngji nama, tvngla redw?”

Bunu mirwkto, “Um, ngonu tvnglare.”

²³ Jisu bunua mintoku, “Nonuno tvngnam gvbv ngoogv koobu lokv tvnglare, vbvritola ngoogv lak-bik okv lakchilo dooji nvnga dardubv ngoogvlo kaama. So dooku vdwsu ngo Abu gv mvpvripv jikunam bunu vdw gvngv.”

²⁴ Vdwlo kvvbi lwbwlaksu vdwv hum tvvpa pvkudw bunu achiboru anyia haachi nyatoku.

²⁵ Vkvlgabv Jisu bunu mvnwngnga goklwk toku okv mintoku, “Nonu chindu Jentail vdwa rigv-dogvnnv vdwv bunua rigvdogvnnv lanv jwkrw doo-dunv, okv rigvdogvnnv vdwv tujupkunam gubv rinya dukunv. ²⁶ Svbrinam aingbv nonu gvlo doorung moyoka. Nonu gvlokv akonv kainvgobv riso mvngbolo, hv mvnwng gv pakbu bv rirunglaka; ²⁷ okv nonu gvlokv akonv atokcho yaso mvngbolo, hv kvvbi vdwgv nyirabv rirunglaka— ²⁸ Nyia Kuunyilogv jvbv, nw rijiko-dubv aama vbvritola nw riji yagv rila okv nyi achialvgo ringlin kunam lvgabv nw atubogv gv svngtung nga mvngnga siyadunv.”

Jisu nyikchingnv nyi anyigo mvpu toku

(Mk 10:46-52; Lk 18:35-43)

²⁹ Jisu la ninyigv lwbwlaksu vdwv Jeriko nga vngyu rikulo nyitwng go bunua vngming gvto.

³⁰ Nyikchingnv nyi anyigo lamtv hoka doonv Jisu vngpit rikv vla tvvpatu, vkvlgabv bunu gokrap toku, “Dabid gv Kuunyilo nga! Tamsarnv, ngonua aya mvngpa labvka!”

³¹ Nyitwng ngv bunua choibvkv vla mintoku. Vbvrítola bunu kaiyayabv gokto, “Dabid gv Kuun-yilo nga! Tamsarnv, ngonua aya mvngpa labv!”

³² Jisu daktung toku okv bunua goklwk toku. Nw bunua tvkatoku “Nonu nga nonugv lvgabv ogugo rijilabv vla mvngpv?”

³³ Bunu mirwksutoku, “Tamsarnv, Ngonu nam ngonugv kaapa nvnv nvnga jilabvkv vla mvngdunv!”

³⁴ Jisu bunua aya mvngpa toku okv bunugv nyik a mvsit jitoku; Vjakgovv bunugv nyikkv kaapa nyutoku, okv bunu ninyia vngming gvtoku.

21

Jisu Jerusalem lo Dvbv bv aatoku

(Mk 11:1-11; Lk 19:28-40; Jn 12:12-19)

¹ Jisu la ninyigv lwbwlaksu vdwv Jerusalem vngchi dvlvbw rito, bunu Betpej gv Olib Moodw lo aatoku. Hoka Jisu lwbwlaksu anyi gonyi vngcho moto ² svbv mingvrila: “nonugv vnglwkjiku nampum vlo vngnyika, okv Vjakgovv nonu hoka siak go kuu nga lvkobv takpv namgo kaapare. Um nonu paksoklaila ngoogv dookuso boolwk tvka.

^{3*} Okv nyi gunv ogugo minbolo, ninyia ‘Ahtu sum dinchidu,’ vla minlaka; okv vbvminku bolo hv vjakgovv bunua boomu reku.”

⁴ Svbrinam si nyijwk gv ogugo minpv nama jvjv modukubv ritoku:

⁵ “Jayon gv pamtv nga minji teka,

Kaatoka, nonugv Dvbv ngv nonu gvlo aarikunv!

* **21:3** Ahtu; Vmalo Bunugv Ahtu. **21:5** Jek 9:9

Nw nyanyak nvgo okv nw siak kuu nyi riokw manv gv aolo dootola.”

⁶ Vkvlgabv lwbwlaksu vdwv vngla Jisu gv bunua ritokv vnam a riji toku: ⁷ bunu siak hala okv hvkvgv kuu nga boolwk jitoku, bunugv jekok ka ho pipv jitoku okv Jisu gecha toku. ⁸ Twngtv rungngv nyipam go bunugv jvkok ka lamtvlo pipv jinya toku, okv kvvbi vdwv singngv vdwlok v hakbv paalin nyala lamtvlo pipv jinya toku. ⁹ Nyipam v Jisu gv kokwng habobv vngkar nyato ho vngkarnv vdwv gokrap nyato, “Dabid gv Kuunyilo nga hartv nyato! Ahtu gv amin bv aanv sum Pwknvyarnv ninyia aya jirung laka! Pwknvyarnvnyi hartvdu!”

¹⁰ Vdwlo Jisu Jerusalem lo aalwk tokudw, pamtv gv nyi mvnwngngv chikchakyayak bv ritoku. Nyi vdwv tvvkato, “Si yvvla?”

¹¹ Nyipam v mirwkto, “Si Galili gv Najaret lokv nyijwk Jisu kv,”

Jisu Pwknvyarnvnaam lo aatoku

(Mk 11:15-19; Lk 19:45-48; Jn 2:13-22)

¹² Jisu Pwknvyarnvnaam lo aatoku okv hoka pioknv rvvngv vdwa mvyakmvchak jitoku. Nw morko lwkko lwkpiknv tvbul am, okv taakw pioknv gv doosing ngaaka dutap durap mvji toku, ¹³ okv bunua mintoku, “So si Darwknv Kitaplo lvkpvdv hoka Pwknvyarnv mindu, ‘Ngoogv Pwknvyarnvnaam a kumkunaam bv vduv.’ Vb-vritola nonuno sum dvcho nvgv tosi siging kobv mvpv!”

¹⁴ Nyikchingngv okv lvpiknv ho Pwknvyarnvnaam arwng hoka nw gvlo aanya toku, okv nw

bunua mvpu toku. ¹⁵ Nyibu butvnu vdww la okv Pvbv tamsarnv vdww Jisu gv lamrwpadubv mvnam rinam a kaala okv vmi vdwgv “Dabid gv Kuunyilo nga hartvdu” vla goknam a tvvla haachi nyatoku. ¹⁶ Vkvlgabv bunu Jisunyi tvvkato, “Bunugv ogugo minam a no tvvpa dunvre?”

“Tvvnam gvbv ngo tvvpadu,” vla Jisu mirwko. “Nonuno Darwknv Kitap so vdwloka puri rikw mapvi? ‘Nonu vmi vdwwala okv anga vdwwa risar-rima la alvyaungbv hartv modubv ripv.’ ”

¹⁷ Jisu bunua vngyula okv Betani pamtv lo vnglinlaku, hoka nw ayu yuplwk toku.

Jisu koksitkokrik singnv go beeki toku

(Mk 11:12-14,20-24)

¹⁸ Nw gv pamtv bv vngkur rikulo, logo nvgv arukamchi lamtv hoka Jisu kano toku. ¹⁹ Nw lamtv adar hoka koksitkokrik singnv nvgo kaapala ho aalwk toku, vbvritola ogu guka kaapama anv vmwng. Vkvlgabv nw singnv nga minto, “No vdwlo lvkoka asi svvlin kumare!” singnv nvngv vjakgobv sinyuk toku.

²⁰ Lvbwlaksu vdww hum kaatokula tvngarvnga nyatoku. Bunu tvkato, koksitkokrik singnv ngv vjakgobv oguaingbv sinda yinv gubvri?”

²¹ Jisu mirwko, “Ngo nonua jvjvbw midunv, vdwlo nonu mvngsarmanam go kamabv mvngjwng bolo, nonu ka rilare ngoogv so koksitkokrik singnv nga rinam aingbv. Okv svbv mwngchikma, vbvritola nonu vbvka so gv moodw a minyure, ‘Gudungla no atuv svmasa bolo orlwksuto vbolo,’ hv vbv rijire. ²² Nonuno

mvngjwng bolo, nonu ogugo kumla koopvdw um paare.”

*Jisu gv tujupkunam gv lvkwng nga tvunam
(Mk 11:27-33; Lk 20:1-8)*

²³ Jisu Pwknvyarnvnaam lo aakur toku; okv ninyigv tamsar rilo, nyibu butvnv vdww, nyiga-gaatv vdww nw gvlo aala tvvkato, “No ogubv mvngla so vdww sum rimirin dunv? Nam svbv rila dubv yvvla tujupkunam a jinv ngv?”

²⁴ Jisu bunua mirwkto, “Ngo nonua gaamgo tvvkare, okv nonuno nga mirwk bolo, ngo ka so vdww sum ogubv rila dunvdw um ngo nonua minjire. ²⁵ Jon gv baptisma jinammv ogolokv aapv: hv Pwknvyarnv gvlokv aapv nvri vmalo nyi gvlo kri?”

Bunugv aralo larrap minsuto, “Ngonu ogugo mirwksidubv? Ngonu Pwknvyarnv gvlokv, vla mirwk bolo, nw ngonua minre, vbvrimamv, ogulvgabv nonu Jonnyi mvngjwng mapv?” ²⁶ Vbvrilitola ngonu ‘Nyi gvlokv’ vla minse ngaaka busudo, ogulvgabv bolo mvnwnngv Jonnyi nyijwk akobv mvngnya dukunv.” ²⁷ Vkvlgabv bunu Jisunyi “Ngonu chimakv” vla mirwk toku.

Okv nw bunua mintoku, “Ngooka nonua minjimore ngo so vdwwsum ogubv rila pvnvdw.”

Kuunyilo anyia minchisinam

²⁸ “Vjak, nonuno ogugo mvngdu? Ho hoka nyi ako dooto, hv kuunyilo anyigo dooto. Nw achiyagv dookulo aala okv minto, ‘Kuunyilo, silu no anggor rongo vlo vngla riteka.’ ²⁹ ‘Ngo vngn-wng ma,’ vla hv mirwkto, vbvrilitola koching so hv mvngdin lakula vngtoku. ³⁰ Vbvrilikunamv abu

angv kuunyilo gunvlo vngla vbvdvdbv mintoku. “Tamsarbo, vkv vla mirwcto, vbvritola nw vngmato. ³¹ Yvvla anyi lokv abu gv mvnglwkbv rin v angv?”

“Achi ya angv,” vla bunu mirwcto.

Vkvlvgabv Jisu bunua mintoku, “Ngo nonua minjidunv: Lampu naayanv okv yookar nvngv nonua Pwknvyarnv gv Karv tolo vngchoyare. ³² Jon nonu gvlo aala alvnnv lamtv nga naamu dubv kaatam jitoku, okv nonuno ninyia mvngjwng mato; vbvritola lampu naayanv vdww okv yookarnv vdww ninyia mvngjwng toku. Okv um nonu kaagv rilaka, nonu koching so ka mvngdin nyama okv ninyia mvngjwng kuma.

Anggor rongo rwktin vdwa minchisinam
(Mk 12:1-12; Lk 20:9-19)

³³ Jisu minto, “Kvvbi minchisinam godv tvvri-anyato. “Kvvlo gwngda mooku atu go dooto, nw anggor rongo go mvlwcto, hum svlung rakyumto, anggor nyumjik dubv ungrung ako dupv toku, okv kaaria nvdubv aokoloknv taabio go mv-toku. Vbvrikunamv nw anggor rongo nga rwktin tinlwk pikula adubv moing vngyu toku. ³⁴ Vdwlo anggor naakumdww aato kudw, nw ninyigv nyira vdwa rwktin vdwgvlo anggor naakum kunamha ninyigv baak am naarwk modubv vla vngmuto. ³⁵ Rwktn vdww ninyigv nyira nga naatung toku, akonyi dvngto, kvvbia mvkito, okv kvvbi gunyi vlwng orkito. ³⁶ Lvkodv nyi angv nyira vngmuto, vngcho monam vdwa kaiyanv go, okv rwktin vdww ho vdwaka vbvdvdbv mvritto. ³⁷ Ataranya

ngaku nw ninyigv kuunyilo nga bunu gvlo vngmu toku. Nw mintoku, “Bunu ngoogv kuunyilo nga jvjv bv mvngdv yiku nvpv.” ³⁸ Vbvritola rwktin vdww vdwo kuunyilo nga kaapa tokudw, bunu mimi sunyato, ‘Si atu gv kuunyilo ngv, klai mvki laju ninyia, okv ngonu ninyigv yikungyira nga paadu kubv!’ ³⁹ Vkvlgabv bunu ninyia naatungla anggor rongo agum bv dvlín la okv mvki toku.

⁴⁰ Jisu tvvkato, “Vjak, vdwo anggor rongo atuv aarikunyi ho rongo rwktin vdwa ogubv mvri kudw?”

⁴¹ Bunu mirwksito, “Nw jvjv bv ho nyi alvmanv vdwa mvki reku, okv anggor rongo nga naala kula ninyigv paasv nga jidw lo jilwk jikunv kvvbi rwktin lo tinlwkw reku.”

⁴² Jisu bunua minto, “Darwknv Kitaplo ogugo minpvdw um nonu vdwlóka puri rikw mapv nvri?

‘Naam mvnv vdwgv arin kaama vla toa kunam vlvng ngv mvnwngnga arin doyachoknv gubv ritoku.

So si Ahtu gv riku namv;

si achialv bv kaasartabo rungnv goku!’

⁴³ “Okv vkvlgabv ngo nonua minjidunv,” Jisu mindvjito, “Pwknvyarnv gv Karv nga nonu gvlo kongá naalakula okv alvbv apwasi[†] svvlin jikunv nyi vdwo jireku.” ⁴⁴ Yvvdw so vlvng aolo lo hopv rin v hv atung ayung reku; okv vlvng angv

21:42 Miri 118:22,23 † **21:43** Megonv kitap lo bars 44 sum lvktamdo: Nyi mvnwngnga ho vlvng hoka hopv nvnga patung-payung mvre; okv ho vlvng angv nyi akonv aolo hopv bolo, v ninyia amwkbv ridubv mvre.” (Kaato Lk 20.18).

akonvgv aolo hopv ridw hum amwkamak dubv mvreku.

⁴⁵ Nyibu butvvnv vdwv la okv parisis vdwv Jisu gv minchisila minam a tvvtokula nw bunugv lvkwng nga mindu nvgo vla tvvchin nyatoku, ⁴⁶ vkvlvgabv bunu ninyia naatung dubv rikwto. Vbvritola bunu nyitwng nga busu nyato, ogulvgavbolo nyitwng ngv Jisunyi nyijwk gubv mvngnyato.

22

Nyida nga minchisinam (Lk 14:15-24)

¹ Jisu minchisinam lokv minvla nyi vdwa minto.
² Nyidomooku gv Karv ngv svbv ridunv. Kvvlo dvbv ako dooto, nw ninyigv kuunyilo gv lv-gabv nyida dvpam go pamgvto. ³ Nw ninyigv pakbu vdwa nyi goknam vdwa dvpam lo aalwk tokukv vla minpa modubv vngmu toku, vbvritola nyi goknam vdwv bunu aalwk nwnigma toku. ⁴ Vkvlgabv nw kvvbi pakbu gunyi nyi goknam vdwgv lvgabv svbv gaam milwk gvrila vngmu toku: 'Ngo dvpam gv dvnamtvnngnama vjak mvpvripv pvkunv; ngoogv svbv svv ngaaka dintwkbv twkp vpvkunv, okv ogumvnwng nga mvpvripv pvkunv. Nyida dvpam lo aalwk nyala kukv!' ⁵ Vbvritola nyi goknam vdwv um tvjvkamv nyato okv bunugv pwsepaase lvkwnglo vngnya toku: akonv nw gv rongolo vngtoku, kvvbiv ninyigv dukan lo, ⁶ kvvbi gunv pakbu vdwa twkbwng gvrila dvngla, okv bunua mvki nyatoku. ⁷ Dvbv ngv achialvbv haachi toku; vkvlvgabv nw

ninyigv sipai vdwa vngmutoku, bunu vngla gwn-grw gwnv vdwa mvki toku okv bunugv pamtv nga ramyok jitoku. ⁸ Vbvrikunamv nw ninyigv pakbu vdwa goklwkla bunua mintoku, ‘Ngoogv nyida dvpam a vjak mvpvripv pvku, vbvritola ngoogv nyi goknam vdww sum aala dvyin nvbv rima. ⁹ Nonu vjak namrwk pinkobv vngnyila nyi kaapanv dvdv nga goktv kuka.’ ¹⁰ Vkvlgabv pakbu vdww namrwk vdwwv pingkobv vngla bunugv nyi kaapanam mvnwnngnga alv jvka alv majvka gokkumto; okv nyida naam lo nyi vdwwv yarbing toku.

¹¹ “Dvbv ngv nyi goknam vdwa kaabv vngtoku, nw nyi ako nyida vji kooma nvgo kaapa toku. ¹² ‘Ajin, no nyida vji koomabv oguaingbv so aapvvnv?’ Vla dvbv ngv ninyia tvkatoku. Vbvritola nyi angv oguka mirwk simato. ¹³ Vbvrikunamv dvbv ngv pakbu vdwa mintoku, ‘Ninyia lvpa okv laakka leetoka, okv agum gv kanv kolo orlwk tvkuka. Hoka nw ninyigv hijung nga kotwkkwklwla kapla dooreku.’ ”

¹⁴ Okv Jisu minyabv mintoku, “Mvnwnngnga gokpv, vbvritola darnamv miang gomwng.”

Lampu dorse lvkwng nga tvunam

(Mk 12:13-17; Lk 20:20-26)

¹⁵ Vbvrikunamv Parisi vdww vngyu laku okv Jisunyi tvunam lokv tvgvrikula kupdubv vla rungtoku. ¹⁶ Vbvrikunamv bunu nw-bunugv lwbwlaksu mego okv Herod gv nyi vkv Jisu gvlo vngmu toku. Bunu vngla minto, “Tamsarnv, ngonu chindu no jvkv nga mindu. No nyi gv

lvgabv Pwknvyarnv gv jvjvnnv mvngnam lvkwnng nga tamsardu, nyi vdww ogugo mvngdudw hum chigamrai madu, ogulvgavbolo no nyi gv kai miang nga kimado. ¹⁷ Vbvrikunamv, no ogubv mvngdu, ngonugv Roman Dvbvyachoknyi lampu jinam si ngonugv Pvbv nga rinying dunvri ma rinying madunvre?

¹⁸ Jisu, ogubv rijvka bunugv alvmabv rungnam a chintoku, okv vkvlgabv nw minto, “Kaakudvbv rinu nonu! Nonu ogulvgabv nga kupdubv rikw nyadunv? ¹⁹ Lampu jise lokdwng nga kaatam labv!”

Bunu lokdwng chargo nw gvlo bvnglwk jito, ²⁰ okv nw bunua tvvkato, “Si yvvgv nyukmu ngvla aminv?”

²¹ Bunu mirwk suto, “Dvbvyachok gv.”

Vkvlgabv Jisu bunua minto, “Alvdo, vbvri-namv, Dvbvyachok gvnga Dvbvyachoknyi jilaka, okv Pwknvyarnv gv-nga Pwknvyarnvbv jilaka.”

²² Vdwlo bunu sum tvvtokudw, bunu lamngak toku; okv bunu ninyia kayu pikula vngtoku.

*Sinam lokv turkurkunam lvkwnng nga tvunam
(Mk 12:18-27; Lk 20:27-40)*

²³ Nyi si sitokula lvko turkur kumadunv vla minv Sadusis mego ho alu Jisu gvlo aato. ²⁴ Bunu minto, “Tamsarnv, Moses minto, nyi gunv umvuu doomabv sikubolo, ninyigv boruv hvngmi nga doogv gvrila sinv hvkv gvbv umvuu bvngji molaka hvto. ²⁵ Vjak, achiboru kanw go soka doodung nvgo. Achi yachok angv nyimv naatoku okv umvuu dooma dwbv sitoku, vkvlgabv ninyigv

hvnngmi nga hvkvgv boru hv nywng mvtoku. ²⁶ Vbvdvdbv boru anyi nvnv loka ritoku, aom nvnv loka, okv Anyungnga achiboru kanw mvn-wnglo. ²⁷ Ataranya ngaku mvvga nvnngv sitoku. ²⁸ Vjak, sinv vdwv turkur alulo, nyimv nvnngv yvvgv nywngbv rireku? Mvnwngngv ninyia nywngbv mvpvkunv.”

²⁹ Jisu bunuam mirwkto, “Nonu achialvbv mvngmurdu! so si ogulvgavbolo nonuno Darwknv Kitap a vmalo Pwknvyarnv gv jwkrw nga chimanam lvgalo. ³⁰ Sinv ngv vdwlo turkur rikunyi, bunu nyidogindung jbv ridunv nyimv nyilo bv naami siku madunv. ³¹ Vjak, sinv ngv turkurkunam sum: Pwknvyarnv gv nonua minpv jinam a nonuno lvkoka puri rikw mai? Nw minto, ³² ‘Ngo Abraham gv Pwknvyarnv ngv, Isaak gv Pwknvyarnv ngv, okv Jakop gv Pwknvyarnv ngv.’ Nw turnv vdwgv Pwknvyarnv ngv, sinv gvngvma.”

³³ Vdwlo nyipam v sum tvvtokudw, bunu ninyigv tamsar nama tvvla lamngak nyatoku.

Kaiyachoknv Gamki
(*Mk 12:28-34; Lk 10:25-28*)

³⁴ Vdwlo Parisi vdwv Jisu Sadusi vdwv choi dubv mingvnyibv vnam a tvvpa tokudw, bunu aakum nyatoku, ³⁵ okv bunugv lokv akonv, Pvbv tamsarnv ako Jisunyi tvunam go tvvgv rila mingkup dubv vla rikwto. ³⁶ Hv Jisunyi tvvkato, “Tamsarnv, Gamkinam gv aralo ogolo angv gamlo yachokkv?”

³⁷ Jisu mirwkto, “Pwknvyarnvnyi paklaka, noogv Pwknvyarnvnyi, no gv haapok raying lokv, no gv yalu mvnwng lokv, okv no gv mongrumara mvnwng lokv.’ ³⁸ So si kaiyachoknv okv dинchi yachoknv Gamki namv. ³⁹ Anyinbv gamlo yachokkv si: No atubongv oguaingbv paksu dudw vbv namrwk ajin a paklaka.’ ⁴⁰ Moses gv Pvbv mvnwng ngvla okv nyijwk mvnwng gv minam v so gv Gamkinam anyi gv arwnglo doodunv.”

Kristo lvkwngbv tvunam
(Mk 12:35-37; Lk 20:41-44)

⁴¹ Vdwlo Parisis mego aakum nyato kudw, Jisu bunua tvvkato, ⁴² “Nonuno Kristo gv lvkwnng nga ogubv mvngdu? Nw yvvgv husi bv ridunv?”

“Nw Dabid gv husi bv ridunv,” vla bunu mirwkto.

⁴³ Jisu tvvkato, “Vbvrinamv, ogulvgabv Dabidnyi Dow hv ninyia Ahtu vla mimu pvnv? Dabid mintoku,

⁴⁴ ‘Ahtu ngoogv Ahtunyi minto:

Ngo no gv nyimak vdwa

no gv lvpa lvkwnnglo pvma dwdvlo ngoogv lakbik tangv so dootoka.’

⁴⁵ Vbvrinamv Dabid ninyia ‘Ahtu’ vla minpv bolo, oguaingbv Kristo Dabid gv husi bv ridubv?”

⁴⁶ Jisunyi yvka gaam gamgo ka mirwk nyuma toku, okv ho alu lokv yvka Jisunyi tvu dubv choopu nyuma toku.

23

*Jisu pvvv tamsarnv vdwala parisv vdwv gamrvv
toku*

(Mk 12:38,39; Lk 11:43,46; 20:45,46)

¹ Vbvrikunamv Jisu nyitwng ngala okv ninyigv lwbwlaksu vdwv mintoku. ² “Pvvv tamsarnv vdwv la okv Parisv vdwv Moses gv Pvvv nga miriadubv tolwkkunam vdwvku. ³ Vkvlgabv nonuno bunugv ritokv vla minam a tvvrung tvka; vbvrijvka, bunugv rinam a rimwng gvyoka, ogulvgavbolo bunu oguaingbv japdudw vbv bunu rima. ⁴ Bunu nyi vdwgv nangkulo ai ngv baknyu madubv baknam go mvlwk jido, ho gv bakjina nama baknam lvgabv bunu ridur dubvka lakching ngvka chikka madu. ⁵ Bunugv rinam minam mvnwngngv nyi vdwv kaakudubv vla rinam gomwng. Kaatoka bunu darwknv Kitap lokv akor a chartv dubv lvktola atubogv toktam lo lvngbwnglo gvnam a, okv kaadvtkv vji jenyam a asukoyo dubv gvnam a.” ⁶ Bunu dvpam tvngpam lo alvyachoknv dooku a doonwng nyadu okv Jius kumkunaamlo dooku a atu tola gakchodu; ⁷ Bunu bajar lo mvngdvla salaam mvrwk konwng do okv “Tamsarnv” vla mingku nwingdo. ⁸ Nonuv “Tamsarnv” vla mirung mase ngv, ogulvgavbolo nonuv tamsarnv akin gomwng doodu okv nonu mvnwngngv achiboru hvku. ⁹ Okv nonuno sichingmooku so yvvnyika ‘Abu’ vla miyoka, ogulvgavbolo nonugv abuv akin gomwng nyidomooku tv doodunv. ¹⁰ Vmaloka nonuno ‘Rigvdakgvnv’

vlaka minse mangngv ogulvgavbolo nonugv rigv-dakgvnv Kristo akin mwng. ¹¹ Nonu mvnwng lokv yvv kaiyachokbv ridunv, hv miang nvgobv rirunglaka. ¹² Yvvdw atubongv kainvgobv mvsvu dunv, hv miang nvgobv rire, okv yvvdw atubongv miangbv mvngsudunv, hv kainvgobv rireku.

Jisu bunugv kaakudubv rinam a miakaya toku
(Mk 12:38-39; Lk 11:43,46; 20:45-46)

¹³ “Vdwnvgo achialvbv mvngru runam gubv rirekunv, Pvbv tamsarnv okv Parisi kaakudubvrinv nonu lo! Nonu nyi vdwgv kaagialo nyidomooku gv Karv nga mvtum nvngv, okv nonu atuv aama gvri okv nyi v aadu bv vla rikw nvnga ka aamu magvri!” ¹⁴ Pvbv tamsarnv okv Parisi kaakudubvrinv nonu achialvbv mvngru runam gubv rire! Nonu hvngmi vdwa riging nvminla okv bunugv naam nesung nga dvritpaapi jila, okv kumrinyi tvvpa modubv vla asu dubv kumla! vbvrinam lvkwngbv nonugv hirukaya hinse ngv achialvbv alvmanv gubv rireku!

¹⁵ “Pvbv tamsarnv okv Parisi kaakudubvrinv nonu achialvbv mvngru runam gubv rire! Nonu nyi ako naalwkkunam lvgabv svmasa vdwa durapla okv mooku mvnwngnga vngbo nyala; okv vdwlo hum rijik rikudw, nonu bunua lvnyi yago uyumooku bolo vngmu dubv mvyadu, nonu atubongv bolo vngrung jinv aingbv!

23:11 Mt 20:26,27; Mk 9:35; 10:43,44; Lk 22:26 **23:12** Lk 14:11; 18:14 * **23:13** Megonv kitaplo bars 14 sum lvktamdu: Bunu hvngmi vdwa rinvnvmindu okv bunugv naam a dvritpapidu, okv vbvrinamv kaatamdu kumnam a asudvbv kumdu. Bunugv hiru rusengv sinama lvyabv rire! (Kaato Mk 12.40).

¹⁶ Kanvpvram lo vnggvnv nonu, achialv bv mvn-gru runam gubv rire! nonu tamsardo, 'Yvv akonv Pwknvyarnvnaam lo milv mvngdunv, hv ogu arin kaama, okv yvvdw ain nam Pwknvyarnvnaam lo bvnglwkla milv dunv, hv milvnam lo doorung dunv' vla. ¹⁷ Nyikchingnv nonu! ogulo angv dinchianv, ain vri vmalo ain nam darwk dubv mvnv yugwng yangvri? ¹⁸ Nonu vbvka tamsardu, 'Yvvnyi gonv Pwknvyarnvnaam lo amin bvnglwkla milv dunv, hv milvnam gv anyung kaama; vbvritola nw amin go bvnglwkla milv dubolo hv milv namgv anyung doodunv.' ¹⁹ Achialv bv nyikchingnv nonu! ogulo angv alvyanv, amin vri vmalo amen nam darwk monv yugwng vri? ²⁰ Vkvlvgabv vdwlo akonv Pwknvyarnvnaam lo milv rikudw, nw hum okv ho gv doonv amin mvnwng ngaaka milv dukunv; ²¹ okv vdwlo nw Pwknvyarnvnaam lo milv rikudw, nw Naam haka okv hoka doonv Pwknvyarnv nyika milv dukunv; ²² okv vdwlo yvv nyidomooku a milv nvbolo, nw Pwknvyarnv gv dooging nga okv ho doonv nw nyika milv dukunv.

²³ Pvbv tamsarnv okv Parisis kaakudubv rin vdw nonu achialv bv mvngru runam gubv rire! nonuno pwnampaanam lokv miangjeka vring lokv akin jinam a jibwng gvri, nonunogv nayam lokv ujiuu miang nvnga ka, vbvritola nonu pvbv lokv dinchi nvnga rimadu hv minkiam miriam manam, aya minsunam, okv alv minsunam, sum nonu rirung svngv, akonyika kayu mabv. ²⁴ Kanvpvram lo vnggvnv nonu! Nonu nonugv

tvngku lokv tanyik jarlwk nvnga naala naa gvri, vbvritola kemel go dvmit gvri!

²⁵ Pvbv tamsarnv okv Parisis kaakudubvrinv vdw nonu achialvbv mvngru runam gubv rire! Nonu nonugv taali koobu gv agum a harkak do, vbvritola arwng ngv mvvnamrunam mv okv atu mvngwngbv rimin kunam mv awyaje duku.

²⁶ Nyikchingnv Parisi nonu! Koobu arwng nga kakcho tvka, okv vbvrikubolo agum hvka darwk minggv riku!

²⁷ Pvbv tamsarnv okv Parisis kaadubv rinv, nonu achialvbv mvngru runam gubv rire! nyibung nga tanu piaknam jvbv ridu, hv agum hv kaarinyi kaapudo vbvritola arwng ngv svma alo ako ngvku yaaku nvngv doodu. ²⁸ Hvkv aingbv, nonu agum lo mvnwngnga alv nvgubv kaatamdo, vbvritola arwnglo nonuno tanyumtaa ngv rimur doomur v awyaje duku.

*Jisu mincho jitoku bunugv hirukaya nga
(Lk 11:47-51)*

²⁹ Pvbv tamsarnv okv Parisis, kaakudubv rinv nonu achialvgo hirukaya hinre! Nonu nyijwk vdwgv lvgabv alvny nyibung mvdu okv nyi alvbv svngto kula sinv vdwgv nyibung ngaaka kaapu alvbv kaau pvvnamgo mvdu. ³⁰ Okv nonuno mindu, nonu nonugv abuapa vdwgv doori ho doonv guilo, bunugv rinam aingbv nyijwk vdwa gwngrw gwma dunvpv. ³¹ Vkvlvgabv nonuno nyijwk vdwa gwngrw gwnv gv husi gubv minduku. ³² Vbvrikunamv, vngnyila nonugv abuapa gv rirap kunam a rime tvkuka! ³³ Tabw nonu okv tabw

vdwgv umvuu vdw nonu! Nonuno oguaingbv miyakaya nama paala uyumooku bolo ima rinvpv vla dmin dunv? ³⁴ Okv vkvlvgabv ngo nonua hum minpa jidunv, ngo nonu gvlo nyijwk vdwa vngmure okv chinu mvngnv vdwa okv tamsarnv vdwaka; nonu bunua kvgonyi mvkire, kvgonyi daapo lo takire, okv kvgonyi Jius kumkunaamlo svnyakpare, okv bunua banggu lokv banggu gunvlo charare. ³⁵ Vbvrikunamv, alvnnv nyi mvnwnngnga gwngnrw gwnv vdwa mvriririt svngv nonu gvlo doolwkre, alvnnv Abelnyi gwngnrw gwnam lokv naalayila Berukia gv kuunyilo Jakarianyi nonugv Pwknvyarnvnaam gvla yugwng gv pingko lo gwngnrw gwkunamv. ³⁶ Ngo minam gvbv nonua jvjv bv minpa jidunv: So gwngnrw gwnv mvnwnngnga mvriririt svngv vjagv nyi vdwlo doolwk rikunv!

Jisu gv Jerusalem a paknam
(Lk 13:34-35)

³⁷ “Jerusalem, Jerusalem! Nonu nyijwk vdwa mvkito okv Pwknvyarnv gv nonu gvlo gindungpingko vngmunam vdwa nonu vlnwng orkito! Vdwnvgo ngo noogv nyi mvnwnngnga laakhv laakyum dubv ridukubv, poruk rokvnv gv ruu vdwa ninyigv laap lokv lapyumnam aingbv, vbvritola nonu ngam vbv rimuma! ³⁸ Okv vkvlvgabv nonugv Pwknvyarnvnaam ma toapagga laku oguka dooku mare. ³⁹ Vjagv lokv rila, ngo nonua mindunv, vdwlo nonu, “Ahtu gv amin lokv aanv nga Pwknvyarnv boktalwkji laka” vla mima dvdvlo, nonu nga vdwloka lvkodv kaapa kumare.

24

*Pwknvyarnvnaam gv yakse nga Jisu mintoku
(Mk 13:1,2; Lk 21:5,6)*

¹ Jisu Pwknvyarnvnaam ma vngyula vngrilo ho ninyigv lwbwlaksu vdwv aala ho gv naam vdwa kaakw tvkv vla ninyia mintoku. ² “Umkv” vla nw minto, “Nonu so mvnwng sum kaanamv alv rungpv. Ngo so nonua minpa dunv: So gv vlwng pwgoka dooku lo doobwng kumare; bunu mvnwngnga ngorlula ngorra rikunv.”

*Adwkaku okv mvdwkmvku
(Mk 13:1-2; Lk 21:7-19)*

³ Jisu gv Olib moodw lo dootung rilo, lwbwlaksu vdwv aasila nw gvlo aatoku. Bunu ninyia minto, “Ngonua minpalabv, vdwlo so minam vdw si ritv tvdunv, okv noogv aadw hvku okv so si sichingmooku gv ataranya aluv vla kaachin dubv ogugo ritv tvdunv.”

⁴ Jisu bunua mirwkto, “Nonuno hima kaaya sutoka, yvnyika mvvkup rikup koyoka. ⁵ Nyi achialvgo, ngam mingingnv vdwv, aare okv minre, ‘Ngoonv Kristo!’ okv bunu nyi achialvgo mvvkupre. ⁶ Nonuno nyimak gv sudu pvbinna, adubv okv nvchibv tvvpa tvdu kunv; vbvritola adwkaku mabvka. Hvkvnvngv rirungjinv, vbvritola hv bunu ataranya alu hv aarikunv vnam kaama. ⁷ Diringmooku vdwv mvmi sireku, Karv vdwv pami sireku. Hoka dvmayarwng ngv okv moobi hv mooku mvnwnglo rireku. ⁸ So ogumvnwng si kuu bvngtubvngke bv bvngrianyi, achichinam apiabv rire.

9 “Vbvrikunamv nonua mvriririt dukubv okv mvki mvmar dukubv laklwk reku. Nyi vdw mvnwngngv ngoogv lkwnglo nonua kaanwng kumare. ¹⁰ Hvbv ririlo achialv nyi go bunugv mvngjwng nga ngoomu reku; bunu koa minsureku okv kaanwng kumabv rimi sireku. ¹¹ Vbvrikunamv mvvnvrnv nyijwk vdwv aalwk reku okv achialv nyi go mvvkup rikup reku. ¹² Hvkvnv vdwv alvmanv nga dupwng monv gubv rireku, hoka nyi mvnwnggv pakmi sunam mv, ngeya yaya reku. ¹³ Vbvritola yvvdw gakbwngla ataranya lobv doolin redw, hv bunu ringnam a paare. ¹⁴ Okv so gv Alvnv Yuning Karv gv lkwng nga nyi vdw mvnwngnga tvvmu dubv nyiamooku mvnwnglo jago karreku; vbvrigvrikula ataranya aluv aariku.

Achialv bv busu
(Mk 13:14-23; Lk 21:20-24)

¹⁵ “Nonuno nyijwk Daniel gv minam, ‘Achialv bv Alvmanv Busu Namgo’ kaapare. Hv darwknv mooku lo dakdung reku.” (Puririnv vdwa minpa jidu: Si ogugonyi mindunv chinlaka!) ¹⁶ “Vbvrikunamv yvnbunudw Judia lo ridunv, hv bunu moodw vdwlo kicha runglaka. ¹⁷ Nyi gunv ninyigv namwng aolo doonv, vdwloka naam arwngbv aala ninyigv yikungyira nga naadubv rirung mabvka. ¹⁸ Nyi gunv rongolo rinv vngkur la ninyigv vji laklwk a naadubv rirung mabvka. ¹⁹ Ho aluv mvvga kuu gvnv gvbv okv anv kuu anga doonv gvbv achialv bv mvngru

runam gubv rire. ²⁰ Pwknvyarnvnyi kumtoka, ho no kamching poolu lo okv Jius Doonu alu lo jokyu la jokkwng madubv! ²¹ Ho gv hirukaya ngv maatarbv hinchu manam alvkuma nvgobv rila, ho gv mooku hoka lvkoka rikw manam gubv rire, nyiamooku gv rirap lokv vjakgv alu lobv. Okv vbvdvdvbw hoka lvkoka rikw kumare. ²² Vbvritola Pwknvyarnv ho gv alua loodwng mopvkunv; Nw vbv mvma nvggo yilo, yvka svngnyu mapvnvpv. Ninyigv darnam nyi vdwgw lvgabv, ogubvrijvka, Pwknvyarnv ho alu vdwa loodwng mopvkunv.

²³ “Vbvrikunamv, nyi gunv nonua, ‘Kaatoka, Kristo si doopvku!’ vmalo ‘V nw doopv!’ vla minbolo—ninyia mvngjwng mabvka. ²⁴ Mvvnvrurv Kristo vdww okv mvvnvrurv nyijwk vdww aalwk reku; bunu kairungbv lamrwpanam rila okv kaasartabobv rire, okv rilabolo Pwknvyarnv gv darnam nyi vdwa kupdubv mvre. ²⁵ Tvvrriato! ngo nonua hv ritv madvbv mincho jidunv.

²⁶ “Vmalo rinyu bolo nonua vbv mintamre, ‘Kaatoka, nw chukrimooku v redu!’—hoka vngma bvka; vmalo bunu ‘Kaatoka, nw si tosila doopv!’ vla minbolo, um mvngjwng mabvka. ²⁷ Nyia Kuunyilo ngv dooriak jvbv nyidomooku mvnwngnga doonyi chaagu kiamngv lokv aagia kiamngv lobv lounv ngv ungpola aariku.

²⁸ “Ogolo svma ngv dooridw, adwn dvnv pvta ngv dookumre.

Nyia Kuunyilo gv aakunam
(Mk 13:24-27; Lk 21:25-28)

29 “Hirukaya alu vdwv vngro danam gula, doonyi v kanv riku, pooluv ungu mare, nyido tologv takar vdwv holu reku, okv nyidokolo tologv jarkarnv jwkrw gvnv vdwwka bunugv lamtv lokv ngeriku. ³⁰ Vbvrrikubolo Nyia Kuunyilo ngv nyidomooku tolo kaachin dubv rilwk reku; okv sichingmooku so gv nyi mvnwngngv Nyia Kuunyilo gv jwkrw gvla okv kairungbv yunglit nvgobv rila doomwk lo aaku nama kaala kapnya riku. ³¹ Kairungnv tapung ngv mire, okv ninyigv nyidogindung vdwa sichingmooku gv chvnyung api lo vngmure, okv vbvrkunamv bunu vngla ninyigv darnam nyi vdwa Siching gv kvdw dootar gunv lokv dootar gunv lobv naakum reku.

*Koksitkokrik singnv lokv kaachin sinam
(Mk 13:28-31; Lk 21:29-33)*

³² “Nonuno kaachin sinam lvgabv koksitkokrik singnv nga tamsar ako sarku laka. Vdwlo so gv hakbv vdwv jejila kaapu laku okv anv harlin laku riku bolo, nonuno dvrw hv nvchi duku vla chindu. ³³ Hvkv aingbv, vdwlo nonu so mvnwng sum kaaku bolo, nonuno dw ngv nvchi duku, rirap tvduku vla chinreku.* ³⁴ Mvnggap laka so mvnwng si richore vjakgv nyi singnv mvnwng si sitv madvbv. ³⁵ Siching nyido ngv ngelare, vbvri-tola ngoogv gamchar vdwv vdwloka ngemare.

*Yvyka ho alu okv dwa chinv kaama
(Mk 13:32-37; Lk 17:26-30,34-36)*

24:29 Aij 13:10; Jol 2:10,31; 3:15; Nyikrw 6:12,13; Aij 13:10; Eje 32:7; Jol 2:10; 3:15; Aij 34:4; Nyikrw 6:13 **24:30** Dan 7:13; Jek 12:10-14; Nyikrw 1:7 * **24:33** Megonv kitaplo domado kuunyilo ngvma

³⁶ “Ogubvrijvka, yvvka ho alu okv dw v vd-wlo aatv rinvdw chin v kaama—nyido tologv nyi-dogindung ngvre vmalo Nyia Kuunyilo ngvre; Abu mvngchik chindu. ³⁷ Nyia Kuunyilo gv aanam hv Noah gv dw lo ogugo ripv kudw ho apiabv rireku. ³⁸ Ho alu svcharmoyar gv aatv madvbv nyi vdww dvdikdvyik nyato, nyimv ny-ilo vdww nywng nyilubv naami sinya toku Noah gv svpw lo aalwkri alu hoka; ³⁹ vbvritola bunu mvngdin kuma, Anyungnga bunua svcharmoyar isihv tvvlula nungla vnggv toku. Nyia Kuunyilo gv aari kunyi vbvdvdvbv rireku. ⁴⁰ Ho gv dw lo nyi anyi gunv rongo ribamre: akonyi naareku okv akonyi hoka kayu reku. ⁴¹ Mvnga anyi gunv chvngpar lo daa hwgba sure, akonyi naareku okv akonyi hoka kayu reku. ⁴² Vbvrikunamv, nonuno hima sulaka, ogulvgavbolo nonu chima ogunv alulo nonugv Ahtu aarikudw. ⁴³ Naam atuv dvcho nvngv aadw a chinku bolo, nonu jvjvbw chinsudo nw yupma bv hula doogv rila, ninyigv naam a dvcho nvnga cholwk momare. ⁴⁴ Vkvlgabv nonuka lokia agearap sula doolaka, ogulvgavbolo Nyia Kuunyilo ngv nonugv ninyia dvminmabv dooridw gunyi aariku.

*Jwkjwkvrvknv okv jwkjwkvrvk manv Pakbu
(Lk 12:41-48)*

⁴⁵ “Vbvrinamv, yvvla alvnnv okv mvnglaknv pakbu hv? Ho angv hvkv nvgo ninyigv atu hv ninyia kvvbi pakbu vdwa kaayataya mola dwdw tvngdw lo dvmu tvngmunv akobv pvvnam angv. ⁴⁶ Vdwnvgo mvngpu gubv rire vdww lo ninyigv atuv

naam aari kunyi ninyia vbvridubv kaaku bolo. ⁴⁷ Rinam gvbv vbvriri nvpv ngo nonua minpa jidu, ninyigv atuv ninyia ninyigv yikungyira mvn-wngnga kaayataya nvgobv jire. ⁴⁸ Vbvrিতola nw alvmanv pakbu gubolo, nw atubongv minsu dunvpv nw gv atuv baapubv aakur kumare. ⁴⁹ Okv nw ninyigv pakbu ajin vdwa dvngrap dunvpv okv dvkium tvngkium dubv dvdu tvngdu nvpv. ⁵⁰ Vbvrikunamv ho pakbu gv atuv alu gunyi ninyigv dvminmabv doori gulo okv ninyigv chima dw alulo aakur riku. ⁵¹ Atuv ninyia patungpayung †mvreku, okv ninyigv kaakudubv rinam aje nga naaria nvbv mvre. Hoka nw kapreku, okv hijung nga kotwkkwrk sireku.

25

Nyijar vring nga minchisinam

¹ “Ho alu lo Nyidomooku gv Karv ngv vbvrire. Lvkogulo nyijar vring go dooto, bunu bunugv mvdurupum a naalayila makbu rijibonga kaarwk sibv vnglin nyatoku. ² Angu gunv pvcha nyato okv kvvbi angu gunv mvnglak nyato. ³ Pvchanv vdww bunugv mvdurupum a bvngla vngnyato vbvritola bunu tvli gvpwng mato. ⁴ Mvnglaknv angu hv bvngia nvnvlo bunugv mvdurupum lvgabv tvli vkv yarbing dubv bvngtoku. ⁵ Makbu rijibongv aadu bv tapv toku, vkvlgabv nyijar vdww yumi mirapla yupngak nyatoku.

⁶ “Ayuyupra bv ritoku, ho sudu go dulinto, ‘Siinv makbu rijibongv! Aala okv ninyia kaarwk

† **24:51** Ninyia patung payung mvto; Vmaloninyia agum orlinto **25:1** Lk 12:35

sulakuka!’ ⁷ Nyijar vring ngv hurap nyala bunugv mvdurupum baanu nyatoku. ⁸ Vbvrikunamv pvchanv vdwv nyebanv vdwa minto, ‘Klai, ngonua nonugv tvli lokv jilabv, ogulvgavbolo ngonugv mvdurupum hv ngejiku.’ ⁹ Nyebanv vdwv mirwkto, ‘Ma,’ ‘Nonu gvbv la ngonu gvbv tvli hv chimare. Dukan lo vngnyika okv nonuno lvgabv rvvti laka.’ ¹⁰ Vkvlgabv pvchanv nyijar vdwv tvli mego rvvdubv vngnya toku; okv bunugv vngro kochingbv makbu rijibongv aatoku. Nyijar angu kaayanv vdwv makbu rijibonga lvkobv nyida dvpam lo vngming gvtoku, okv agi a koktum toku.

¹¹ “Ayungjvma nga kvvbi vdwv aalwk nyatoku. Bunu, ‘Tamsarnv, tamsarnv! Ngonua arwng aamu labv!’ vla kapla goknya toku. ¹² ‘Ma rung! Ngo nonua chima,’ vla makburijibongv mirwk toku.”

¹³ Okv Jisu minyabv mintoku, “Vbvrikunamv nonuno hinsu laka, ogulvgavbolo nonu alu vmalo dw nga chima.

Pakbu aom a minchisinam
(Lk 19:11-27)

¹⁴ “Ho alu lo Nyidomooku gv Karv ngv svbv rire. Alu gulo nyi ako dooto, nw adu lo moing vngtv tvvto; nw ninyigv pakbu vdwa goklwk gvrila ninyigv yikungyira nga kaaya dubv tinglwk toku. ¹⁵ Nw nyi vdwa rilajinv nga kaala akin—akin a kaagvrila jito: Akonyi nw ain lokdwng hejar angu go jito, akonyi hejar anyigo okv akonyi nw hejar akin go jito. Vbvrikunamv nw moing vngyu

toku. ¹⁶ Hejar angu lokdwng go naarwknv pakbu angv vjakgobv vngda bongv ninyigv morko nga mvjinmvta toku okv hejar angu godv mvlin jitoku.

¹⁷ Ho apiabv ain lokdwng hejar anyigo naarwk sinv pakbu angv hejar anyi godv mvlin jitoku.

¹⁸ Vbvritola lokdwng hejar go naarwk sinv pakbu angv vngla, kvdw lo ungrung go dutola ninyigv Ahtu gv morko nga hoka vvsu toku.

¹⁹ “Achialvgo ayungjvma nga ho pakbu vdwgv atu angv aakur toku okv bunua lvkobv morko nga sapka toku. ²⁰ Lokdwng hejar angu go naarwksinv pakbu angv aatoku okv hejar angu go paatam nam hum laklwk toku, okv minto, ‘Atu, no ngam lokdwng hejar angu go jito, okv kaatoka! siinv ngo kvvbi hejar angu gudv ngo paalwk pvkunv.’

²¹ ‘Albv ripv, no alvnvgo okv jwkjwkvrwknv pakbu go!’ ninyigv atuv minto, ‘No miangnv morko nga albv mvjinmvtapv, vkvlgabv ngo nam kainv morko nga kaaya modubv jire. Aatoka, soka okv ngoogv himpua pumin gvlaka.!

²² Vbvrikunamv pakbu morko lokdwng hejar anyigo jinam angv aala okv minto, ‘Atu, no nga lokdwng hejar anyigo jito. Kaatoka, vjak ngo hejar anyi godv paalwk pvkunv.’ ²³ ‘Albv ripv, no alvnvgo okv jwkjwkvrwknv pakbu go!’ ninyigv atuv minto. ‘No miangnv morko nga albv mvjinmvtapv, vkvlgabv ngo nam kainv morko nga rigv modubv jire. Aatoka, okv ngoogv himpu lo pumin gvlaka!’

²⁴ Vbvrikunamv lokdwng hejar akin go naarwk sinv angv aala okv minto, ‘Tamsarbo, ngo chindu no raainv nyi go; no noogv rongv mvma kolo aam gvdu, okv no noogv aam chima kolo aam nvvdu.

²⁵ Vkvlgabv ngo busula vngla noogv morko nga kvdw lo vvsi pvkunv. Kaatoka, siinv no gvngvku.’

²⁶ Ninyigv atuv ninyia mintoku, ‘No alvmanv okv svpenv pakbu go!’ ‘No nga rongo mvma kolo aam gvduvb okv aam chima kolo aam nvvdubv chindu ai? ²⁷ Vbvriku nvgo yilo, alv rinvpv, no ngoogv morko nga morko benk lo lvktola ngoogv aakur rikulo kuu naatak la ngo naaku nvgo yilo.

²⁸ Vjak morko nga nw gvlokv dvrit gvri kula nyi morko lokdwng hejar vring go doonv lo jitoka.

²⁹ Yvvdw ogugo doodudw, um jitam yayare, okv nw kaiyayabv dooreku; vbvritola yvvniv ogu guka dooma dunv, ninyigv achukgo doonam haka nw gvlokv dvrit jireku. ³⁰ Svbv alvmabv rin v pakbua—agum kanv kolo ninyia ora tvka; hoka nw kapla hijung nga hitwkkwkw sireku.’

Ataranyabv jwngkadaka kunam

³¹ “Vdwlo Nyia Kuunyilo ngv Dvbv bv rila aarikudw okv nyidogindung mvnwnngv ninyia lvkobv aariku, nw ninyigv Dvbv dooging lo dootung reku, ³² okv diringmooku mvnwnng gv nyi vdw mvnwnngv ninyigv kaagialo dookum reku. Vbvrikunamv nw bunua anyi gubv mvpin sureku, svlar kaaya nvgv svlar hala yabin a mvpin sunam apiabv. ³³ Nw alvnnv nyi vdwa ninyigv lakbik kiamlo vvpv reku okv kvvbi vdwa ninyigv lakchi tangvlo vvpv reku. ³⁴ Vbvrikunamv Dvbv ngv ninyigv lakbik tangvlo nyi daknv vdwa minreku, ‘Aatoka, nonuno ngo Abu gv aya jinam vdwv! Nyia mooku a pwkri lokv nonugv lvgabv pwklin

jikunam Karv nga aala kaato kuka. ³⁵ Ngo kano toku okv nonu nga dvmu toku, tvngnwngto nonu nga tvngse go jitoku; ngo nyen bv rito nonu nga nonugv naam lo naarwk sutoku, ³⁶ vji gvvpa mabv abinto nonu nga vji gvmutoku; ngo lvvmato okv nonu nga ringchum yato, patwklo dooto okv nonu nga kaalwk toku.’ ³⁷ Alvnv nyi vdwv ninyia mirwk reku, ‘Ahtu, vdwlola, ngonu nam kano kvvbi kaapa namv okv nam dvmu kunamv vmalo tvngnwng kunam a tvngse go jinamv? ³⁸ Vdwlola ngonu nam nyen bv kaala ngonugv naam lo nam aamu namv, vmalo abin dubv kaapala nam vji gvmunamv? ³⁹ Vdwlola ngonu nam lvvma dubv okv patwk doodubv kaala nam kaalwk namv?’ ⁴⁰ Dv bv ngv mirwk reku, ‘Ngo nonua minpa jidunv, vdwlo nonu ngoogv nyi miang nvgo nyika so vdw sum riku bolo, hv ngo lvgabv rinam vku!’

⁴¹ Vbvrikunamv nw ninyigv lakchikiam gv nyi vdwa minre, “Ngo gv lokv vngroto, Pwknvyarnv gv beenam arwng lo doonv vdw nonu! Uyudv bv okv ninyigv nyidogindung vdwgv lvgabv mvpv kunam doobwngnv vmvlo vngroto kulaka! ⁴² Ngo kano toku vbvritola nonu nga dvnam jima, tvngnwngto vbvritola nonu nga tvngse go jima; ⁴³ Ngo nyen bv rito vbvritola nonu ngam nonugv naam vdwlo aamuma, vji koopa mato vbvritola nonu ngam vji jima; ngo lvvmato okv patwklo dooto vbvritola nonu ngam ringchumriaima.’ ⁴⁴ Vbvrikunamv bunu ninyia mirwk sireku, ‘Ahtu, vdwlola ngonu nam kano dubv, vmalo tvngnwng dubv, vmalo nyenbv ridubv, vmalo vji gvvpa madubv, vmalo lvvma dubv, vmalo patwk doo-

dubv kaagvrila ridur maanamv?’ ⁴⁵ Dvbw ngv mirwk reku, ‘Ngo nonua minpa jidu, vdwlo nonu ngoogv nyi miang nvnga ridur maanamv hv nga ridur kuma namv.’ ⁴⁶ Vbvrikunamv, so vdwa hirukaya nyema kolo vngmu reku, okv alvny nyi vdwa turbwngla dookulo vngmu reku.”

26

Nyirunv vdwv Jisunyi rinying toku
(Mk 14:1,2; Lk 22:1,2; Jn 11:45-53)

¹ Vdwlo Jisu so mvnwngnga tamsar sarro kochingbv nw ninyigv lwbwlaksu vdwa mintoku, ² “Nonuno chindu, alu lonyi kochingbv Vngbo Dvmin Pumja ngv, okv Nyia Kuunyilo nga daapo lo takki dubv laklwk reku.”

³ Vbvrikunamv nyibu butvnyv vdwv okv nyiga-gaatv vdwv nyibu Butvyachok Kaipas gv Naam lo kaarwk minsu toku, ⁴ okv Jisunyi naasila naatung gvrila mvkidubv rungyato. ⁵ Bunu minto, “Ngonu Pumja riri soka rima bvjuka, vb-
vribolo nyi vdwv yalungyachung bv rire.”

Jisunyi Betani lo tvli piaktoku
(Mk 14:3-9; Jn 12:1-8)

⁶ Jisu Betani lo Saimon vnam kvvlo taik rila silvmanv gv naam lo dooto. ⁷ Jisu gv dvla doo-rilo, mvvga nvgo takam pvchwng gulo achialv arv doonv nampunv tvli vkv bvla yila, nw gvlo aala dumpo nga pwke to. ⁸ Lwbwlaksu vdwv sum kaatola haachi nyato, “Sum mvnwng sum ogubv mva dunvdw?” Vla bunu tvvka nyato. ⁹ “So

nampunv tvli sum kainvgobv piokgv rila morko nga heemanv vdwlo jibolo alvyare!”

¹⁰Jisu bunugv minam a chintoku, vkvlgabv nw bunua minto, “Nonuno ogubv so mvvga nvnga dwkya dunv? So si alvnvgo rigvnyibv okv ngam kaapu nvgo riji gvibv. ¹¹Nonuno alu gv dwkia heemanv nyi vdwa lvkobv ribam dakbam tvdu, vbvritola nonuno ngam alu gv dwkia lvkobv ribam dakbam tvvma. ¹²Nw gv ngam ogugo rinam si tvli nga ngoogv ayak lo pwke do ngam svma rijinama richo dunv. ¹³Vjak ngo, nonua milv jila mindunv, so Gamlv sum ogolo mooku mvnwnvlo japji rikudw, nwgv svbvrinam sum ninyia mvngpanam gubv minbwng jila minreku.”

Jisunyi Judas koa dukubv tolwk toku
(Mk 14:10-11; Lk 22:3-6)

¹⁴Vbvrikunamv lwbwlaksu vring gula anyi lokv akonv—Judas Iskeriot vnam angv—nyibu butv gvlo vngtoku ¹⁵okv tvvkato, “Ngo Jisunyi nonu gvlo koa lwkji kubolo, nonu ngam ogugo jire?” Bunu raaji lokdwng chaam go saplinla ninyia jitungu. ¹⁶Hokv kongv Judas Iskeriot Jisunyi bunu gvlo laklwk jidukubv vla age kaarap toku.

Jisu lwbwlaksu vdwa lvkobv vngbo dvmin dvbam toku
(Mk 14:12-21; Lk 22:7-13,21-23; Jn 13:21-30)

¹⁷Vpap lwkmbav Vtwng dvdw Pumja gv lotuloke alu lo lwbwlaksu vdww Jisu gvlo aala tvvkato, “No ngonua ogolo noogv lvgabv Vngbokunam dvmin a mvpvripv svgo vla mvngdu?”

18 Nw bunua minto, “Pamtv lo nyi ako gulo vnggv rila minpa tvka: Tamsarbo mindu, ngoogv dw ngv aapvku; ngo la ngoogv lvbwlaksu vdwv vngbo dvmin a noogv naam lo rigingre.’ ”

19 Jisu gv minkubv lvbwlaksu vdwv vngbo dvmin a mvpvripvla riji toku.

20 Vdwlo arium tokudw Jisu la lvbwlaksu vdwv dvbam dvkubv vla dootung nyatoku. 21 Dvnam dvbam rilo Jisu minto, “Ngo nonua minpa jidunv, nonugv lokv akonv ngam koa reku.”

22 Lvbwlaksu vdwv achialbv mvngru nyala okv akonvgv kochingbv akonv ninyia tvvka rap-toku, “Ahtu, jvjvbv no ngam mindu nvgo bri?”

23 Jisu mirwkto, “Yvvdw ngam lvkobv vtwng nga taali lo nwk bok mingv dunv hv ngam koa reku. 24 Nyia Kuunyilo ngv Darwknv Kitaplo oguaingbv minpvdw vbvrila nw sire, vbvritola yvvdw Nyia Kuunyilo nga kupnv hv maatarbv mvngru runam gubv rire! ho nyi anga hv alvyay-ijinyi ninyia dwrwboklin manv guilo!”

25 Judas Iskeriot koanv angv minto, “Tamsarnv, jvjvbvbv no ngam mindu nvgo bri?” Jisu mirwk toku, “No minggv nyibv.”

Ahtu gv Dvtardvnya dvgvnam

(Mk 14:22-26; Lk 22:14-20; 1Kor 11:23-25)

26 Bunugv lvkobv dvdung rilo, Jisu vtwng ariap go naagvrila, umbonyikv vla kumto, pintung piyung toku, okv um ninyigv lvbwlaksu vdwa jitoku. Nw minto, “Sum nonu naato, okv dvtoka, si ngoogv ayak kv.”

²⁷ Vbvrikunamv nw koobu a naatoku, Pwknvyarnvnyi umbonyikv vtoku, okv um bunua jitoku, “Sum nonu mvnwngngv tvngtoka,” nw minto; ²⁸ “Si ngoogv oyi hv, si Pwknvyarnv gv umkvpakv vnamha mvu pvvnamv, ngoogv oyi hv mvnwng gv rimur vdwa mvngnganam lvgabv sarlin jipvuv. ²⁹ Ngo nonua minpa jidunv, vdwlo ngo nonua lvkobv ngo Abu gv Karv lo anw bv aala tvngbam ma dvdvlo ngo sum aala sum vdwloka tvngdv kumare.”

³⁰ Vbvrikunamv bunu miriminpak go minbam pikula Olib Moodw bv vnglin nyatoku.

*Jisu Pitar gv mvvse nga mincho jitoku
(Mk 14:27-31; Lk 22:31-34; Jn 13:36-38)*

³¹ Vbvrikunamv Jisu bunua mintoku, “Siyu gv ayu ching-ching nonu mvnwngngv nga kayupila kiyakkipak nyareku, Darwknv Kitaplo mindu, ‘Pwknvyarnv svlar kaaya nvnga mvkire, okv svlar vdwv kiyakkipak rekunv.’ ³² Vbvritola ngoogv turkurro kochingbv ngo nonua Galili bv vngchoyare.”

³³ Pitar minda minrala Jisunyi minto, “Mvnwngngv nam vngyu dajvka, ngo nam vdwloka vngyu mare!”

³⁴ Jisu Pitarnyi minto, “Ngo nam minpa dunv, siyu gv ayu lo rokpuv kokma dwbv no lvom go ngam chimakv vla minre.”

³⁵ Pitar mirwk suto, “Ngo noogv lvkobv siitv dajvka, ngo vdwloka um mimare!”

Okv lwbwlaksu kvvbi vdwvka vbvdvdbv minya toku.

Jisu Getsemane lo kumtoku
(Mk 14:32-42; Lk 22:39-46)

³⁶ Vbvrikunamv Jisu lwbwlaksu vdwa lvkobv Getsemane vnam mooku lo vngtoku, okv nw bunua minto, “Ngoogv alo vngla kumrilo, nonu soka doolaka.” ³⁷ Nw Pitar nyila Jibedi gv kunyilo anyia nw gv lvkobv vnggv toku. Nw gvlo achialvbv mvngdwk okv mvngruv aatoku, ³⁸ okv nw bunua minto, “Ngo haapok gv mvngruv achialvbv kaiyajvla boktak tvduku, soka dootola ngam lvkobv hula doolaka.”

³⁹ Nw achukgo adubv vngla, kvdw lo gublwk dvla okv kumto, “Ngoogv Abua, so si rila pvbolo, so ngoogv hinchng koobu tvngtv dunam sum naa jilabv! Vbvritola ngoogv mvngnam bvma, noogv mvngnam bvyaka.”

⁴⁰ Vbvrikunamv nw lwbwlaksu aom gvlo aalwk toku bunua yupngakla doodubv kaapa toku; okv nw Pitarnyi minto, “Si ogubv ridu kunvla, nonu ngam lvkobv gunta akin goka hula doonyu madunv? ⁴¹ Huladarla kumla dooto laka, nonuno pokayarka lo holwk madubv. Dow v mvnglwk yadu vbvritola ayak amar v mvngkam yama.”

⁴² Lvkodv Jisu vngla okv kumto, “Ngo gv Abua, so gv hinchng koobu sum ngo tvngma dvdvlo naa nyula manam gubv ridu bolo, noogv mvngnambv riya tukuka.” ⁴³ Nw lvkodv aakur kunamv okv lwbwlaksu vdwa yupngakla doodubv kaapa toku; bunu nyikkv nyiktarla doonyu kuma toku.

⁴⁴ Jisu lvkodv bunua kayupila okv vngla, okv lvom nvbv gamchar minam akin a minla kumto. ⁴⁵ Vbvrikunamv nw lwbwlaksu vdwgvlo aala kula minto, “Nonuno vjaklodvbv doomin yupmin doi?”

Kaatoka, Nyia Kuunyilo nga rimurnv nyi vdwgv laak lo laklwkdw gv aadu kunv. ⁴⁶ Gudungto, klai vnglaju. Kaatoka, siinv ngam koa kunv nyi angv!”

Jisunyi naatung kunam

(Mk 14:43-50; Lk 22:47-53; Jn 18:3-12)

⁴⁷ Jisu gv minbwng rilo, Judas, lvbwlaksu vring gola anyi lokv akonv aalwk toku. Ninyigv lvkobv Nyibu butv okv nyigagaatv vdwgv vngmukunam nyitwng go riokse okv daadwng bvngnv vkv aagv toku. ⁴⁸ Koanv nyi angv nyipam nyi vdwa kaachin modubv mvringmvma go mvrwjito: “Nonu gv naajinam anga ngo mopup nvpvla hum nonu naatung laka!”

⁴⁹ Judas Jisu gvlo vngdavngkala minto, “Tamsarnv, mvngpuv nam dooming gvlaka,” okv ninyia mopup toku.

⁵⁰ Jisu mirwkto, “Ajinha, *um baapu bvkv!”

Vbvrikunamv bunu aalaku, Jisunyi naatungla, okv ninyia achialvbv letwkkrvk toku. ⁵¹ Jisunyi lvkobv rinv vdwlokv akonv ninyigv riokse nga svlin dabuv Nyibu Butvyachok gv nyira gv nyarung nga paalu jito. ⁵² Jisu ninyia minto, “No gv riokse nga svlwk tokuka, yvv mvnwngngv riokse nga naadunv, hv riokse lokv sire. ⁵³ Nonuno chima lare ngo Abunyi ridur lvgabv goklado, okv nw ngoogv lvgabv vjakgobv nyidogindung sipai hejar awgo vngmure? ⁵⁴ Vbvrivotla vbvrinam gubv riku bolo, Darwknv Kitaplo so si vbvrirung svngv vnam gaam vdwv jvjv kumare?”

* **26:50** ho lkvwngnga bapubv, ajen; Vmalonoo soka ogubv dopvny, ajen?

⁵⁵ Vbvrikunamv Jisu nyitwng nga minto, “Nonuno ngam toa kunam nyi aingbv mvngnya la naatung dubv riokse okv daadwng bvngla yila aanyapvi? Alu gv dwkia ngo Pwknvyarnvnaam lo dootung tvla tamsarto, okv nonuno ngam naatung ma. ⁵⁶ Vbvritola so mvnwng si ripvny nyijwk vdwgv Darwknv Kitaplo lvknam vdwa jvjv modukubv.”

Vbvrikunamv ninyigv lwbwlaksu mvnwngngv ninyia kayupila kiyu nyatoku.

Jisu kvbadopam lo daklin toku

(*Mk 14:53-67; Lk 22:54,55,63-71; Jn 18:13,14,19-24*)

⁵⁷ Jisunyi naatung kunv nyi vdwv ninyia Nyibu Butvyachok Kaipas gv naam lo boolwk nya-toku, hoka Pvbv tamsarnv vdwvla okv nyigagaatv vdwv dookum nyatoku. ⁵⁸ Pitar adu-adubv vngming gvtoku, Nyibu Butvyachok gv kvba baaku naam pvrv adu aingbv. Nw kvba baaku naam arwngbv aatoku, okv kaayanv vdwa lvkobv dootung mingv tvla mvnwngngv oguaingbv linri kudw vla kaaria toku. ⁵⁹ Nyibu butvny vdwvla okv kvba nyi vdwv Jisunyi mvkidubv vla mvvnam gungnying go mapadubv rikw nyatoku; ⁶⁰ vbvritola bunu ogugoka mapa matoku, mvnwngngv aala ninyia mvvnamrunam vkv minkwng kubvka. Atar anyabv nyi anyigo aalwk toku ⁶¹ okv minto, “So nyi si minto, ‘Ngo Pwknvyarnvnaam sum mvyakmvchak gvrila okv alu loom kochinglo um ngo mvkor ladoku.’ ”

⁶² Nyibu Butvyachoknv dakrap la okv Jisunyi minto, “Nam gungnying lwknam vdw so no ogu mirwk sise domai?” ⁶³ Vbvrítola Jisu choibv doobwngto. Nyibu Butvyachoknv lvkodv ninyia tvvkato, “Vjak ngo Pwknvyarnv gv amin bv nam tvvka dunv: minpalabv no Kristo okv Pwknvyarnv gv Kuunyilo ngvbolo.”

⁶⁴ Jisu ninyia mirwk sitoku, “No mingvnyibv. Vbvrítola ngo mvnwngnga minpa jidunv: nonu Nyia Kuunyilo nga vjak lokv naalayila Pwknvyarnv gv lakbiklo doodubv okv mokpu haapam lo dootola nyidomooku tolokv aadu bv kaapare!”

⁶⁵ Vbv minam gula Nyibu Butvyachoknv atugv vji a putakpuyak mvgvrila mintoku, “Si Pwknvyarnvnyi nyarjitari namgo! So lvvya lo ngonu gungnying minji nvgo mvngkuma! Nonuno vjak ninyigv Pwknvyarnvnyi nyarjitari nama tvvsu gvibv! ⁶⁶ Nonuno ogubv mvngpv?”

Bunu mirwk suto, “Nw siyin dubv rimur rungpv.”

⁶⁷ Vbvríkunamv bunu ninyigv nyukmu lo tachor chorbiak nyatoku okv dvngtoku; okv ninyia svbiaknv vdvw ⁶⁸ minto, “Kristo no ngonugv lvgabv nyikrw kaakato! Chinkato yvvla nam dvngnv!”

Pitar Jisunyi chimakv vkunam

(Mk 14:66-72; Lk 22:56-62; Jn 18:15-18,25-27)

⁶⁹ Pitar kvba baaku naam agum lo dominto ho Nyibu Butvyachok gv paknv akonv aato, okv ninyia minto, “Nooka Galilian go Jisunyi lvkobv rinvgolaka.”

⁷⁰ Nw mirwk suto, “Noo ogu gonyi mindu nvbvre, ngo hum chima,” vla nw mvnwng gv kaagialo chimakv vla mintoku, ⁷¹ okv kvba japku aajiku agi lo vnglintoku. Kvvbi paknv akonv ninyia kaatola hoka nyi doonv vdwa minto, “Nw ka Najaret lokv Jisunyi lvkobv rinvg.”

⁷² Lvkodv Pitar chimakv vla mvvdvto okv mirwkto, “Ngo jvjv bv milv jidunv ngo ho nyi anga chima!”

⁷³ Achukgo ayungjvma nga hoka nyi daknv vdvw Pitar gvlo aala minto. “Vmabv nooka bunugv lokv akonv, noogv minam mvnwng lokv no atubongv miring sidu!”

⁷⁴ Vbvrikunamv Pitar minto, “Ngo milvla jvjv bv mindunv! Pwknvyarnv nga mvrit laka, ngo jvjv bv mima dunvlo! ngo ho nyi anga chimarung!”

Vbvrikunamv, vjakgobv rokpuv koktoku, ⁷⁵ okv Pitar Jisu gv ninyia minam a mvngpa toku: “Rokpuv koktv madvbv no nga chimakv vla lvom go mvvla minre.” Nw agumbv gwlin dukula achialvbv mvngrula kaptoku.

27

Jisunyi Pilot gvlo boolwk kunam
(Mk 15:1; Lk 23:1,2; Jn 18:28-32)

¹ Arukamchi bv Nyibu butv mvnwng ngvla okv nyigagaatv vdvw Jisunyi rinyingla mvki dukubv rungtoke. ² Bunu ninyia rvngja mvlwk toku, linggv toku, okv Roman gobunor Pilot gvlo laklwk toku.

Judas gv sikunam
(Nyim 1:18,19)

³ Judas koanv angv vdwlo Jisunyi miakaya pvkukv vla chinto kudw, nw mvngdin toku okv raaji lokdwng chaam a naatokula Nyibu butvntv vdwgvlo okv nyigagaatv vdwgvlo bvngkur jitoku. ⁴Nw minto, “Alvntv nyi nga koa la mvki monam si ngo rimur tokubv!”

Bunu mintoku, “Hum ngonu oguriya dubv, hv noogv pwkor paakor gv ridung ngv!”

⁵ Judas lokdwng nga Pwknvyarnvnaam lo orlwk pikula vngtoku; vbvrikunamv vnglaku okv nw atubongv hoksar sila sitoku.

⁶ Nyibu butvntv vdww lokdwng nga naarapla mintoku, “Si oyi morko ngv, okv sum pwknvyarnvnaam gv morko vvpvkolo lwkbolo Pvbv nga rinying jire.” ⁷ Vbv minla koching so bunu ho lvkwng nga minjupminsi toku, ho morko nga bunu pvchwng pwknv nyi gv kvdw a rvvntv nvtu okv hum kvdw a kvvbi mooku lokv aala sintv vdwa svma riikubv mvtoku. ⁸ Hvkv lvkwngbv ho rongo nga ho alu lokv “Oyi rongo” vla mintoku.

⁹ Vbvrikunamv nyijwk Jeremia gv minamv jvjvbv rilin toku: “Bunu raaji lokdwng chaam a naatoku, Israel nyi vdwgv ninyia jidubv vla tolwkkunam morko nga, ¹⁰ okv morko nga pvchwng pwknv nyi gv kvdw a rvvntv nvtoku, Ahtu gv nga minpia aingbv.”

Pilot Jisunyi tvukapak toku
(*Mk 15:2-5; Lk 23:3-5; Jn 18:33-38*)

¹¹ Jisu Roman gobunor gv kaagialo daktoku, hv ninyia “Noo Jius vdwgv Dvbv ngvre?” vla tvuto.

Jisu mirwkto, “No minam hv kv.” ¹² Vbvritola nw minto, Nyibu butvnnv vdwgv, okv nyigagaatv vdwgv gungnying milwknam lo oguka mirwk simato.

¹³ Vkvlgabv Pilot ninyia mintoku, “Nam so ogumvnnwng gungnying milwk nama no tvvpa madunvre?”

¹⁴ Vbvritola Jisu gangoka mirwk sumato, hum kaala gobunor angv achialvbnv lamtoku.

Jisunyi simu dukubv minkunam

(Mk 15:6-15; Lk 23:13-25; Jn 18:39-19:16)

¹⁵ Vngbokunam Pumja rirap dwkibv Roman gobunor hv nyitwng gv koonam patwklo tumnam nyi akonyi tulin dukubv ribwng ako dooto.

¹⁶ Ho gv dw lo mvnnwng gv chimbwng kunam nyi ako aminv Jisu Barabas vnamgo patwklo dooto.

¹⁷ Vkvlgabv vdwlo nyitwng ngv aakum tokudw, Pilot bunua tvvkato, “Nonuno nga nonugv lvgabv yvvnyi tulin svgo vla mvngdu? Jisu Barabas vnam sumre, vmalo Jisu Kristo vnam sumre?” ¹⁸ Jius nyi kainv vdww Jisunyi kavtarv laila ninyia nw gvlo laklwk pvnv vla Pilot alvrungbnv chintoku.

¹⁹ Pilot gv jwngkadakaku doosing lo dootungla doorilo ninyigv nyimv ngv gaamgo milwkla mimuto: “Ho nyi alvnnvnga oguka rima bvka, ogulvgavbolo siyu ngo yuma mala, ho nyi angv gv lvkwngbnv achialvbnv hirukaya himpvnv.”

²⁰ Nyibu Butvnnv vdww okv nyigagaatv vdww nyitwng nga Barabasnyi anyubv tulin tvkv okv Jisunyi mvki tvkv vla Pilotnyi mintokv vla miarto.

²¹ Vbvritola Pilot nyitwng nga tvvkato, “So nyi

anyi sokv yvnyi ngam nonugv lvgabv tulin jilabv vla mvngdu?”

“Barabasnyi” vla bunu mirwkto.

²² Pilot bunua tvvkato, “Vbvrikunamv Jisu Kristo vla minam sum ngo ogu mvdubv?”

Bunu mirwkto, “Nyinyi daapo lo takkito!”

²³ Vbvritola Pilot tvkato, “Nw ogurimur go ripv?”

Vbvrikunamv bunu gamtvyayabv gokla minto: “Nyinyi daapo lo takkito!”

²⁴ Vdwo Pilot so ribwng minbwng tvbolo oguanyung kaamare, yalungyachung yabvya riya jinv go vla kaapa tokudw, nw isi koobu goya naagv rikula, si nonugv rinam mv, ngogv bv so nyi gv sinamv ogu aje doyama vla nyitwng gv kaagialo lasok toku.

²⁵ Nyitwng lokv nyi mvnwngngv mirwkto, “So nyi gv sinam gv aje nga ngonu gvlo okv ngonugv umvuu vdwgvlo doolwk molaka!”

²⁶ Vbvrikunamv Pilot Barabasnyi bunugv lvgabv anyubv tulin jitoku; okv Jisunyi svnyak pamuro kochingbv nw Jisunyi bunu gvlo daapo lo takki modukubv laklwk jitoku.

*Sipai vdww Jisunyi nyarjikau toku
(Mk 15:16-20; Jn 19:2-3)*

²⁷ Vbvrikunamv Pilot gv sipai vdww Jisunyi boola yila gobunor gv naam lo aagv toku, okv nyi mvnwngngv ninyia doyumdochi nyatoku.

²⁸ Bunu ninyigv vji a pilin toku okv vji lwngching lwngbo nvgo pilwk toku. ²⁹ Vbvrikunamv bunu tvv doonv hakbv ako naala um biotung bv mvtola

ninyigv dumpo lo pilwk toku, okv bangngi daago ninyigv lakbik laak lo laklwk gvrila; vbvrikunamv bunu ninyigv haabo lo gublwk gvrila nyarjikau nyatoku. Bunu minto, “Jius gv dvbv, turbwng laka!” ³⁰ Bunu ninyia tachor chorbiak nyatoku, okv laak gv bangngi nga naaritla ninyia dumpo nga dvngto. ³¹ Vdwlo bunu ninyia nyarjikau rise nga rinya tokudw, bunu ninyigv jvkoklaklwk ka naalin toku okv ninyigv vji gvvbwng nga pikur lwktoku. Vbvrikunamv bunu ninyia daapo lo takki dubv vla vnglin gvtoku.

Jisunyi Daapo lo takki kunam
(Mk 15:21-32; Lk 23:26-43; Jn 19:17-27)

³² Vbv bunugv vnglinla vngdungrilo, bunu Sairene lokv nyi aminv Saimon vnam a vngrwk suto, okv sipai vdvw ninyia Jisu gv daapo nga baktokv vla mintap minrap to. ³³ Bunu Golgota vnam kvdw lo aalwk toku, so gv minam si, “Dumpo pakumku.” ³⁴ Hoka bunu Jisunyi kvchaknv mvy-omvchinam opo vkv jito; vbvritola um Jisu riakka gvrila tvngku mato.

³⁵ Bunu ninyia daapo lo takki toku okv vbvrikunamv ninyigv vji a vlwng likw sila orpin oryin minsu toku. ³⁶ Vbv mvro kochingbv bunu hoka dootung tokula ninyia kaaria nyatoku. ³⁷ Nyinyia gungnying lwknam hum bunu: “Si Jisu, Jius vd-wgv Dvbv ngv” vla lvktokula, nyi mvnwngnga kaamu dubv vla ninyigv dumpo aolo timpv jitungu.” ³⁸ Vbvrikunamv bunu Jisu gv lvkobv rimurnv nyi anyi guka, akonyi ninyigv lakbik

tangvlo okv akonyi ninyigv lakchi tangvlo daapo lo paggin pvvtoku.

³⁹ Hoka vngpiknv nyi vdwv Jisunyi kaagvrila dumpo ngv dumpv-dumpvla nyarjikau nyatoku: ⁴⁰“No, Pwknvyarnvnaam a mvyak gvrila okv hum alu loom lo mvdi tvkunv! No Pwknvyarnv gv Kuunyilo ngvbolo atubongv ringsu tvkuka! Daapo lokv itokuka!”

⁴¹ Ho apiabv Nyibu butvnnv vdwv okv Pvbv tamsarnv vdwv okv nyigagaatv vdwv ninyia nyarjikau nyatoku: ⁴²“Nw kvvbi vdwa ringdu, vbvritola nw atubongv ringsu nyumado! nw Israel gv dvbv mangvri? Vjak nw daapo lokv ikubolo, ngonu ninyia mvngjwng riku! ⁴³ Nw Pwknvyarnvnyi mvngjwng nvgo, okv Pwknvyarnv gv Kuunyilo bv minsudo. Vbvrkunamv alvpv, kaaria laju, vjak Pwknvyarnv ila ninyia ringri kudw!”

⁴⁴ Nvnnya lvkobv daapo lo pakpvnarnv rimurnv nyi anyi hvka, ninyia ho apiabv nyarjikau toku.

Jisu gv sikunam

(Mk 15:33-41; Lk 23:44-49; Jn 19:28-30)

⁴⁵ Alu lopo lo mooku mvnwnglo kanvjeriak toku, hv gunta aom gobv doobwngto. ⁴⁶ Alu gv aom baji nvnvlo Jisu achialvbv svgekla gokto, “Eli, Eli lema Sabakthani?” So gv minam si, “Ngoogv Pwknvyarnv, ngoogv Pwknvyarnv, no nga ogubv topu duku nvla?”

⁴⁷ Hoka nyi mego daknv vdwv tvvpa gvrila minyato, “Nw Elijanyi gokdu!” ⁴⁸ Bunugv lokv akonv vjakgobv joklwkla, svngchak alum a naala,

27:39 Miri 27:7; 109:25
22:8 **27:46** Miri 22:1

27:40 Mt 26:61; Jn 2:19
27:48 Miri 69:21

27:43 Miri

kungsoknv opolo svbok gvrila, okv um singda nyiktoklo putin tvla, okv ninyia tvngmu dubv rikw toku.

⁴⁹ Vbvritola kvvbi vdwv minto, “Dooyato, lvkonyika Elija aala ninyia ringji nvgobvre, kaaria laju!”

⁵⁰ Jisu lvkodv achialvbv svgokla, okv saknamma saknya toku.

⁵¹ Vbvrikunamv Pwknvyarnvnaam lo vji torchik nvnv ngv adum lokv ako lobv anyi gubv takpin sutoku. Sichingmooku si moobi hwktoku, lvngtak kv takpin takyin sutoku, ⁵² nyibung ngv detakla kokdariaka patoku, okv Pwknvyarnv gv nyi sikunv vdwv turkurla svngnya toku. ⁵³ Bunu nyibung nga vngyu nyatoku, okv Jisu gv sitokula turkurro kochingbvku, bunu Darwknv Pamtv lo vngnya toku hoka nyi achialvgo bunua kaatoku.

⁵⁴ Armi nyigam angvla okv sipai ninyia lvkobv rila Jisunyi kaadungnv vdwv moobi hwknam a okv nvgwng nvbv rinam a kaatokudw bunu achialvbv lamngak nyato okv minto, “Jvjv rungbv nw Pwknvyarnv gv Kuunyilo gurung!”

⁵⁵ Hoka mvvga achialvgo doonyato, bunu adu lokv kaanyala doonyato, bunu Jisunyi Galili lo vngming gvnnv, okv ridurnv vdwv. ⁵⁶ Bunu vdwv, akonv Meri Magdalene, Jems gvla Josep gv anv Meri, okv Jibedi gv nywng.

Jisunyi nyibung riikunam

(Mk 15:42-47; Lk 23:50-56; Jn 19:38-42)

⁵⁷ Vdwlo ho arium tokudw, Arimatia lokv nyitv nyi go aachi toku, ninyigv aminv Josep, okv nw

ka Jisu gv lwbwlaksu go. ⁵⁸ Nw Pilot gv dookulo aala okv Jisu gv svma nga kootoku. Pilot svma nga Josepnyi jidubv milin jitoku. ⁵⁹ Vkvlgabv Josep svma nga naatoku, vji pakria anwnv lokv puching toku, ⁶⁰ okv um nw atubogv nyibung lo joolwk toku, hv ninyigv vlnwng lvngtak ka ungrungbv kodak sopik namgo. Vbvrikunamv nw vlnwng pwktv nvgo nyibung agi a ngortum pikula vngyu toku. ⁶¹ Meri Magdalene okv kvvbi Meri gunv nyibung nga doorwk tvla dootung nyato.

Nyibung nga sipai dakya motoku

⁶² Alu logo nvnga, hv Jius Doonu alu bv rito, Nyibu Butvnnv vdwvla Parisiis vdww Pilotnyi lvkobv kaarwk sutoku ⁶³ okv minto, “Tamsarnv, ngonu mvngpadu ho nyi mvvnnv angv gv turla rire hoka nw minto, ‘Ngo alu loom kochinglo turkur reku.’” ⁶⁴ Vbvrikunamv, no ninyigv nyibung nga alu loom nvnv tolo lobv sipai vdwa mingvrila dakria motoka, ogulvgavbolo ninyigv lwbwlaksu vdww aala nw gv svma nga chola madubv, okv vbvrikunamv nyi vdwa nw sinam lokv turpv kunv vla mima dubv. So gv ataranyabv mvvnam angv si mvvcho kunam vdwa kaiyabv alvmanv gubv riya nvpvla.”

⁶⁵ Pilot bunua mintoku, “Dakria moto laka, okv nyibung nga nonugv lvgvlvma lokv haatinklin dubv mvto laka.”

⁶⁶ Vkvlgabv bunu vnglaku nyibung nga achialvbv haatinklin dubv mvgvrikula kaachin dubv vlnwnglo mvu lwktoku okv sipai vdwa dakria nyadubv vngyu nyatoku.

28

Turkurkunam (*Mk 16:1-10; Lk 24:1-12; Jn 20:1-10*)

¹ Jius vdwgv Doonualu kochinglo, Vjwng alugv aru doonyi nyilin rilo, Meri Magdalene okv dvbv Meri akonv nyibung nga kaalwkbv vngtoku. ² Lamdokpada dubv hoka moobi go achialvbv hwkto; nyidomooku tolokv Ahtu gv nyidogindung ngv itoku, vlwng nga ngora jitola okv hoka dootung toku. ³ Hv dooriak jvbv kaanam go, okv ninyigv vjiv tapam aingbv yapung toji toku. ⁴ Dakyanv sipai vdww bunu achialvbv busu sungak laku jinjinpaparla nyi sinv aingbv rinya toku.

⁵ Nyidogindung ngv mvvga vdwa mintoku. “Nonuno busu rungma bvka, ngo chindu nonu daapo lo takkinam Jisunyi makar dunvgo. ⁶ Nw si domakv; nw turrapla gudung ropvkunv, ninyigv minam aingbv. Soka aala kaatoka ninyigv karku a. ⁷ Vjak baapubv vngnyika, okv ninyigv lwbwlaksu vdwa minpa jilaka, ‘Nw sinam lokv turkur pvkunv, okv vjak nonua vngchoyala Galili bv vngdungdo; hoka nonu ninyia kaapa reku!’ Ngo nonua ogugo minpvdw mvngpa laka.”

⁸ Vkvlgabv bunu baapubv nyibung nga vngyu toku, busu bvla okv mvngpu bvla ritola, ninyigv lwbwlaksu vdwa minpa dubv joktoku.

⁹ Lamdokpada dubv Jisu bunua kaarwksula okv minto, “Mvngpuv nonugv lvkobv dooming gvlaka.” Bunu nw gvlo aatoku okv ninyigv lvpa nga jarbwng nyatola ninyia kumnyajonya toku.

¹⁰ Jisu bunua minto, “Busu mabvka, vngnyila

ngoogv boru vdwa Galili lo vngdubv minpa jiteka, okv hoka bunu ngam kaapa reku.”

Nyibung nga dakyanv vdwgv minpakunam

¹¹ Mvvgv vdwgv lamtvlo vngdungrilo, nyibung nga dakrianv sipai megonv pamtv bv vngkur lakula ogugo ripvkudw ho mvnwngnga Nyibu butvnnv vdwa minpa jitoku. ¹² Nyibu Butvnnv vdwv nyigagaatv vdwa kaarwksula bunugv mvngnam a rungtoku; bunu sipai vdwa morko achialvbv jitola ¹³ okv minto, “Nonu vbv minlaka, nonugv yupla doorilo, ninyigv lwbwlaksu vdwv ayu bv aala ninyigv svma nga dvchoola baggv yinv vlaka. ¹⁴ Okv so yunying sum gobunor tvvpa bolo, ngonu ninyia tvvlwk dubv minre, ho vdwv chimapvnnv vla, ho lvgabv nonu mvngdwk mabvka.”

¹⁵ Nyibung nga Kaayanv sipai vdwv morko nga naagvrikula, bunugv minkubv riji toku. Okv vkvlvgabv so yunying sum Jius nyi vdwv vjaklodvbv dugola dupwng modu.

Jisu ninyigv lwbwlaksu vdwa kaarwk sitoku

(Mk 16:14-18; Lk 24:36-49; Jn 20:19-23; Nyim 1:6-8)

¹⁶ Lwbwlaksu vring gula akin vdwv Jisu gv vnglakv vku Galili gv moodw lo vngtoku. ¹⁷ Vdwlo bunu ninyia kaapa tokudw, kvgonv mvngjwng matolaka, bunu nvnyia kumtojetoku. ¹⁸ Jisu bunugv nvchilo aala minto, “Ngam nyidomooku okv sichingmooku mvnwngnga rigvdogv nvgobv jipvkunv. ¹⁹ Vbvrikunamv, nyi vdw mvnwng gvlo

vngnyika okv bunua ngoogv lwbwlaksubv mv-teritekuka: bunua Abu gvla, Kuunyilo gvla, okv Darwknv Dow gv amin bv baptisma jilaka, ²⁰ okv ngoogv nonua gamki nama bunua tamsar gvrila tvvmurimu laka. Okv ngo alu gv dwkibv nonua lvkobv reming gvvre, ataranya alu lobv.”

CXXX

ANWNV GAMLV

Tagin first Bible translation based on TEV (Good News)

copyright © 2018 The Word for the World International

Language: (Tagin)

Contributor: The Word for the World International

The New Testament in Tagin

Published as

ANWNV GAMLV

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-08-23

PDF generated using Haiola and XeLaTeX on 22 Feb 2024 from source files dated 15 Apr 2023

65e96bca-33d6-5dc6-a8ee-da485ecfb7ed